

San Lucas

Jabojátšama

¹ Ba entšanga Jesusbe historia tmojuábema, ntšamo bēngbeñe ndegombre tojopasacá. ² Chē historia juabemamna, chēnga tmojanuena ntšamo Jesusbe uatsjédayēnga y inye entšanga chabiamna immencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená. ³ As, átšnaca sēnjontsé cuedádoca juanotíciana lempe ntšamo Jesusbiamna imojtsichamcá, tojanobojatšentšana mēntscoñe. Mora šontsinyana tšabá yojtsemna acbiamna juabemana ntšamo ndegombre yomncá, uámana taitá Teófilo, chē tijuannoticiá soyēngama, ntšamo ndegombre bēngbeñe tojopasacá. ⁴ Ba soyēnga Jesusbiamna tmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnama.

Canye ángel tojanabuayená Juan chē Ubayaná jónyname

⁵ Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá). ⁶ Chatna tšabá amata ibnamna Bēngbe Bētsabe

bominýiñe, y ntšamo Bëngbe Bëtsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. ⁷ Básenga tondaye ibonjánabamna, Isabel šešona jtsebomnama ndobena causa, y chatna ya bëtsanáata ibojtsemna.

⁸⁻⁹ Chë bachnanga Bëngbe Bëtsabe bëts yebnentše tmojtsoservena ora, sempre imojanamana jabocacayana, nda tšabá tbojtsonýená, Bëngbe Bëtsábioye atschuanaye luaroye cháuama incienso jajuinýiyama. Canýe, Zacaríasbe entšanga Bëngbe Bëtsabe bëts yebnoca, Bëngbe Bëtsábentše imojtsoservena orna, Zacaríasbioye tšabá ibojonýena; y chca, cha ibojotóca jana incienso jajuinýiyana. ¹⁰ Zacarías, incienso yojtsejuinýnantscuana, ba entšanga shjoca imojtsemna, Bëngbe Bëtsáftaca encuéntaye. ¹¹ Nýe ndeolpe, Bëngbe Utabnabe canýe ángel tojanonýná chë incienso jajuinýiyama altarentša catšbioica. ¹² Zacarías chábioye tbojáninýe ora, tojanenjnáná y corente uatjana tbojanábuache.

¹³ Chora chë ángel tbojanियana: –Zacarías, ndoñe matauatjana. Bëngbe Bëtsá tonjouena ntšamo tconjaimpadacá. Acbe shema Isabel canýe šešona bochántsebomna, boyabásetema, y chana Juan ca cochjuabaye. ¹⁴ Chama aca corente oyejuayá cochántsemna, y bëtscá entšanga mochanjóyejuaye acbe uaquiñá tojonýnama. ¹⁵ Er cha, Bëngbe Bëtsabiamana canýe uámana entšá echántsemna. Ndocna te queochaisofsiye vínoye, ni jabuáchiye. Chë Uámana Espiritu chabe ainaniñe echantsemándaye, cha cabá

ndonÿna orscana. ¹⁶ Banga Israeloca entšanga, ntšamo cha chaojayanama mochanjontšé joyeunayana Bëngbe Bëtsá, chëngbe Utabná. ¹⁷ Cha echanjáshjango chë Bëngbe Bëtsabe Uámana Uabuayanabe natsana, y echántsebomna obenana y canÿe espíritu ntšamo chë Bëngbe Bëtsabe juabna oyebuambnayá Elías inabomncá. Chabe natsana echanjáshjango, bëtsétsanga chëngbe básengaftaca ndoñe chamondétsentsjanama, y chë nduauenanënga cachiñe chamotsatsjuabnama ntšamo chë Bëngbe Bëtsabe bominiñe tšabá amënga mondbetsejuabnaycá. Y chca, entšanga cha echantsapróntaye Bëngbe Utabná jabama orscama ca —chë ángel tbojaniana.

¹⁸ As Zacarías chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bétsemnama? Er atše ya bëtsëjema sëntsemna y atšbe shémnaca cachcá ca.

¹⁹ Chora chë ángel tbojanjuá: —Zacarías, atše ángel Gabriel sëndmëna; atše Bëngbe Bëtsábioca sëndoserverna. Cha šonjichmó chë tšabe noticiënga aca jauyanama y juenayama. ²⁰ Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

²¹ Chë ángel Zacaríaseftaca yo-jtsóyebuambnantscuana, entšanga shjoca Zacaríasbiana imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?”

²² Zacarías tojtanbocna ora, ndoñe yontsobena

chë entsángaftaca jóyebuambayana. Chënga tmojántatsëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábiocana canÿe soye tojáninÿama, er chëngbioye jatšëmbombonana yojáuyana, ndëbiá yojoquéda causa.

²³ Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná. ²⁴ Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinÿe cach tsoca yebnentše totanoquedá. ²⁵ Cha mëntšá yojtsichamo: “Bëngbe Utabná mora atšbiamá tojtenojuabó, entsángbentše atšbe ngménana jtsebojuánama, básenga tondaye béntsabamna causa ca.”

Canÿe ángel tojanabuayená Jesús jónÿnama

²⁶ Isabel chnënguana ishinÿe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye, ²⁷ canÿe shembása María ca uabainá jauatsëtsayama. Mariyna cabá boyabása nduabu-atmá inamna, pero Joséftaca jobouamayama tbojanšbuachená. Y Josena, rey Davidbentšana entsá inamna. ²⁸ Chë ángel Mariÿbioye tojána y mëntšá tbojanchuá: —¡Mouena. Bëngbe Bëtsá tšabe bendición acbiamá tonjama! ¡Bëngbe Utabná ácaftaca entsemna ca!

²⁹ Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanchuama.

³⁰ Chora chë ángel tbojanianyana: —María, ndoñe matauatjana, Bëngbe Bëtsá entsama

tšabe bendicionënga chacotsebomnama. ³¹ Aca ngomamaná cochanjoquéda y canýe šešona boyabásetema cochántsebomna, y chana Jesús ca cochjuabaye. ³² Cha puerte echantsámána, y entsangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canýe rey bochanjábema, ntšamo David yojamncá, ³³ y Jacóbëbentsana entsanga nyetsca tescama echantsamëndaye, y chabe mándayana ndocna te queochaisopochóca ca —chë ángel tbojaniyana.

³⁴ Chentsana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomñese ca?

³⁵ Y chë ángel tbojanjuá: —Chë Uámána Espíritu echanjabo nyets ácheñe, y Bëngbe Bëtsabe obenánaca ngomamaná cochanjoquéda. Chabe obenana mo jantšetëshcá cmochanjabouútsbotse; chíyeca chë echanjónýna šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma. ³⁶ Mouena, Isabel, acbe primá, canýe šešona bochántsebomna, masque ya bëtsananá cha entsemna; chë “šešona ndbomná ca” monjanabobuatmá, mora ya chñéngwana ishinye ngomamaná entsemna, ³⁷ er Bëngbe Bëtsá lempe jamama endobena ca —cha tojánayana.

³⁸ Chora María chë ángelbioye tbojaniyana: — Bëngbe Bëtsabe oservená atše sëntsemna. Bëngbe Bëtsá átšeftaca chaoma ntšamo šcojauyancá ca.

Y chentsana chë ángel tojtsatanoñe.

María tojána Isabel jabuáchama

39 Chentšana, María tojanoprontá y tojanochëmo canÿe puebloye, Judeoca tjañenache luariñe. 40 Chocna cha, Zacaríasbe yebnentše tojánamashëngo y Isabélbioye tbojanchuá. 41 Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama. 42 Chcasna, Isabel jabuache tojánayana: —¡Bëngbe Bëtsá acbiamá más tšabe bendicionënga entsama nÿetsca shembásengbiamá, y chë cochántsebmna šešonbiámnaca cachcá! 43 Atše merecido taitatobuajoñe, atšbe Utabnabe mamá chašuabobuáchama; 44 er atše sënjouena ntšamo sconjachuá, y cachora atšbe šešona oyejuayá atšbe uafsbioye tonjobonjó. 45 ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

46 Chora María tojánayana:

“Nÿets ainánaca Bëngbe Utabná chantsadorana,
47 y Bëngbe Bëtsá, atšbe Atsbocayabiamá corente chanjóyejuaye.

48 Bëngbe Bëtsá atšbiamá tojtenujuabó, atše chabe oservénëjema.

Er morscana muentša entsanga nÿetscanga puerte oyejuayá ca šmochantsábobuatma.

49 Bëngbe Bëtsá, chë nÿets obenana bomná, chabe obenánaca bëts soyënga atšbiamá tonjama.

¡Bëngbe Bëtsá puerte Uamaná ca entsabaina!

50 ¡Morsca entsanga y más chcoyënga, chábioye yeu-nanëngbiamá, cha sempre bochántsengmena!

51 Cha, chabe obenánaca bêts soyënga tojama, y chë nÿe cachënga bêtsëtsanga enobiamnayëngbe juabna tojtsepochochá;

52 reyëngbioye chëngbe mándayentšana tojtsatšë;

pero chë nÿe cachënga bêtsëtsanga ndenobiamnayëngbioye, uámanënga tojábiamana.

53 Chë shëntseca imomnëngbioye, chamosama bëtscá cha tojatsatá,

pero chë bomnëngbioyna tondaye tonjatsatá.

54 Cha tojanëjabuache chabe entšanga Israeloca, chabe oservénënga,

y ndoñe tbonjánebnatjëmbe jtsalastemánana,

55 nÿetsca tescama chë Abraham y chábentšana entšángbioye,

ntšamo bëngbe bêts taitanga Bëngbe Bëtsá tojanašebuachenacá ca” —cha tojánayana.

56 Mariyna unga ishinÿe Isabélaftaca tojanoquedá, y chentšana cachabe yebnoye tojtaná.

Juan chë Ubayaná tojanonÿná

57 Isabel jtsešócanama tojanóntšabuache ora, canÿe šešona boyabásetema tojanonÿná.

58 Isabelbe juachañe oyenënga y chabe pamíllanga tmojántatsëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyejuaanga.

59 Chë šešona posuftayté yojtsebomna ora, tmojánashjango y chëtémbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; 60 pero chabe

mamá tojaněyana: –Ndoñe. Quem šešona echantsabaina Juan ca.

⁶¹ As chēnga Isabélbioye tmojanianyana: –Acbe pamíllangbeñe ndocná chca quenatabaina ca.

⁶² Chora chēnga jatšēmbombonana Zacaríasbioye tmojantjá, ntšamo chē šešona chaotsabainama cha yojtseboše ca. ⁶³ Zacaríasna jatšēmbombonana canye tablébé tojaněyá y chiñe tojanábema: “Cha entsabaina Juan ca”. Y chē causa, nyetscanga ojnanánēnga imojtsemna. ⁶⁴ Y cachora Zacarías jóyebuambayama yojtobenaye, y yojontsé Bēngbe Bētsábioye jētschuayana. ⁶⁵ Chē juachañe oyenēnga nyetscanga tmojanēuatjaná, y Judeoca nyetsca chē tjañenache luariñe entšanga chē soyēngama imojtsencuéntaye. ⁶⁶ Nyetscanga chē soyēngama tmojántatšēmbona ora, chēngnaca corente chama imojtsejuabnaye y mēntšá imojtsichamo: “¿Chē básetema, bētsá ora nda yochtsemna ca?” Y ndegombre, Bēngbe Bētsabe obenana cháftaca yojtsemna.

Zacarías, Bēngbe Bētsábioye jētschuayama

⁶⁷ Chē Uámana Espíritu tbojanmandá ora, Zacarías, chē basetembe taitá, Bēngbe Bētsabe mándoca jtsóyebuambnaye, mēntšá tojánayana:

⁶⁸ “¡Chē Utabná, chē Israeloca entšangbe Bētsá matschuanga,

er cha tonjabo chabe entšanga jabújabuachama y jabátsebacama!

⁶⁹ Cha bochanjíchmuca canye atsebacayá puerta obenana bomná,

y cha echántsemna Bēngbe Bētsabe oservená Davidbentšana entšá;

70 ntšamo Bëngbe Bëtsá bayté entsemna, chë chabe
 juabna oyebuambnayëngbiajana,
 chë chábenga imomnëngbiajana bënga
 šojanašebuachenacá, mëntšá:

71 Cha canya bochjanichmuá bëngbe uayayënga
 y nyetsca uaboyënjëngbiana bënga
 jabátsebacama;

72 bëngbe bëtsëtsangbioye jálastemama,
 y jenójuaboyama y jamama chabe uámana trato,

73 ntšamo Bëngbe Bëtsá, bëts taitá Abrahámbioye
 tbojanšbuachenacá.

74 Cha tbojanšbuachená bëngbe uayayëngbiana
 bënga jabátsebacama,

chca, bënga ndauatjá Bëngbe Bëtsá jasérviana,

75 y chabe entšangcá, nyetsca soyënguiñe tšabá
 amënga, Bëngbe Bëtsabe delante nyetsca te
 bëngbe vidënguiñe jëftsiyename.

76-77 Y aca, atšbe básetemna, Bëngbe Bëtsabe juabna
 oyebuambnayá ca cmochantsábobuatma,
 entšángbioye Bëngbe Bëtsabe soyëngama
 cochtsabuayiynama,

Bëngbe Utabná cabá ndáshjango ora, bacna soyënga
 amana chamuajbanama;

as Bëngbe Bëtsá chëngbe bacna soyënga
 echanjáperdonaye, y Bëngbe Utabná jabama
 mochantsoopróntaye.

78-79 Bëngbe Bëtsá bënga puerte šualastemánayeca,
 canya bëngbe juabnënga binynayá bochanjíchmuá,
 bënga chë bacna soyënga causa mo ibetiñcá y
 obanëngbe luarentšcá vida bomnëngbioye
 jabátsebacama,

y jabuátambama ntšamo natjěmbana jtsiyenana ca” —cha tojánayana.

⁸⁰ Chě bášetema yojontsé jobóchana y chabe espíritnaca puerte. Bayté, entšanga ndoyena luarěnguenache cha yojěftsiyena, Běngbe Bětsá Israeloca entšángbioye cha tojáninŷanŷentscuana. Chentšana, chamuábuatmanamna tojanontsé Israeloca entšángbeñe jóyebuambayana.

2

Jesucristo tojanonŷná (Mt 1.18-25)

¹ Chě tempo yojamna canŷe Romoca běts mandado, Augusto ca uabainá; y cha, chě natsanama tojanmandá nŷetsca entšanga chamuenábemama. ² Chě soye tojanochněngo Cirenio ca uabainá Sirioca mandado yojamna ora. ³ Chamna, nŷetscanga tojanotocá jtangana jenábeměngama, cada ona nděmoca chěngbe běts taitanga imojěftsiyena puebloye.

⁴ As, Josénaca Galilea luarentšana Nazaretocana yojěftsebozna y Judeoye, Belén puebloye, tojtaná. Tempo, Josebe běts taitá rey David, Belenoca inoyena. Y José, Davídbentšana entšá inámnayecna, choye jenábemama tojtaná. ⁵ Maríaftaca tojána jenábemama, y muana tbojanšbuachená Josěftaca jobouamayama. María ngomamaná yojtsemna, ⁶ y Belenoca ibojtsemněntscuana, chě ora tbojanóntšabuache jtsešócanama. ⁷ Y chentše María ibojtsebozna chabe natsana šešona, canŷe boyabášetema. Posadoca tondaye luare yontsemna causna, chata nŷe uacněngbe átana tambuentše

tbojanoquedá. Y Jesús tojanonýná orna, María tbojtanëntsacjuá y canýe bachetémiñe tbojanjajó.

Chë angelotémënga y chë oveshënga abujënyanga

⁸ Belén béconana, chë ibeta, oveshënga abujënyanga shëntsjoca cachëngbe oveshëngaftaca imojtsemna. ⁹ Nýe ndeolpe, Bëngbe Bëtsábiocana canýe ángel tojánëbëbuacna, y Bëngbe Bëtsábentšana corente yojtsebuash-inýinýana chëngbe shëconániñe. Chama chënga puerte imojochauatjaná.

¹⁰ Chora chë ángel tojanéyana: “Ndoñe matauatjëngana. Sënjabo tšabe soyënga tonjopasama jábuayenama, nýetscanga chamóyejuama. ¹¹ Mora chë David tonjanonýná pueblentse canýe šešona tonjonýná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. ¹² Ndegombre chca entsemnama mëntšá šmochanjátatšëmbona: canýe šešona ntsacjuaná y uacnëngbe bachetémiñe jajoná šmochanjínýena ca” —cha tojanéyana.

¹³ Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsatschuanaye:

¹⁴ “¡Bëngbe Bëtsá, celoca entsemná matschuanga! Bëngbe Bëtsábioye yeunanëngbiamana, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

¹⁵ Chentšana chë angelënga celoye tmojésanshëcuana. Y chora chë oveshënga abujënyanga tmojanontšë jeniyanana: “Belenoye cuajna, chë quem tojopasá soye

jinŷama. Ndegombre, Bēngbe Bētsá chē soye ŷojanŷanŷé ca.”

¹⁶ As betsko tmojána y tmojánanŷena María, José y chē ŷeŷonatema bachetémiñe jaxoná. ¹⁷ Chē ŷeŷona tmojáninŷe ora, chēnga tmojanacuntá Jesusbe bētsētsata y chē ínŷengbioye, ntšamo chē ŷeŷonbiama chē ángel tojanēyancá. ¹⁸ Nŷetscanga chē tmojanuenēnga tmojanenjnana ndayá chē oveshēnga abujēñŷanga imojtsacúntama. ¹⁹ Pero Mariyna nŷe cachabe ainanoca quem soyēngama más bēn inétsenojuabnañe.

²⁰ Chentsana, chē oveshēnga abujēñŷanga tmojtaná Bēngbe Bētsá atschuanaye, ndayá tmojáninŷama y tmojanuenama. Nŷetšá tojanopasá lempe ntšamo chē ángel tojanēyancá.

Bēngbe Bētsabe bēts yebnoye Jesús tmojanamba

²¹ Posufta te tojánashjache ora, chē basetémbioye chē más delicadentše base bobachtema tmojantētše, Bēngbe Bētsabe entšá bētsemnama chaotsinŷnama, ntšamo judiēnga imojanamancá; y Jesús ca tmojanabaye, ntšamo chē ángel tbojaniyancá, María cabá ndoñe ngomamaná yontsemna ora.

²² Y chē tempo tojanóshjango, ndaye ora José y María yojtsamna jamana ntšamo Moisesbe leyiñe iuayancá, ndayá jamama yojanmēncá, canŷe shembása Bēngbe Bētsabe delante tšabia jtsatsmēnama, canŷe ŷeŷona tbojtsebomnentsana. Asna, Jerusalenoye tbojánata y chē bāsetema tmojanamba, Bēngbe Bētsabe bēts yebnoca jinŷinŷiyama, ²³ ntšamo chē Bēngbe Utabná Moisésbioye tbojaniyé leyēnguiñe iuayancá,

měntšá: “Canÿe yebnentše chë natsana šešona boyabása tojtsešnësna, Běngbe Bětsábioye cha jinÿinÿiyana chábioye chabotseservénama ca.” Chcasna, chë bášetema Běngbe Bětsabe běts yebnoye tmojanamba. ²⁴ Y tmojanamba janshana uta shloftše, Běngbe Bětsá jětschuayama, ntšamo Běngbe Utabnabe leyiñe yomandancá. Chiñe mēntšá endayana: “Chë natsana šešona chaojóná ora, boyabášetema tojtsešnëse, janshana šmochjuamba uta fchetnatémata o uta šešona palomatémata, Běngbe Bětsá jětschuayama ca.”

²⁵ Jerusalenoca inamna canÿe bacó, Simeón ca uabainá; cha inamna nÿetsca soyěnguiñe tšabá amá, y yojaniyena ntšamo Běngbe Bětsá yomandacá. Cha yojanobátmana chë tempo ndaye ora, Běngbe Bětsá bochjanichmuá canÿa Israeloca entšanga cháuatsebacama. Y chë Uámana Espíritu chabe ainaniñe yojtsemna; ²⁶ chíyeca, cabá lempe chca ndopása ora, cha yojtsetátšēmbo cha ndoñe yochjanóbanama, chë Běngbe Bětsabe Uámana Uabuayaná ntjěftsinÿcá. ²⁷ Chë Uámana Espíritu tbojanmandáyeca, Simeón Běngbe Bětsabe běts yebnoye tojána; y Jesusbe bětsětsata chë bášetema tmojanamba ora, ntšamo Moisesbe leyiñe iuayancá chabiamá jamama ora, ²⁸ Simeón tbojanocutsá y Běngbe Bětsábioye tbojtanchuá. Cha mēntšá tojánayana:

²⁹ “Běngbe Utabná, mora šmolesenciá, atše acbe oservená natjěmbana jóbanana,

er ya tconjama ntšamo šconjanšbuachenacá;

³⁰ atše chë entšangbe Atsebacayá sěnjinye.

31 Aca cha tcojichmó n̄yets luarenache entšangbiana.

32 Cha ch̄e ndoñe judiëngbe juabnënga bin̄ynayá echántsemna;

y chábeyeca, n̄yets quem luarentše mochanjátatšëmbona, ch̄e acbe entšangbiana, Israeloquëngbiana ca” – cha tojánayana.

33 José y María ibojenjnanata ntšamo Simeón Jesusbiana yojtsichámuama. ³⁴⁻³⁵ Chentšana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, ch̄e Jesusbe mamábioye tbojaniana: “Quem soyënga corente cmochanjacochtsetšenaná, mo ainana espadějaca cuafjenëchnëngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatšëmbo. Israeloca banga quem básetema mochantsábotena y chabe palabrëngnaca ca” – cha tbojaniana.

36 Chéntšnaca yojtsemna can̄ye shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bëtsananá cha inamna. N̄ye can̄ysëfta uata cha yojëftsebouamna; ³⁷ y chabe boyá tojanóbanentšana, cha posufta bn̄etsana y canta uata viudá inamna. Ndocna te Bëngbe Bëtsabe bëts yebnentšana yonjábocana, y chentše tojanoquedá bn̄eté y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana.

³⁸ Simeón, María y Josébioye vojtsëtsëtsnaye ora, Ana chëngbioye vojobeconá, y chë Atsebacayá tojanonýnama Bëngbe Bëtsábioye tbojtanchuá chentsana, Jerusalenoca entšángbioye, chë canýe atsebacayá Israeloca entšangbiana imojanobatmanëngbioye tojanëyana, chana Jesús yojétsemna ca.

Jesús Nazaret puebloca

³⁹ José y María lempe ntšamo chë Utabnabe leyënguifne iuayancá tbojanma ora, Galilea luarye tbojtanata, cachëngbe puebloye, Nazaretoye. ⁴⁰ Y chë básetema vojtsobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtscá tšabe bendiciónënga chaotsebomnama.

Jesús Bëngbe Bëtsabe bëts yebnoca

⁴¹ Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta. ⁴² Jesús bnëtsana uta uata tojánashjache ora, Jerusalenoye tmojána, ntšamo imojanamancá. ⁴³ Chë fiesta tojanopochocá chentsana, chabe bëtsëtsata yebnoye ibojtsataye, y chata ntsetatšëmbcá, Jesusna Jerusalenoca yojtsoquedañe. ⁴⁴ Chata ibojétsejuabnaye Jesús chë inýe entšángaftaca yojtsataboye ca; chcasna, canýe te nýetšá benachëjana tbojánata ora, tbojanontšé chabe pamílangbeñe y ubuatmëngbeñe jtsenguanguana, ⁴⁵ pero ndoñe ibonjobenaye jtsinýenana. As, chata chora Jerusalenoye tbojésanshëcona choca cha jetsenguanguama.

46 Unga tianoye chata tbojanobená Běngbe Bětsabe běts yebnentše cha jetsinŷenana. Chana chě Moisesbe ley abuátambayěngbe tsěntsaca inětsotbemañe, chěngbioye inayaunana, inatjanaye. 47 Nŷetsca ouenaněnga imojtsenjanaye Jesús tša osertaná inamnana, y tša tšabá jojuama cha yojtsobenama. 48 Chabe bětsětsata chca tbojáninŷe ora, chátnaca ibojenjaná. Chora, chabe mamá tbojaniyana: —Uaquiñá, ¿ndáyeca chca běndátaftaca tcojama? Taitá y atše corente enócochinŷenata cbonděnguá ca.

49 As Jesús tojaněyana: —¿Ndáyeca atše šmonguá? ¿Ndoñe šondétatšěmbo atše šomna atšbe Taitabe yebnentše jtsemnana ca?

50 Pero chě bětsětsata ndoñe tonjaněsertá ntšamo cha tojaněyancá.

51 Chentšana Jesús chě bětsětsataftaca Nazaretoye tojtaná y chata yojtsayaunana. Y chabe mana nŷe cachabe ainanoca chě soyěngama más bēn inětsenujubnañe. 52 Jesús yojtsobóchaye y más juabna yojtsebomna; y Běngbe Bětsá y nŷetsca entšanga corente oyejuayěnga chabiamana imojtsemna.

3

Juan chě Ubayaná entšanga yojanabuayiyná (Mt 3.1-12; Mc 1.1-8; Jn 1.19-28)

1 Bnětsana shachna uatama Tiberio César Romoca běts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey.

2 Anás y Caifás chě bachnangbe más uámana

amëndayata ibojamna. Cach tempo, canye luare entšanga ndoyentše Bëngbe Bëtsá tbojanatsëtsá Juánbioye; Juan, Zacaríasbe uaquiñá. ³ As Juan nÿetsca luarënguëjana Jordán béjaye béconana tojánachnëngo, entšanga mëntsá utsëtsnaye: “Tšëngaftangbe bacna soyëngama ngmënaca šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” ⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojëftsabemcá. Cha mëntsá tojanábema:

Entšanga ndoyena luaroca canya enduáyebuache:

“Bëngbe Utabná echanjabo ca; mo nda canye benache tojtseprontacá canye uámana entšá jashjanguama,

cachcá, tšëngaftángnaca, Bëngbe Utabná jabama ainantše tšabe juabnëngaca šmochtseprontana.

⁵ Nÿetsca jachañe echantojútjia, y tjañe y batsjabenga mochantenájachibiaye.

Chë scundma benachënga ndirichëjënga echántsmëna, y chë bacá mana benachënga mochantenájachibiaye.

Mo chë chca tmojtsamëngcá, canye benache japróntana canye rey cháúashjanguama,

tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

⁶ Y nÿetsca entsanga mochanjinÿe chë Atsebacayá Bëngbe Bëtsábentsana jabana ca” —cha tojanábema.

⁷ Chë entsanga Juan chaubáyama imojánbocana ora, Juan yojanëtsëtsnaye: “¡Mëtscuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca?

⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiama jayanama: ‘Bëngna Abrahábentsana entsanga, Bëngbe Bëtsabe entsanga fsëndmëna ca’. Er atše chanjayana, Bëngbe Bëtsá quem ndëtšbéngacnaca Abrahábentsana entsanga nanjábiamana. ⁹ Tatšná ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

¹⁰ —¿Y as, ndayá jamama šojtsamna ca? —chora chë entsanga tmojantjá.

¹¹ Y Juan tojanëjua: —Chë uta quëfsaíya uabomná bontsemna canÿiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

¹² Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

13 Y Juan tojanéyana: —Nýe ntšamo chë leyiñe yomandancá entšángbioye crocénana šmochtsayëngacaye ca.

14 Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nýe ndayámnaca bonamente jobuáchëse; y nýe ntsachetsá šmacaná crocenánaca oyejuayënga šmochtsomñe ca.

15 Entšanga chë Bëngbe Bëtsabe Uámana Uabuayanabiama imojtsobátmana, y chëngna Juanbiama imojétsejuabnaye nderado cha chë Bëngbe Bëtsabe Uámana Uabuayaná nanjamna ca; ¹⁶ pero Juan tojanéyana: “Ndegombre, atše béjayeca cbondubáyana. Pero chë echanjabá atšbiama corente más obenana endbomna, y atše merecido taitsatobuajoñe ni mo jotsejbiyana chabe shecochëtjonëshentsa corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chënga corente castigánënga chamotsemnama, mo iñeshequécá. ¹⁷ Canýe entšá chabe mëtštá cucuatšíñe jiyëbana, chabe trigo jtsóbobemama, y chë ndoserverna shácuanënga jtsejashtsëtsana. Chabe trigo chë grano uaquëcñaye tsañe jtsabuájua, y chë ndoserverna shácuanëngna iñeshoye jtsatmetšana. Cachcá, chë átšbentšana echanjabá, chë tšabe entšanga echanjúbuaja, y chë bacna entšangna

ĩneshiñe echantsacastígaye, y chë ñe ndocna te queochátsfsana ca” —cha tojanéyana.

¹⁸ Chca y inye palabréngaca Juan chë tšabe noticiéngama yojanabuayiyná. ¹⁹ Tempo, Juan Heródesbioye tbojanácacana, cha tojanobouamama cachabe catšata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y nýetsca bacna soyénga Herodes tojanmámna. ²⁰ Pero Herodes Juánbioye joyeunaye luariñna, cabá inye más bēts bacna soye tojátanma: Juánbioye cárceloye tbojtsanētame.

Juan, Jesúsbioye tbojanabaye

(Mt 3.13-17; Mc 1.9-11)

²¹ Pero Herodes Juánbioye cabá ndutame ora, Juan ba entšanga tojanēbaye, y Jesúsnaca tojánabo jenábayama. Ibojtsabayanēntscuana, Jesús Bēngbe Bētsáftaca ibojtsencuéntaye; y chora celoca yojtēfjo, ²² y chë Uámana Espiritu mo canye palomatemcá Jesúsbioye yojtsastjajuana; y celocana Bēngbe Bētsá tbojaniyana: “Acna atšbe bonshana Uaquiñá condmēna. Acbiama corente sēntsoyejuá ca.”

Jesusbe bēts taitanga

(Mt 1.1-17)

²³⁻³⁸ Jesús unga bnētsana uata yojtsebmna, entšángbeñe Bēngbe Bētsabe soyéngama jóyebuambayama yojontsé ora. Entšanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,
Melqui Janabe uaquiñá
y Jana Josebe uaquiñá.
José yojamna Matatíasbe uaquiñá,
Matatíasna Amosbe uaquiñá.
Amós Nahumbe uaquiñá,
Nahúm Eslibe uaquiñá
y Esli yojamna Nagaiibe uaquiñá.
Nagai yojamna Maatbe uaquiñá,
Maatna Matatíasbe uaquiñá.
Matatías Semeibe uaquiñá,
Semei Josecbe uaquiñá
y Josec yojamna Judabe uaquiñá.
Judá yojamna Joananbe uaquiñá
y Joanán Resabe uaquiñá.
Resa Zorobabelbe uaquiñá,
Zorobabel Salatielbe uaquiñá,
y Salatielna Neribe uaquiñá yojamna.
Neri yojamna Melquibe uaquiñá,
Melqui Adibe uaquiñá.
Adi Cosambe uaquiñá,
Cosam Elmadambe uaquiñá,
y Elmadamna yojamna Erbe uaquiñá.
Er yojamna Jesusbe uaquiñá
y Jesús Eliezerbe uaquiñá.
Eliezer Jorimbe uaquiñá
y Jorimna Matatbe uaquiñá.
Matat yojamna Levibe uaquiñá,
Leví Simeonbe uaquiñá
y Simeón Judabe uaquiñá.
Judá Josebe uaquiñá,
José Jonambe uaquiñá,
y Jonamna yojamna Eliaquimbe uaquiñá.

Eliaquim yojamna Meleabe uaquiñá,
Melea Menabe uaquiñá.
Mena Matatbe uaquiñá,
y Matata yojamna Natanbe uaquiñá.
Natán yojamna Davidbe uaquiñá,
David Isaíbe uaquiñá
y Isaína Obedbe uaquiñá.
Obed Boozbe uaquiñá,
Booz Salabe uaquiñá
y Sala yojamna Naasonbe uaquiñá.
Naasón yojamna Aminadabëbe uaquiñá,
Aminadab Adminbe uaquiñá
y Admin Arnibe uaquiñá.
Arni Esrombe uaquiñá,
Esrom Fáresbe uaquiñá
y Fáresna yojamna Judabe uaquiñá.
Judá yojamna Jacobëbe uaquiñá,
Jacob Isaacbe uaquiñá
y Isaacna Abrahambe uaquiñá.
Abraham Tarebe uaquiñá
y Taré yojamna Nacorbe uaquiñá.
Nacor yojamna Serugbe uaquiñá,
Serug Ragaube uaquiñá
y Ragauna Pelegbe uaquiñá.
Peleg Heberbe uaquiñá,
y Heber yojamna Salabe uaquiñá.
Sala yojamna Cainanbe uaquiñá,
Cainán Arfaxadbe uaquiñá
y Arfaxadna Sembe uaquiñá.
Sem Noebe uaquiñá
y Noé yojamna Lamecbe uaquiñá.
Lamec yojamna Matusalenbe uaquiñá,
Matusalén Enoche uaquiñá

y Enocna Jaredbe uaquiñá.
 Jared Mahalaleelbe uaquiñá,
 y Mahalaleelna yojamna Cainanbe uaquiñá.
 Cainán yojamna Enosbe uaquiñá,
 Enós Setbe uaquiñá,
 Set Adanbe uaquiñá
 y Adán Bëngbe Bëtsabe uaquiñá.

4

Jesús tojanobená Satanás jayëñjanama (Mt 4.1-11; Mc 1.12-13)

¹ Juan, Jesúsbiye tbojanabáyentšana, chë Uámána Espíritu Jesusbe ainaniñe yojtsemándaye. Jesús Jordán bejajoicana tojtaná y chë Uámána Espíritna entšanga ndoyena luaroye tbojanánatse.
² Chentše canta bnëtsana te tbojanjétana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

³ Chora Satanás tojésanabo y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiamaca.

⁴ As Jesús tbojanjuá: —Bëngbe Bëtsabe uabemana palabrenguiñe mëntšá endayana: “Entšá nÿe tandëseca ndoñe vida ntsebomnana ca.”

⁵ Chentšana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿé. ⁶ Chora Satanás tbojaniyana: —Atše nÿets obenana cbochjátsetaye y lempe quem amëndayëngbenache yobinÿna soyëgnaca. Atše lempe chca sënjóyëngacñe y sëntsobena jatsetayama nda

stsebošábioye. ⁷ Aca chacojoshëntsamentšé y chašcojadorase, lempe nyetsá acbiama echántsemna ca.

⁸ Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Acbe Bëtsá, chë Utabná cochtsadorana y nye cha cocht-seservena ca.”

⁹ Chentšana, Satanás Jerusalenoye tbojanánatse y Bëngbe Bëtsabe bëts yebnentse chë más tsbanánoca tbojanatsá, y tbojaniana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, ¹⁰ er Bëngbe Bëtsabe uabemana palabrenguiñe endayana:

Bëngbe Bëtsá chabe angelënga echanjichamuá, chacmotsinÿenama.

¹¹ Chënga buacuatšëngaca cmochanjishache, she-cuatse ndocá ndëtsbeñe chacondomama ca —cha tbojaniana.

¹² Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ndoñe mašbošana acbe Bëtsá chë Utabná bacna soyëngama jacocheñguama ca.”

¹³ Cabana, Satanás tojanajbaná bošana Jesúsbioye bacna soyëngama jacocheñguama, y bënama Jesúsbentšana tojtsanojuánañe.

Jesús tojanontšé Galileoca chabe trabajo jama

(Mt 4.12-17; Mc 1.14-15)

¹⁴ Chentšana, Jesús Galileoye tojesaná chë Uámama Espíritbe obenánaca, y nyetsca entšanga chë luariñe chabiana imojtsencuëntaye.

¹⁵ Jesús yojtsabuátambaye chë judiëngbe

enefjuana yebnënguenache, y nyëtscanga cha imojtsatschuanaye.

Jesús Nazaret puebloca
(Mt 13.53-58; Mc 6.1-6)

¹⁶ Chentšana Jesús Nazaretoye tojtanashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualíama. ¹⁷ Chë Bëngbe Bëtsabe juabna oyebuambnayá Isaíasbe librëša tmojaniyé chauliama. Chë librëša yojutëfjona orna, tojáninýena mëntsá uábemanentše:

¹⁸ “Chë Utabnabe Espíritu átšeftaca entsemna, er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínýnama;

jamama chë ínýengbe causa imosufrínënga, tempcá cachcá tšabá chamotsatsmënama;

¹⁹ y entšanga jáuyanama ndëmua ora chë Utabná chabe entšanga yochjatsebacaye ca.”

²⁰ Jesús jualíama tojanpochocá y chora chë uabuachanábioye chëša tbojtaniyé y tojtanótbema. Nyëtsca entšanga chë enefjuana yebnentše imojtsemnënga Jesúsbioye imojtsobuáuatja. ²¹ Chora Jesús tojanontsé mëntsá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

²² Njētscanga Jesusbiamá tšabá imojtsencuéntaye y ojanánēnga imojtsemna tša botamana cha yojtsóyebuambnama. Y chēnga imojtsentjanaye: —¿Quem boyabása ndoñe Josebe uaquiñá yondmēna ca?

²³ Jesús yojtsetátšēmo ntšamo cha tojánayaniñe chēnga ndoñe tmonjanóšbuachema. As tojanéyana: —Ndegombre tšēngaftanga ntšamo entšanga mondētšayancá atše šmochanjauyana: “Ashnayá, cach aca menoshná ca”. Y tšēngaftanga šmojtsejuabná atše jauyanama: “Bēnga fsēnjouena chē bēts soyēnga Bēngbe Bētsabe obenánaca Capernaumoca tcojamama. Ntšamo contsichamcá ndegombre tojtsemnēse, cach acbe publéntsñaca cachcá moma ca”.

²⁴ Y cachora Jesús más tojanoyebuambá, mēntsá: “Ndegombre cbéyana, ni canye Bēngbe Bētsabe juabna oyeambuambnayábioye cachabe pueblentše tšabá quematonýá. ²⁵ Ndegombre cbéyana, Elías, chē Bēngbe Bētsabe juabna oyeambuambnayá, Israeloca inamna ora, ba viudanga chentše imojamna. Chē tempo, unga uata y tséntsañe njētšá ndoñe tonjanafté y bēts shēntsana chē luariñe yojtsebinýna. ²⁶ Pero Bēngbe Bētsá, Elíasbioye ndoñe tbonjanichmó ni mo canye Israelentša viudábioye, y aíñe tbojanichmó ínjoye, Sarepta ca uabáinoye, Sidón béconana, canye chentša viudábioye. ²⁷ Eliseo, chē Bēngbe Bētsabe juabna oyeambuambnayá, Israeloca inamna ora, chentše banga imojamna bacna nguayanánaca šoquēnga, y ni mo canya chentša šocábioye tbonjanshná, pero aíñe canye šocábioye, Naamán ca uabainá, cach bacna

nguayanánaca, Siriocá ca” –cha tojánayana.

²⁸ Chë judiëngbe enefjuana yebnentše imojtsemna entšanga chca tmojanuena ora, puerte tojánetëna. ²⁹ As, chora chënga tmojantsbaná, chë pueblentšana Jesús imojtábocna y más tsjuanoye canye peñëšëjana imojuánatse. Chënga imojana-jebna cach peñëšiñe, y chë entšanga imojtseboše Jesús chocana jtsajuatsëntšana. ³⁰ Pero Jesusna chëngbe tsëntsajana tojánachnëngo y ínÿoye tojt-sanoñe.

*Jesús, bayëjbe juabna cányabioye tbojanbojuaná
(Mc 1.21-28)*

³¹ Chentsana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entšanga jabuátambana. ³² Entšanga imojtsenjnanaye ntšamo Jesús yojtsabuátambama, er chamna mo canye mando bomnacá yojtsóyebuambnaye.

³³ Chë enefjuana yebnentše, canye boyabása bacna bayëja uambayá yojtsemna, y chabe causa chë boyabása tojanontsé mëntšá uayebuáchana: ³⁴ —¡Cachcá šmonÿá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

³⁵ Chora Jesús chë bacna bayëjbioye tbojt-sanácacana y tbojaniyana: —¡lytëca móbema y chábentšana maisebocna ca!

As chora chë bayëja entšanguentše chë boyabásabioye tbojanshajayé, y ndocá ntjëftsemcá chábentšana yojésebocna. ³⁶ Chë soyama

nÿetsca entsanga imojénjnanaye y mēntśá imojtsenatsētsnaye: “¡Tśa chca palabrénga! ¡Quem entsá mandayacá y obenacá chē bayējēnga entsamēnda, y chēnga montsaisebocana ca!”

³⁷ Y Galileoca nÿetsca pueblēnguiñe Jesusbiamaya yojtsótatsēmbo.

Jesús, Simón Pédrēbe uambén mamábioye tbojanashná

(Mt 8.14-15; Mc 1.29-31)

³⁸ Chentśana, Jesús chē judiēngbe enefjuana yebnentsana tojēftsanbocna y Simonbe yebnentsē tojánamashēngo. Simonbe uambén mamá šocá inajájona jabuache calentóraca, y chē chentśe imojtsemna entsanga chabiamaya Jesúsbioye tmojanimpadá. ³⁹ Chora Jesús chē šocábioye yojotsejbéna y tojánayana: “¡Calentora mojuaná ca!” Y chē calentora tbojtsanóbojuanañe. Y cachora, cha tojtantsbaná y tojanontśé chēnga jobuácuedana.

Jesús ba šoquēnga tojanashná

(Mt 8.16-17; Mc 1.32-34)

⁴⁰ Shinÿe yojuenatjēmba ora, banga inÿe y inÿe šocana bomnēnga Jesúsbioye tmojanēnatse, y cha nÿetsca šoquēngbeñe cucuatśēnga tojanajáj y tojanashná. ⁴¹ Chora, ba šoquēngbentsana bacna bayējēnga imojtsaisebocana y mēntśá imojtsanchembumbuana: “¡Aca chē Bēngbe Bētsabe Uaquiñá condmēna ca!” Pero Jesusna yojtsēcácana y ndoñe tonjanalesenciá chamóyebuambama, er chē bayējēnga imnatátśēmbo cha chē Cristo bétsemnama.

Chë judiëngbe enefjuana yebnënguenache, Bëngbe Bëtsabe soyëngama Jesús entsànga yojanabuayiná (Mc 1.35-39)

⁴² Yëfsana tojanbinÿna ora, Jesús chë pueblentsana tojëftsanbocna, y canÿe luaroye, entsànga ndoyenoye tojtsanoñe. Pero entsànga tmojána cha jetsenguanguama, y cha yojtsemnoye tmojánashjajna. Chënga imojétseboşe Jesús cach pueblentşe chaotsoquedáñama, ⁴³ pero Jesús tojanÿyana: “Atşe şontsemna chë tşabe noticiënga Bëngbe Bëtsabe amëndayama inÿe pueblënguenáchnaca jábuayenana. Chama Bëngbe Bëtsá şonjichmó ca.”

⁴⁴ Y chentşana, Jesús yojánana Bëngbe Bëtsabiamama entsángbioye abuayinaye, chë judiëngbe enefjuana yebnënguenache Judeoca.

5

Canÿe te mallajta beonga ashebuánaye te (Mt 4.18-22; Mc 1.16-20)

¹ Canÿe te, Jesús, Genesaret ca uabaina uafjajónaye tsachañe yojtsemna ora, ba entsànga tmojánashjajna, y chënga tşa imojtsenajuatsëntşnaye Bëngbe Bëtsabe palabra jouenama. ² Jesús, chë uafjajónaye tsachañe bécoñe tojáninÿe uta ena barquësha; chë beonga ashebuánayëngna barquëshanguentsana tmojëftsanbocna atarraiëshangá jetsáboshabiamama. ³ Jesús canÿe barquëshañe tojánamashëngo; chësha Simónbeshama inauamna. Chora Simónbioye mëntşá tbojanianaye: “Quem tsacháñentsana chcoye mëyamba ca.”

⁴ Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojaniyana: —Shbuatsëntsoye barquësha mëyamba y tšëngafangbe atarraiešhangá šmochjushbuetše, beonga jashebuáyama ca.

⁵ Pero Simón tbojanjuá: —Buatëmbayá, nÿets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraiešha chantëtëshbuetše ca.

⁶ Tmojanëshbuetše orna, bëtscá beonga tmojánishëche y chëngbe atarraiešhangá tojanontsé jtsatanëcanana. ⁷ As, chë inÿe barquëshañe imojtsemna enutëngbioye tmojánefjatšëmbo, jabújabuachama chamuábama. Chora chënga tmojánabo, y nÿets uta barquësha beóngaca tmojanajutjé. Tša chëftanga causa, tojanontsé chë uta barquësha jtsenatjëmbambana.

⁸ Simón Pedro chca tojáninÿe ora, Jesús bentše tojanoshëntsamentsé y tbojaniyana: —¡Bëngbe Utabná, atše bacna soye amá sëndmëna, chíyeca átšbentšana mojuaná ca!

⁹ Chë tša beonga jashebuáyama Jesús tojanmama, Simón y chë cháftaca imojtsemnënga imojuatjaná. ¹⁰ Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: —Ndoñe matauatjana. Morscana, entsanga Bëngbe Bëtsabiana cochántanguaye, y nÿe beonga ashebuanayá ndoñe quecochátsmëna ca.

¹¹ As chora chë barquëshangá tsachoye tmojtanéyamba y lempe jéseboshjonëse, Jesús tmojanasto.

Jesús, canya bacna nguayanánaca šocábioye tbojanshná

(Mt 8.1-4; Mc 1.40-45)

¹² Jesús canye pueblentše yojtsemna ora, chentše tojánashjango canye entšá bacna nguayanánaca šocá. Chë šocá Jesúsbioye tbojáninýe ora, tojanoshëntsamentšé y jubiaca fshantsóntscoñe yojotsejbéna y tbojanimpadá: — Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

¹³ As Jesús cucuátšeca tbojánbojajo y tbojaniyana: —Aíñe, sëntseboše. ¡šocana cbotsebojuaná ca!

Y cachora chë šocana tbojtsanóbojuanañe.

¹⁴ Chora Jesús tbojanmandá: —Ndocnábeñe chë soye cattsecuëntaye; nýe Jerusalenoca báchnëbioye motsa, y cha cochjinýinýiye aca mora ya tšabá cojtsatsmënama; y chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nýetsca entšanga chamotatšëmbona mora ya tšabá cojtsatsmënama ca.

¹⁵ Pero ndayá Jesús yojtsamama más entšanga imojátatšëmbona, y ba entšanga imojtsójotoye chábioye joyeunayama y chëngbe šocanëngama chauashnama. ¹⁶ Pero Jesús yojanamana jtsoñana entšanga ndoyena luarëngoye y choca Bëngbe Bëtsáftaca ibnécuentaye.

Jesús, canye jama ndobenábioye tbojanshná

(Mt 9.1-8; Mc 2.1-12)

17 Canye te, Jesús yojtsabuatambá ora, chentše básefta fariseunga y ley abuatambayenga imojtsetbiámána, Galileoca nyetsca pueblënguentsana áshjajnënga, Judeoquënga y Jerusaleñoquënga. Y chora Jesús šoquënga yojtsashnaye, Bëngbe Bëtsabe obenánaca. 18 Chora tojanopasá, básefta boyabásenga canye šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye, 19 pero jamashjnama ndoñe tmonjanobená, tša entsanga causa. Chcasna, gradasësënguëjana chë yebnentša tsbanánoye tmojánasëngo y batsá tejëshe tmojtsanjuaná. Chorna, chë atëfjnëjana chë šocá tjuashiñe tmojanéstjango, entsangbe tsëntsaca, Jesusbe nat-sanoica. 20 Jesús tojáninye cha chë šocá jáshnama bëtsoyënama chënga puerte imojtsošbuáchema. As, chë jama ndobenábioye tbojanianyana: “Bacó, acbe bacna soyënga tcbontseboperdoná ca.”

21 Chora chë ley abuatambayenga y chë fariseunga mëntšá tmojanontšë juabnayana: “Quem boyabása ndoñe tšabá Bëngbe Bëtsabiamá quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inya japerdónana; nyë Bëngbe Bëtsá aíñe ca.”

22 Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tšëngaftangbe ainaniñe chca šmojtsejuabná? 23 ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? 24 Y chca, morna atše cbochanjínyanýiye, chë Bëngbe Bëtsá Entšá

tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojaniyana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

²⁵ Cachora chë jama ndobená tojtantsbaná entšangbe delante, chë cha inajájona tjuashe yojescñe y Bëngbe Bëtsábioye atschuanaye chentšana yojtsatoñe. ²⁶ Chama nyetsca entšanga imojénjnayaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinje ca.”

*Jesús, Levíbioye tbojanchembo chabuastama
(Mt 9.9-13; Mc 2.13-17)*

²⁷ Chca yojochnëngüentšana, Jesús chentšana tojëftsanbocna y canje entšábioye tojáninje, Leví ca uabainá, chë entšángbioye impuesto Romocama atjanayentše inétsotbemañe. Chora Jesús tbojaniyana: “Smasto ca.”

²⁸ Y Leví lempe tojésanboshjona, tojantsbaná y Jesús tbojanasto.

²⁹ Chentšana, Levina bëts fiesta chabe yebnentše Jesusbiana yojama. Y chë fiestentše imojtsemna banga impuesto atjanayënga; y inje entšángnaca mesëshentše imojtsetbiámana.

³⁰ Chora, chë fariseunga y chë ley abuátambayënga tmojanontsé chë Jesusbe uatsjëndayëngbiana podesca oyebuambnayana; y chëngbioye mëntšá tmojanéyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojtsesá y šmojtsofsëšná ca?

³¹ Y Jesús tojanějua: —Salud bomnënga ashnayá ndoñe ntsëjabótana, pero šoquëngna aíñe. ³² Y atše ndoñe chiyátabo chë Bëngbe Bëtsabe bominyiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama

(Mt 9.14-17; Mc 2.18-22)

³³ Chora chënga Jesúsbioye tmojanianyana: — Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nyë nyëts tempo jesosañana y jesofšëšnañana ca.

³⁴⁻³⁵ Chora Jesús tojanějua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentsana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanějua.

³⁶ Jesús mëntsánaca tojanacuntá jabuátambama: “Ndocná queonýbatatëtše basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtše entšējua chë tanguájuañe ndoñe tšabá ntsinýnana.

³⁷ Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana; y chca, chë vínoye y chë jasabenga tondayama ntjatoservénana. ³⁸ Chíyeca co, chë tojtseshayana vínoyna tsëm jasabenguiñe juaftsuámana. ³⁹ Ndocná, chë bóchena vínoye tojatëmo y chentšana játsbošana chë tojtseshayana vínoye jatofšiyana; cha jayanana: ‘Chë bóchena vínoye tša tšabeye ca’.”

6

Jesube uatsjéndayënga ochnayté trigo tmojanátabebe

(Mt 12.1-8; Mc 2.23-28)

¹ Canye ochnayté, Jesús canye jajajana yojtsaye; chabe uatsjéndayënga trigo imojtsaiuatabnaye, imojtsaiúshenëcaye, y imojtsaiuasaye. ² Chë causa, básefta fariseunga tmojanatjaye: — ¿Ndáyeca šmojtsama chë ochnayté jamama ndoñe quenátslesenciana soye ca?

³ Y Jesús tojanëjua: —¿Ndoñe šmëndualía y šmondëtatšëmbo, ntšamo rey David y chabe enutënga tmojanmama shëntseca imojtsemna ora y jasama yojtsëjaboto ora? ⁴ Chca orna, David Bëngbe Bëtsabe bëts yebnentše yojámashëngo y chë Bëngbe Bëtsá chentše yojamnama inýinýnaye tandëšënga yojase, y chë cháftaca imojánajna entšángnaca yojátšataye. Y chë tandëšna nýe bachnanga belesenciana jasama. Masque David chca yojama, Bëngbe Bëtsá chora ndoñe

tonjánayana David canÿe bacna soye tojanma ca —Jesús tojanëjua.

⁵ Y Jesús más tojanëyana: “Chë Bëngbe Bëtsá Entsó tbojanbemá, chë entsá ochnayté tojtsama sóynaca jtsemándayana ca.”

*Chë buashana cucuatşe bomna entsá
(Mt 12.9-14; Mc 3.1-6)*

⁶ Inÿe ochnayté, chë judiëngbe enefjuana yebnoye Jesús tojánamashëngo y tojanontsé jabuátambana. Y chentşe yojtsemna canÿe entsá, catşbioica cucuatşe buashanëtşe bomná; ⁷ y chë ley abuátambayënga y fariseunga chiñe imojtserrondana jinÿama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana. ⁸ Pero Jesús chëngbe juabna yojtsetátşëmbo; asna chë buashana cucuatşe bomna boyabásabioye tbojaniyana: “¡Motsbaná y chentşe tsëntsaca motsa ca!” Y chë entsá yojotsbaná y entsangbe tsëntsaca yojotsaye. ⁹ Chora Jesús chë ínÿengbioye tojanëyana: “¿Ndayá yojtselesenciana ochnayté jamana, canÿe tşabe soye o canÿe ndoñe tşabe soye? ¿Jatsbocana o jtsepochócana ca?”

¹⁰ Y nÿetscanga chabe chabuajana imojtsemnënga tojanëñÿanÿé, y chë buashana cucuatşe bomnábioye tbojaniyana: “Macuenÿanëjaná ca.” Y chë boyabása tojanacuenÿanëjaná, y tşabá chëtşa yojtsatamna. ¹¹ Pero chë ínÿengna puerte tmojanotjayaná, y tmojanontsé enatsëtsnayana ndayá muanjobenaye Jesusbe contra jamana ca.

Jesús chë bnětsana uta uatsjėndayėnga tojanabacacá

(Mt 10.1-4; Mc 3.13-19)

¹² Chë tempo, Jesús tjoye tojána Bėngbe Bětsáftaca jencuéntama; y nĳets ibeta cháftaca tbojanencuentá. ¹³ Tojanbinĳna ora, chabe ústonėnga tojánachembo, y chėnguentšana tojanėbuáyana bnětsana uta uatsjėndayėnga, chë ndėmuanĳyenga “chabe ichmónėnga cánaca” tojanėbobaye. ¹⁴ Chėnga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, ¹⁵ Mateo y Tomás, Santiago, Alfeobe uaquińá; Simón, chë celote ca uabobainá; ¹⁶ Judas, Santiagbe uaquińá; y Judas Iscariote, chë más chcoye, Jesús uayayėngbe cucuatšinė bochjanboshjoná.

Jesús ba entšanga yojanabuatambá y yojánashnaye

(Mt 4.23-25)

¹⁷ Chentšana, Jesús chėngaftaca chë tjocana tojtantsmá y canĳe jachańe tojanoquedá ba chabe ustonėngaftaca y ba inĳe entšangaftaca. Ba entšanga choye tmojánabo Judeocana, Jerusalenocana y Tiro y Sidón, chë mar bėjaye béconana pueblėnguentšana, Jesúsbioye oído jabuájua y chėngbe šocanėngama chauashnama. ¹⁸ Y chábeyeca chë bacna bayėjbe juabna uambayėnga tšabá imojtsatsmėna. ¹⁹ Nĳetsca entšanga tša imojtseboše y ndayánaca imojtsama Jesús jabojuama, er chábentšana běts obenana yojtsóbocana y nĳetscanga yojtsashnaye.

Chë ndegombre oyejuayana bomnënga y ndëmuanyëngbiama tša lastema yochtsemna (Mt 5.1-12)

²⁰ Jesús chabe uatsjédayëngbioye tojanontješé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

²¹ “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

²² “Puerte oyejuayënga šmochtsemna, entsanga chacmojtsébuayënja ora, chacmojtsatébuacana ora, chacmojtsëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bétsemnama.

²³ Chë te puerte šmochjóyejuaye, er celoca canye bëts uacanána šmochántsebomna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

²⁴ “Pero ¡tša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

²⁵ “¡Tša lastema tšëngaftanga chë mora shachanëngbiama, er shëntsana šmochántsebomna ca!

“¡Tša lastema tšëngaftanga chë mora oyejuayëngbiama, er ngménama šmochanjenóbošachna ca!

²⁶ “¡Tša lastema tšëngaftangbiama nyetsca entsanga tšabá chamojtsoyebuambná ora;

er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” –Jesús tojanéyana.

Chë uayayëngbiana bonshánana jtsebomnana
(Mt 5.38-48; 7.12)

²⁷ “Pero tšëngaftanga, átšbioye ouenanënga chëyana: Tšëngaftangbe uayayënga šmochtsababuánjëshana; chë tcmojtsëbuayënjëngbiana tšabe soyënga šmochtsama; ²⁸ chë tšëngaftangbiana bacna soyënga bošëngbiana, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana. ²⁹ Nderado ndánaca cányoica tcmojajuebjantsetase, cochjomiye chë ínyoica cachcá chacmomama; nderado ndánaca quëfsaíya tcmojuábocana, cachcá cochjonýaye acbe shabuanguanéjuanaca chauetsácñama. ³⁰ Ndánaca chacmojtjañábioyna, jatsetayana; y nda ndayánaca chacmojefcábioyna, ndoñe catjontšínýena chacmatoyema. ³¹ Inýëngaftaca šmochtsama, ntšamo chë ínýënga tšëngaftangaftaca chamotsamama šmojtsebošcá.

³² “Tšëngaftanga, nýe chë tcmojtsababuánjëshanënga šmojtšababuánjëshanëse, ¿ndaye tšabe soye chca šmattsama?; er chë bacna entšángnaca chca mondbétsama. ³³ O nderado, nýe chë tšëngaftangbiana tšabe soyënga tmojtšamëngbiana tšabe soyënga šmojtšamëse, ¿ndaye tšabe soye chca šmattsama?; er bacna entšángnaca chca mondbétsama. ³⁴ O nýe chë cmochtëchenanguama šmojtsejuabnángbioye

šmojúyentsámëse, ¿ndaye tšabe soye chca šmattsama?; er chë bacna entsángnaca mondbetsenántšamiana, chëngbentsana cachcá jtóyëngacñama jtsobátmanëse. ³⁵ Pero tšëngaftangna cmontsamna chë uayayënga jtsababuánÿeshanana; y tšabe soyënga chëngbiamna jtsamana y júyentsámiana, chëngbentsana ndayánaca jtóyëngacñama ntjatobatmancá. Chca, tšëngaftanga uacanáana cuenta canÿe bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayëngaftaca y bacna entsangaftácnaca tšabia comna. ³⁶ Inÿengbiamna lastemadënga šmochtsemna, ntšamo tšëngaftangbe Taitá yomncá ca” —Jesús tojánayana.

Ndoñe ntsichámuana chë ínÿenga tšabá o ndoñe tšabá tmonjamama

(Mt 7.1-5)

³⁷ “Ndocá ínÿengbiamna šmattsichamo chë ndoñe tšabá tmontsamama, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inÿengbiamna ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inÿenga šmochjáperdonaye y Bëngbe Bëtsá cmochanjáperdonaye. ³⁸ Inÿengbioye šmochjatšataye y Bëngbe Bëtsá cmochántatšataye. Mo nda canÿe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatšataye. Ntšamo tšëngaftanga ínÿengbioye chašmojábiama, uabouana o ndoñe jabuache soyënga, Bëngbe Bëtsá cachcá

tšëngaftangbioye cmochanjábiamá ca” —Jesús tojánayana.

39 Jesús quem cuétnaca tojánayana jabuátambama: “¿Canÿe jtaná nantsobena inÿe jtaná jtsanachayama? ¿Chca ndoñe nÿets útata ndaye tbuabentše buanjótsatše? 40 Chë uatsjendayá ndoñe ntsemnana chë buatëmbayabiamá más bëtsá. Pero chabe uatsjéndayana chaojapochocá ora, cach buatëmbayacá jtsemnana.

41-42 “Canÿa chabe bominiÿiñe canÿe niñëfja tojtsebomnëse, cha ndoñe ntsoebenana chabe catšátbioye jauyanana: ‘Acbe bominiÿentšana canÿe polvështema jtsebuchjátsëcama šmolesenciá ca’. Natsana cha bontsemna cachabe bominiÿentšana chë niñëfja jtšenobuchjátsëcana, tšabá jinÿyama jobenayama, chabe catšatbe bominiÿentšana chë polvotema jtsebuchjátsëcama. ¡Cachcá entsemna acbiamá, bacna entšá chë ntšamo ndegombre tcojuabnacá ndinÿinÿnayá! Chë tša bacna soye cojtsama ca acbe catšátbioye tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngmënaca jshatenójuaboyana y chca amana jshétsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmënama,
jtsotatsëmbuana ntšamo tojashajoncá
(Mt 7.17-20; 12.34-35)*

⁴³ “Ndoñe queonybatsmëna, chë canye tšabe betiyiñe podessa soye jashájonana; ni canye ndoñe tšabe betiyiñe tšabe soye jashájonana. ⁴⁴ Betiyënga jtsabuatmana ntšamo cada betiye tojtseshajcá. Uchmašëshentsana quenátopodena higuëbé jocñana; ni uvašëša, shëshëntša betiyentšana. ⁴⁵ Chë tšabe entšana, chabe ainanoca tšabe juabnënga bomnentsana jtsóyebuambnayana; y chë bacna entšana, chabe ainanoca ndoñe tšabe juabnënga bomnentsana jtsóyebuambnayana. Er ndayá becá ainanoca tomnama entšá jtsóyebuambnayana ca” —Jesús tojánayana.

Chë uta ucuatjoniñe
(Mt 7.24-27)

⁴⁶ “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana? ⁴⁷ Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: ⁴⁸ Cha endmëna mo canye entšacá, nda canye yebna jajebuamna becá fshantse jashenoye yojajutjo y ndëtšbenguiñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtšbenguiñe jabuache yojaúcuatjona. ⁴⁹ Pero nda atšbe palabra tojouena y ntšamo stsichamcá ndoñe tontsama, endmëna mo canye entšacá, nda canye yebna yojajebo nye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

7

*Jesús canye Romano soldadëngbe amëndayabe
bochichnayábioye tbojanshná
(Mt 8.5-13)*

¹ Entšángbioye chca jáuyanana tojanpochocá ora, Jesús Capernaum puebloye tojána. ² Chentše yojoyena canye romano soldadëngbe amëndayá. Cha ibnabomna canye bochichnayá puerta bonshaná, y chora cha šocá yojtsemna, ya jtsóbanama. ³ Jesús ba šoquëngbioye yojáshnama encuëntayana chë amëndayá yojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. ⁴ Chënga Jesúsbioye tmojánashjango y tša imojtseimpadana, mëntšá: “Quem soldadëngbe amëndayá merecido entsebuájona chacotsájabuachama; ⁵ er cha bëngbe luarentša entšángbioye corente endábabuanyëshana, y cachá chë bëngbe enefjuana posada šonjayentšjebo ca.”

⁶ Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinyenana átšbioye jabama. Atše merecido taitsatobuajoñe aca atšbe yebnoye chacuamashënguama; ⁷ chíyeca ni mo añemo chiyatentšetá jama aca jajébenguama. Morna nye cochjayana y atšbe bochichnayá tšabá echántsmëna. ⁸ Er atše sëndábamna átšbioye mándayënga y átšnaca soldadëngbe amëndayá sëndmëna. Atše canye soldádbioye stjauyana

‘motsa ca’, cha cachora jana; y ínÿabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

⁹ Jesús chca tojanuena ora, chë mándayabiamama yojenjnaná, y jobuértanëse chë ba entšanga cha us-tonëngbioye tojanëyana: “Ndegombre cbëyana, ni mo nÿets Israelentšë, ni canÿa quem boy-abasacá tša ošbuachiyá chiyátinÿena ca.”

¹⁰ Y chë ichmónënga yebnoye tmojtaná orna, tmojáninÿena chë bochichnayá ya tšabá yojtsatsmëna.

Jesús tojanma canÿe viudabe uaquiñá cháuatayenama

¹¹ Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjéndayënga y ba entšanga imojtsaye.

¹² Chë pueblo amashjuanoye yojtsebeconá orna, entšanga chë pueblentšana canÿe obaná imojtsábocana jauátbontsama; chë obaná canÿe viudabe uaquiñá inamna y nÿe cha uaquiñá. Bëts cá entšanga chë obanabe mamá imojtsetjëmbambnaye. ¹³ Bëngbe Utabná chë viudábioye tbojáninÿe ora, chabiamama tbojanongmé y tbojaníyana: “Ndoñe matošachena ca.”

¹⁴ Y jobéconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojaníyana: “Bobontse, atšë cbëyana: ¡Matëtsbaná ca!”

¹⁵ Chora chë obaná tojtantsbaná y tojanontšë oyebuambnayana; y chabe mamábioye Jesús

chë bobontse tbojtanánatse. ¹⁶ Njetsca entšanga tša uatjana yojubuache chca tmojáninýe ora, y Bëngbe Bëtsá imojtsatschuanaye, mëntšá jayanëse: “Bëngbentše canýe Bëngbe Bëtsabe juabna oyebuambnaya cuatënjonýná ca.” Y mëntšánaca: “Bëngbe Bëtsá tojabo chabe entšanga jabújabuachama ca.”

¹⁷ Y njets Judea luarëjana y chë chábuañe luarenache entšanga imojátatšëmbona ndayá Jesús tojanmama.

Juan chë Ubayanabe ichmónënga
(Mt 11.2-19)

¹⁸ Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentšana útata tojánachembo, ¹⁹ y Jesúsbioye yojichamuá jatjayama cha tajojamna chë Cristo, chë jabama ibojanmëná, chë Uámana Uabuayaná, o ínýabiama jatobátmama tajojétsamna ca. ²⁰ As chë Juanbe ichmónënga Jesúsbioye tmojanobeconá y tmojaniyana: –Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínýabiama jatobátmama ca.

²¹ Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinýna. ²² Chora Jesús mëntšá tojanëjua: –Motsata y Juánbioye šochjauyana ntšamo šojinýe y šojouencá: Chë jtanënga tšabá entsatëbinýna, chë coshetënga tšabá montsatana, chë

bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjémëngbioye chë tšabe noticiënga montsabuayiyná. ²³ ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

²⁴ Chë Juanbe ichmónata chentšana tbojésanbocentšana, Jesús tojanontšé Juanbiam entšanga jáuyanana, mëntšá: “Juan jinÿama šmojánbocna ora, ¿ndayá jinÿama šmojánbocana entšanga ndoyena luaroye? ¿Canÿe entšá ainaniñe tondaye añemo ndbomná, mo canÿe šëše bínÿiaca shatiyeynëscá? ²⁵ Y ndoñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondétatsëmbo chë uámana entšayaca bopormánënga y chë bëtská bomnánaca nÿe tondayama ntsecochinÿencá vida bomnëngna, reyëngbe yebnënguiñe mondbétsiyenama. ²⁶ Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna oyebuambnayá? Ndegombre; y cbëyana, canÿa Bëngbe Bëtsabe juabna oyebuambnayabiam más bëtsá. ²⁷ Cha, Juan, endmëna ndabiam Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiam
chaóyebuambama,

entšanga jábuayenama aca jabama ainaniñe tšabe
juabnëngaca chamotseprontánama ca.

²⁸ Ndegombre cbëyana: Nÿets tempo entšángbeñe,

ndocná quenátsmēna Juan chē Ubayanabiamā más bētsá; masque chca, Bēngbe Bētsabe amēndayoca chē más batśá uamaná, cha más bētsá echántsemna ntśamo mora Juan yomnama ca” —Jesús tojánayana.

²⁹ “N̄yetsca entśanga chca Juánbioye tmojanóyeunanga y chē Romocama entśángbioye impuesto atjanayēgnaca, n̄yets ainánaca tmojánayana Bēngbe Bētsá n̄yetsca soyēnguiñe tśabá amá yomna ca; er tmojánenabaye ntśamo jubáyama Juan yojanamancá. ³⁰ Pero chē fariseunga y ley abuatambayēnga, ntśamo jubáyama Juan yojanamancá jóyēngacñama ndoñe tmonjánbošena ora, tmojtsanaboté ndayá Bēngbe Bētsá chēngbiamā jamama yojanjuabnacá.”

³¹ Jesús mēntśánaca tojánayana: “Cbochanjáuyana ndayacá morsca entśanga imomna, y ndayēngcá chēnga imomna. ³² Chēnga mondmēna mo chē plazēngoca mondbetsetbiámāna basetemēngcá; chēngna mēntśá jabuache jtseñatsayana: ‘Tśēngaftangbiamā fsēnjaflautá y ndoñe chešmatlantśá; ngmēnaca fsēnjaversiá y ndoñe chešmatenóbošachna ca.’ ³³ Juan chē Ubayaná tonjánabo y ndoñe quenjatamana bētscá entśángbeñe jtsemnana, ni tandēse jasana, ni vínoye jofšiyana; y tśēngaftanga šmontsichamo chana bacna bayējbe juabna uambayá inamna ca. ³⁴ Morna, chē Bēngbe Bētsá Entśá tbojanbemá tonjabo y chana aíñe entsamana bētscá entśángbeñe jtseyayana y jtsofšēšnayana, y tśēngaftanga chabiamā šmontsichamo: ‘Chana yapa uasayá y vínoye tmoyá entsemna y

Romocama entšángbioye impuesto atjanayënga y bacna soyënga amëngbe amigo ca'. ³⁵ Pero Bëngbe Bëtsá endbëtsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca" –cha tojánayana.

Jesús, chë fariseo Simonbe yebnentše

³⁶ Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema. ³⁷ Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatšëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtše béjayeca. ³⁸ Jesusbe shecuatšentše yojoshëntsamentšiyë, šachénaca; shëchbuíyeca chabe shecuatšënga yojtsefchecuaená y cachabe stjënashaca ibojtsatsshéchojuaye. Chabe shecuatšënga yojtonguëtsëntšiyë y chë botamana uanguëtše béjaye ibojtashecbuëscacja. ³⁹ Chë fariseo Jesúsbioye ofjaná chca tojáninÿe ora, mëntšá Jesusbiamá yojtsejuabnaye: "Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca." ⁴⁰ As Jesús chë fariséobioye tbojaniyana: –Simón, cuentado palabra šmotsoyeuná ca.

Y chë fariseo tbojanjuá: –Arseñor, Buatëmbayá ca.

41 Y Jesús tojánayana: —Canÿe entśá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnétsana. 42 Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojaniyana: —Mora šmëyana, ¿chë útatentšana nda más chë uyentšamianábioye buantsebobonshana ca?

43 Y Simón tbojanjuá: —Atše šontsinÿana chë más bëtscá ndebená ca.

Y Jesús tbojaniyana: —Ndegombre, ntšamo endmëncá tcjyana ca.

44 Jesús, chë shembásabioye jontješiyëse, Simónbioye tbojaniyana: —Minÿe quem shembása. Atše acbe yebnoye sënjámashëngo y aca búyeshe ndoñe chešcatabuatsëtá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecojó. 45 Ndoñe chešcatámocho, pero cha tonjámashëngo orscana ndoñe ntjájbanana atšbe shecuatšënga onguëtsëntšnaye.

46 “Aca bestšašinë aceitiye ndoñe chešcatsbuešcja, y chana aíñe botamana uanguëtše béjaye šonjashecbuešcja. 47 Chcasna atše cbëyana, cha šonjinÿanÿé atšbiamana corente bonshánana yojtsebomna, er atše chabe bëtscá bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

48 Y chora Jesús chë shembásabioye tbojanianya: “Ache bacna soyëngama perdonaná contsemna ca.”

49 Chora chë ófjanënga chentše innatbiámanëngna tmojanontsé enatsëtsnayana: “¿Nda quem entsá yojtsemna, chë bacna soyëngámna entšángbioye jtsaperdónayana ca?”

50 Y Jesús más chë shembásabioye tbojanianya: “Aca átsbeñe icošbuachéyeca, atsbocaná cochántsemna; natjëmbana motsatoñe ca.”

8

Chë Jesúsbioye imojanájabuachana shembásenga

1 Chca tojanopasá chentšana, Jesús bëts y base pueblënguëjana yojánana, tšabe noticiënga Bëngbe Bëtsabe amëndayama entsanga abuatambaye y abuyaiynaye. Chë bnëtsana uta uatsjëndayëngna cháftaca imojtsajna. 2 Básefta shembásengnaca imojtsetjëmbambnaye; chëngbentsana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿsëfta bacna bayëjënga tojtanëbuacna; 3 Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

Chë jenabe cuento

(Mt 13.1-9; Mc 4.1-9)

4 Ba pueblënguentsana mallajta entsanga tmojánbocana Jesús jinÿama. Ba entsanga jounama tmojanobeconá ora, Jesús mëntsá

tojanacuntá: ⁵ “Canÿe, canÿe jená jénaye jaujquëshama yojéftsebocna. Yojsëjquëshaye orna, básefta jénaye benache juachañe yojuatquécjana; chiñna entsanga imojtsebotájaye, y jaja shloftšënga imojástjajna y imojtsósañe. ⁶ Inÿe meshëngna ndëtsbenguiñe yojuatquécjana. Yojuábocna orna, betscó yojsábojo, chë fshantsiñe ndoñe yapa búyeshe yonjamna causa. ⁷ Inÿe meshëngna uchmëshangañe yojuatquécjana y chë uchmëshangá lempe yojsatscué, chë jénayeca cánÿiñe yojuábocna ora. ⁸ Inÿe meshëngna, uanguaniñe yojuatquécjana. Yojuájua orna, bëtscá yojuashájona; canÿe jénayentsana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye
(Mt 13.10-17; Mc 4.10-12)*

⁹ As chora chabe uatsjëndayënga tmojantjá: — ¿Ntšamo chë cuento yojsayana ca?

¹⁰ Y Jesús tojanéyana: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioyna ndoñe; chë soyëngama chënga lempe cuentëngaca sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá quem soyënga chamouena, ndoñe queochátësertana ca.

*Jesús chë jenabe cuentama tojanabuayená
(Mt 13.18-23; Mc 4.13-20)*

11 “Chë cuento mëntsá endayana: Chë jénaye Bëngbe Bëtsabe palabra entsemna. 12 Chë benache juachañe yojuatquécjana básefta jénaye endayana chë básefta entsanga Bëngbe Bëtsabiana soyënga tmojouenënga; pero chora Satanás betscó jabana chënga Bëngbe Bëtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentsana ndatsebácanënga chamotsemnama. 13 Inye entsanga mondmëna mo chë ndëtšbenguiñe yojuatquécjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nyets tempo chana jocochájuana; y chca, ndoñe bayté Bëngbe Bëtsáftaca ntjëtsemnëngana, cha ndoñe yapa tmontsašbuaché causa. Inyënga mochantsébuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye. 14 Inye entsanga mondmëna mo chë uchmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebomnana yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnétjomba y ndoñe quemochátama ntšamo Bëngbe Bëtsá tojayancá. 15 Inye entsangna mondmëna mo chë uanguaníñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama

jtseprontánëngana. Mo canÿe betiye puerte tšabá tojtseshajuancá, chënga bëts cá tšabe soyënga Bëngbe Bëtsabiama mochántsama. Chca mochántsama, Bëngbe Bëtsábeñe jtsošbuáchiyëse y nÿetsca soyënguiñe puerte uantadënga jtsemnëse ca” —Jesús tojanabuayená.

Chë uajuinÿanëshama cuento

(Mc 4.21-25)

¹⁶ “Ndocná canÿe uajuinÿanëshama juajuinÿenana, chentšana ndaye sóyeca chësha jtsëstama o jutsnëshama tajsoye jtsajájuama; juajuinÿenana ndayá tsbanánoca juajájuama, chë luarentše amashjuanëngbiama chaotsebínÿnama. ¹⁷ Er ndocna yoiytëmena soye, ntjinÿcá queochaisoquéda, y chë entsangbiama ndótatsëmbo soye, ntsotatsëmbcá queochaisoquéda.

¹⁸ “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nÿe batšá ibosertana soyëngama bochántsebnatjëmba ca” —Jesús tojánayana.

Chë Jesusbe ndegombre pamíllanguentsënga

(Mt 12.46-50; Mc 3.31-35)

¹⁹ Chora, chabe mamá y chabe catšátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entsanga causa. ²⁰ As canÿa Jesúsbioye mëntšá tbojanianyana: —Acbe mamá y acbe catšátanga shjoca montsemna y montseboše aca jinÿama ca.

²¹ As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá

tmojtsamënga jtsemnana atšbe mamá y atšbe catsátanga, atšbe ndegombre pamíllanguentsënga ca.

Jesús chë binÿia y chë béjaye bonguana yojëtsbema

(Mt 8.23-27; Mc 4.35-41)

²² Canÿe te, Jesús chabe uatsjëndayëngaftaca canÿe barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána; ²³ y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binÿia yojóshjango y yojontsé béjaye chë barquëshoye jtsobuajútjiana. Y chca, chëngbiana puerta resjo yojtsemna. ²⁴ Chora chë uatsjëndayënga tmojána Jesús jetsefšenama y mëntšá tmojaniana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana šochtsemna ca.” Y chë binÿiayana tojanëjbana y lempe bonguana yojtsatsmëna.

²⁵ Chentsana Jesús chabe uatsjëndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntšá imojtsenatsësnaye: —¿Nda quem boyabása yomna? ¡Cha tojamandá ora, masque chë binÿia y chë béjaynaca joyeunayana ca!

Chë Gerasa luaroca bacna bayëja uambayá

(Mc 8.28-34; Mc 5.1-20)

26 Chentšana Gerasa ca uabaina luaroye tmojánashajna, Galilea ndirichiñe. 27 Jesús fshantsoye tojánastjango ora, chë pueblocana canÿe entšá chábioye tojánabo. Cha ya bayté bayëjbe juabna yojtsebomna, ndocna entšayá yonjanichëtjona; y yebniñe ndoñe yonjanियena, sinó obanëngbe cuevëshënguenache. 28 Chë entšá, Jesúsbioye tbojáninÿe ora, chabe natsanoica yojoshëntsamentšiye y mëntšá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

29 Chca tbojaniyana, er Jesús tojanmandá chë bacna bayëjbe juabna chábentšana chauesebocnama. Ba soye chë bayëja yojánama chë entšá ndoñe tšabá chaotsemnama. Chë entšanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entšanga ndoyena luarëngoye yojánachana. 30 Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna. 31 Y chë bayëjënga Jesús tmojanimpadá, chë corente uabouana tboye ndoñe chaondíchamuama. 32 Chentša béconana ba cotšënga imnajena, tjoca imnétsosañe; as chë bayëjënga Jesús tmojanimpadá chë cotšëngbeñe jamashjna chaualesenciama, y Jesús aiñe chca tojanalesenciá. 33 As chë bayëjënga chë entšábentšana tmojésanbocana y chë cotšëngbeñe tmojánamashjna; y chentšana,

chë cotšënga batsjocana peñëšëjana uafjajónayoye imojtsoshbuetše y vojtsatajo.

³⁴ Chë cotšënga anÿenënga chca yojopásama tmojáninÿe ora, chentšana tmojtsanacheta y tmojána chë soye jacuéntama chë puebloca y chiñe luarenache. ³⁵ Entšanga tmojánbocana ndayá tojanopasacá jinÿama, y Jesús yojtsemnoye tmojánashjajna ora, tmojáninÿe chë entšá chë ndábentšana bayëjënga tmojtanbocna, Jesusbe shecuatšentše yojtsótbemañe, entšayá uichëtjoná y chabe nÿets juábnaca. Y chë entšanga chama corente imojouatjaná. ³⁶ Ntšamo yojopasacá tmojáninÿëngna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënana. ³⁷ Chentšana, nÿetscanga chë Gerasa luarentše oyenënga Jesúsbioye imojtseimpadana chë luarentšana ínÿoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. ³⁸ Chë entšá chë ndábentšana bacna bayëjënga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojaniyana: ³⁹ “Acbe yebnoye motsatoñe y cochjácuntaye lempe ntšamo Bëngbe Bëtsá acbiama tojamcá ca.”

Chentšana chë boyabása yojtsatoñe, y nÿets pueblëjana tojanacuntá ntšamo Jesús chabiamá tojanmcá

Jesús canÿe shembásabioye tbojanshná y tojanma

*Jairëbe bembetema cháuatayenama**(Mt 9.18-26; Mc 5.21-43)*

⁴⁰ Jesús chë uafjajónaye chenguánoica tojtánashjango ora, nÿetsca entsanga oyejuayënga tmojtánofja, er nÿetscanga chabiamá imojánobátmana. ⁴¹ Chora tojánashjango canÿe entsá, Jairo ca uabainá. Cha inamna chë pueblentse chë judiëngbe enefjuana yebnentša mandayá. Jesusbe shecuatsëntse yojoshëntsamentsiye y ibojtseimpadana chabe yebnoye cháuama; ⁴² er chë nÿe canÿe bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entsanga chábioye imojtsojuatsëntšenaye. ⁴³ Chë entsanguentse yojtsaye canÿe shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayinë yojtsepochóca, y ndocná yonjobenaye cha jáshnana. ⁴⁴ Chë shembásana stëtšoicana Jesúsbioye yojobeconá y chabe entsayá sibuájua tojanábojajo. Y cachora chë oboftjajuanana ibojtsobojuána. ⁴⁵ Chora Jesús tojanatjá: —¿Nda šjabojajo ca?

Nÿetscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

⁴⁶ Pero Jesús cachiñe tojánayana: —Pronto nda šojábojajo, er atše sënjasenté obenana átšbentšana jóbocnana, mo nda stjashna orcá ca.

⁴⁷ Chë shembása tojáninÿe Jesús yojtsetátšëmbo cha tbojánbojajuama. As chora, ngmëmnyá tojána

y Jesusbe shecuatšentše yojoshëntsamentšiyey; y nyetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. ⁴⁸ Chora Jesús tbojaniyana: — Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

⁴⁹ Jesús cabá yojtsóyebuambnantscuana, chë judiëngbe enefjuana yebnentša mandayábiocana canya tojánashjango, y chë mandayábioye tbojaniyana: —Acbe bembe ya tontsóbana; ndoñe más chë Buatëmbayábioye matébëyabomana ca.

⁵⁰ Pero Jesús chë soye tojanuena; as chë mandayábioye tbojaniyana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echantsatsmëna ca.

⁵¹ Chë yebnoye tmojánashjajna ora, Jesús ndoñe tonjanalesenciá banga choye jamashjnama, nye Pedro, Juan y Santiago y chë shembásetembe bëtsëtsatna aiñe. ⁵² Nyetscanga imojtsenóbošachiye y ngménaca imojtsóyebuambnaye, pero Jesús tojanëyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

⁵³ Chë entšanga Jesúsbioye nye imojtsáfchaye, er chënga imojtsetátšëmbo chë shembásetema obaná yojëtsemnama. ⁵⁴ Chora Jesús chábioye tbojanábuacueshache y jabuache tbojaniyana: “¡Shembásetema, matëtsbaná ca!”

⁵⁵ Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. ⁵⁶ Chë shembásetembe bëtsëtsata puerte ojnánánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

9

Jesús, chabe uatsjéndayënga tojanichamó, Bëngbe Bëtsabe amëndayama jábuayenama
(Mt 10.5-15; Mc 6.7-13)

¹ Chentšana, Jesús chabe bnétsana uta uatsjéndayënga tojánachembo, y mando y obenana tojanatšatá bacna bayëjënga entsángbentsana jtëbuacanama y šocanëngama jashnayama. ² Tojanichamó Bëngbe Bëtsabe amëndayama jábuayenama y entsángbioye jashnayama. ³ Y mëntšá tojanëyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inýe entsëjua jenotrócama cach ndoñe. ⁴ Canýe yebnentše posada chacmojúyentsame ora, chentše šmochjoquéda inýe puebløye játantscuana. ⁵ Nderado ndayentše posada ndoñe chacmonjuyentsame, chentšana šmochjésebocana y shecuatšentša polvëshe šmochjésenstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca” —Jesús tojanabuayená.

⁶ Asna chë uatsjéndayënga tmojëftsambocana y tmojána, nýetsca chë base pueblotëmënguenache chë tšabe noticiënga abuayiynaye y entsanga šocanëngama áshnaye.

Herodes y Jesús
(Mt 14.1-12; Mc 6.14-29)

⁷ Jesusbiana y ntšamo vojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubyaná obanënguentšana tojtanyena ca, ⁸ inýënga

imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y ínÿengna canÿa chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanayena ca. ⁹ Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiama chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinÿama.

Jesús shachna uaranga boyabásenga saná tojanacaredadó

(Mt 14.13-21; Mc 6.30-44; Jn 6.1-14)

¹⁰ Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nÿe chënga jëftsëbiatšese ínÿoye tojtsanoñe, Betsaida ca uabaina puebloye.

¹¹ Pero chë entšanga chë soye tmojántatsëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsësnaye, y chë šoquënga imojtsemnëngbioye tojanashná.

¹² Ya jetiñe yojtsobiamná orna, chë bnëtsana uta uatsjëndayënga Jesúsbioye tmojanobeconá y mëntšá tmojanianyana: —Chë entšanga cuantichamuá, jóchnama y saná jonguangoñama chamotsama chë béconana pueblotëmënguenache y luarënguenache; er quem luariñe ndocná quenatiyena ca.

¹³ Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nÿe shachna tandëse y uta beónata fsëntsebomna; nÿetscangbiamama saná jabuámiyama nderado nda tojasna, aíñe cuanjacaredádaye ca.

¹⁴ Er mo shachna uaranga boyabásenga imnamna. Pero Jesusna chabe uatsjéndayënga tojanëyana: —Mamëndá nÿetscanga chamotbiama shachna bnëtsátsanënga ca.

¹⁵ As chënga chca tmojanma y nÿetsca entšanga tmojanotbiama. ¹⁶ Chora, Jesús chë shachna tandëse y chë uta beónata tojanca, y celoye tojanontjese, Bëngbe Bëtsábioye chama tbojtanchuá, tojanjatá y chabe uatsjéndayënga tojanantregá entšangbioye chamuatšatama. ¹⁷ Nÿetsca entšanga tmojanse jtoshachaye nÿetsá, y cabá bnëtsana uta sbarëco tmojanajutjé chë ojamnëtmëngaca.

*Pedro tojánayana, Jesús chë Cristo bëtsemnama
(Mt 16.13-19; Mc 8.27-29)*

¹⁸ Canÿe te, Jesús canÿa Bëngbe Bëtsáftaca ibojtsencuéntaye ora, chabe uatsjéndayënga cháftaca imojtsemna. Chora tojanatjá: —¿Nda atše bëtsemnama entšanga imojtsichamo ca?

¹⁹ Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canÿe Bëngbe Bëtsabe juabna oyebuambnayá tempscá mora tojtayena ca.

²⁰ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

Jesús tojánayana cha ibojamna jóbanana y jtayenana

(Mt 16.20-28; Mc 8.30-9.1)

²¹ Pero Jesús corente chënga tojanamëndá ndocnábeñe chama ntsecuéntayana. ²² Y mëntśá cachabiamna tojánayana: —Chë Bëngbe Bëtsá Entśá tbojanbemá bontsemna puerte jasúfriana, chë judiëngbeñe bëtsëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entśanga mochanjóba, pero unga tianoye cha echántayena ca.

²³ Chentsana nyetsca entśanga tojanëyana: “Nda atśbe uatsjendayá jtsemnana tojtseboşe, cháuyana nyë Bëngbe Bëtsá yobena sempre chabe vidiñe jtsemándayama, chabe quem luarentśa soyënga cachcá chauesonyá atşe juastama, y cada te chaotseprontana átśbeyeca jasúfriama, y cruciñe jobanámnaca. ²⁴ Nda tojtsama quem luarentşe bëtscá soyënga jtsebomnana y atśbiama jasúfriama ndoñe tontseprontana, chë nyetsca tescama yomna tśabe vida echanjobuetşe. Pero nda quem luarentśa soyënga cachcá tojëftsonyá atşe juastama, masque chaóbana, chë nyetsca tescama yomna tśabe vida echántsebomna. ²⁵ Er ¿ndayama entśá buanjoservia nyetsca quem luarentśa soyënga jtsebomnana, cha pochocaná jtsemnana tojtsá y chë nyetsca tescama yomna tśabe vida tojtsoperdese? ²⁶ Er ndëmuanýe entśá, atśbiama o atśbe buayenana soyëngama tojtsëuatja, chë Bëngbe Bëtsá Entśá tbojanbemánaca chabiamna echantsëuatja, cha chabe bëts buashinýinýaniñe

chaojésabo ora, chabe Taitabe bëts obenánaca y chabe angelotémëngaftaca adoraná. ²⁷ Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjëfťsinýcá ca” —cha tojánayana.

Jesús inýetsá tojanobinýná
(Mt 17.1-8; Mc 9.2-8)

²⁸ Mëntsá tojanopasá: Chca palabrënga tojanoyebuambá chentšana posuftaytese, Jesús tojëfťsanëbiatše Pedro, Santiago y Juan, y canýe tjoye tojántsjua, Bëngbe Bëtsáftaca jencuéntama. ²⁹ Bëngbe Bëtsáftaca ibojtsencuéntantscuana, chabe jubiá inýetsá yojťsinýna, y chabe uichëtjonëjuangá tša uafjantsëjuangá yojťsamna y tša yojťsabuashinýinýana. ³⁰ Chora uta boyabásata tbojanonýná, Jesúseftaca ibojtsencuéntaye. Chata ibojamna Moisés y Elías; ³¹ corente buashinýinýaniñe ibojťsemna, y chënga imojťsencuéntaye ntšamo Jesús Jerusalenoca jasúfřiana y jóbanana. ³² Masque Pedro y chabe enutata tša ocnayënga imojťsemna, nýe imojťsefšna y tmojáninýe Jesusbe juachañe tša yojťsebuashinýinýana y chë uta boyabásata cháftaca ibojťsemna. ³³ Chë uta boyabásata Jesús bentsana ibojoluára ora, Pedro, Jesúsbioye tbojanianyana: “Buatëmbayá, řťša řťsabá bëngbiana cuanmëna muentše jťsemnana ca! Mora fchanjapórma unga tambotémënga: cánýetema acbiana, ínýetema Moisesbiana y ínýetemna Elíasbiana ca.”

Pero Pedro ndoñe yontsetátšëmbo ntšamo yojtsichámuama. ³⁴ Y chca yojtsóyebuambnantscuana, canýe jantšetéshe yojóbema, y chëngbioye yojáutsbotse, y chënga chë tsoye imojtsemnama tmojáninýe ora, chë uatsjédayënga chama imojtsauatja. ³⁵ Chora chë jantšetëshoicana canýe oyebuambnayana tojanóbocna, mëntsá: “Mua atšbe Uaquiñá endmëna, atšbe uabuayaná; cha šmochtseyeunana ca.”

³⁶ Chë oyebuambnayana tmojanuenentšana, tmojáninýe Jesús canýa yojtsemna. Chë uatsjédayënga iytëca imojtsemna, y chë tempo ndocnábioye chama imonjuenaye.

Jesús, canýe basa bacna bayëjbe juabna uambayábioye tbojanshná

(Mt 17.14-21; Mc 9.14-29)

³⁷ Yëfsana, chë tjocana tmojtantsmá ora, ba entšanga tmojánbocana Jesús jajébenguama. ³⁸ Chora, chë entšanguentšana canýe boyabása tojanontsé mëntsá uayebuáchana: —Buatëmbayá, Diosmanda atšbe uaquiñá minýe. Nýe cha atšbe uaquiñá endmëna; ³⁹ y mora, bayëjbe juabna chábioye bontsësháchichana, y nýe ndeolpe jóntsana yoyana, ataque joshachana y uayoicana shashiye jtsabocanana. Y chábentšana chë bayëja ndoñe betesco ntjésebocnana, y cuerpiñe corente maltrataná jeseboshjonana. ⁴⁰ Acbe uatsjédayënga sënjaimpadá chë bayëja chábentšana chamuatábocnama, pero ndoñe chematobená ca.

⁴¹ As Jesús tojánayana: —¡Nýetsá ndošbuáchiyënga y bacna entšanga! ¿Buetayté šojtsemna tšëngaftangaftaca jëftsemnana y jtsëuantánana ca?

Chora chë boyabásabioye tbojaninyana: –Moye chë uaquiñá mánatse ca.

⁴² Chë basa yojtsebeconá ora, chë bacna bayëja chábioye tbojanshajayé y inÿe ataque tbojanëshache. Pero Jesús chë bayëjbioye tbojanácacana, chë basetémbioye tbojanshná y chabe taitábioye tbojtantregá. ⁴³ Y nyetscanga puerte ojnánännga imojtsemna, Bëngbe Bëtsá tša obenana bomná inamnana.

Jesús cachiñe tojánayana cha ibojamna jóbanana y jtayenana ca

(Mt 17.22-23; Mc 9.30-32)

Nÿetsca entšanga, ndayá Jesús yojtsamama ojnánännga imojtsemnëntscuana, chabe uatsjédayënga cha tojanéyana: ⁴⁴ “Quem soye tšabá šmochjouena y ndoñe chacmondébnëtjomba: Chë Bëngbe Bëtsá Entšá tbojanbemá entšangbe cucuatšine mochanjáboshjona ca.”

⁴⁵ Pero chënga ndoñe yontsósertana ntšamo Jesús yojtsëtsësnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

¿Nda chë más uamaná yomna?

(Mt 18.1-5; Mc 9.33-37)

⁴⁶ Chë tempo, chë uatsjédayënga tmojanontsé enatsëtsnayana, nda chë más uamaná bétsemnana.

⁴⁷ Jesús yojtsetátšëmbo ntšamo chënga imojtsejuabnayama; asna, canÿe básetema tbojánishache, chabe juachaca tbojántbema, ⁴⁸ y chëngbioye tojanéyana: “Nda átšbeñe ošbuachiyá bétsemnana, quem basetémbioye tbojofja, chana atše jofjana; y nda atše šojofja, chana chë nda šojichmó

chábioynaca jofjana. Chíyeca, tšëngaftanguentše chë más nduamaná, cha chë más uamaná entsemnaca.”

Nda bëngbe contra ndoñe tontsemná, bëngaftaca jtsemnana

(Mc 9.38-40)

⁴⁹ Juan, Jesúsbioye tbojaniana: —Buatëmbayá, bënga fsënjinÿe canÿe boyabása y cha aca jótšëmbonëse, entšángbentsána bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

⁵⁰ As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

Santiago y Juánbioye Jesús tojanëcácana

⁵¹ Jesús celoye jtama yojtsobeco ora, nÿets añémoca cha yojtsejuabnaye Jerusalenoye jama.

⁵² Natsana báseftanga tojanichamó, y chënga tmojána canÿe base pueblotémoye Samaria luaroca, posada chabiana janguangoñama;

⁵³ pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uámana puebloye.

⁵⁴ Chabe uatsjëndayata, Santiago y Juan, chë soye tbojáninÿe ora, Jesús tmojaniana: “Bëngbe Utabná, ¿quectseboše bëndata fchaimandá celocana íñeshe chaótsatše y quem entšanga chaotsapochóca?”

⁵⁵ Pero Jesús yojobuértana y chátbioye tojtsanëcácana, chca juabna bomna causa.

56 Chentšana chënga inÿe pueblotémoye tmojtsanoñe.

Chë Jesús juastama bošënga
(Mt 8.19-22)

57 Benachëjana imojtsajna ora, canÿe boyabása Jesúsbioye tbojaniyana: —Atšbe Utabná, atše sëntseboše aca juastana ndémoye chacojtsá choye ca.

58 Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftšetémëngna uajajonëshangá; pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

59 Jesús inÿe entšábioye tbojaniyana: —Smasto ca.

Pero cha tbojanjuá: —Atšbe Utabná, šmoleseñciá atšbe taitá chjshesabotbontsañe ca.

60 As Jesús tbojaniyana: —Chë Bëngbe Bëtsabiamama mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entšanga cochjabuayená ca.

61 Inÿana Jesúsbioye tbojaniyana: —Atšbe Utabná, atše sëntseboše aca juastama, pero šmoleseñciá natsana atšbe pamíllangbiamama jaisodiósoftama ca.

62 As Jesús tbojaniyana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntososervénana; er cha jtsemnana mo canÿe arayacá, chë tojtsetrabája ora, stëtšoye tojtsaisantješncá ca.

10

Jesús canyësëfta bnëtsana y uta entsanga tojanichamó Bëngbe Bëtsabe soyëngama jábuayenama

¹ Chë soyënga chentsana, Bëngbe Utabná Jesús inye canyësëfta bnëtsana y útatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

² Mëntšá chënga tojanëyana: “Canye bëts jajañe bëtscá játbanama entsemna, pero peonga báseftanga; chíyeca, chentsa nduíñbioye jaimpádana ba peonga chauichamó chë jaja saná játbanama. Cachcá, quem luarentse bëtscá entsanga montsemna Bëngbe Bëtsábioye nduabuátmënga, y chëngbioye chabiana abuayiynayënga nýe báseftanga. Chíyeca, Bëngbe Bëtsá moimpadanga ba abuayiynayënga chauichamó quem entsanga chábioye júbuajama. ³ Motsajna; šmochjinýe, atše tšëngaftanga cbontsichamná mo oveshënga cuenta, tjañe quešëngbeñe. ⁴ Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisenobiamnaye.

⁵ “Ndaye yebnentše chašmojámashjna ora, natsana šmochjayana: ‘Lempe tšabá quem yebnentše chaotsomñe ca’. ⁶ Y chë yebnentše chca juabna bomna entsanga tmomnësna, chë tšabiana ndegombre chentše echántsemna; pero ndóñese, chca tšabiana chentše ndoñe queochátsmëna. ⁷ Canye yebnentše šmochjoquéda, y šmochjase y šmochjofsiye ntšamo chentše chacmojacaredadaycá; er chë trabajayá merecido

jtsebuájonana chca juácanama. Canye pueblentše nye inye y inye yebnënguenache ndoñe matajnana.

⁸ “Ndaye pueblentše chašmojámarshjna y tšabá chacmojúbuajentše, šmochjase ntšamo chentše chacmojacaredadaycá; ⁹ chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’. ¹⁰ Pero canye pueblentše chašmojáshjango y ndoñe chacmonjúbuaja, chentša tsashenangoye šmochjábocana y mëntšá šmochjayana: ¹¹ ‘¡Chë tšëngaftangbe pueblentsa polvëshe, chë bëngbe shecuatsënguiñe tojuanjëshe, camuentše fšcuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetátšëmbo chë Bëngbe Bëtsabe amëndayana tšëngaftangbeñe entsemnama ca.’ ¹² Ndegombre cbëyana, quem luare jopochócama te, chë luarentša entšángbioye Bëngbe Bëtsá puerte jabuache echantsacastígaye, y Sodoma puebloca bacna entšángbioye ndoñe nya nyetsá jabuache ca” —Jesús tojánayana.

Chë nduauenana entsanga

(Mt 11.20-24)

¹³ “¡Tša lastema Corazín puebloca entšangbiamama! ¡Tša lastema Betsaida puebloca entšangbiamama! Er chë muentse Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entsanga ya tempo chëngbe bacna soyëngama ngmënaca matmëntenójuabonga y Bëngbe Bëtsabe benache matmëntishache, y

chca tmojamama chaotsótatsëmbuama, uajojësha entšayangaca matmëntopormanga y jatinÿashiñe matmënjotbiamá. ¹⁴ Pero ntšamo entšanga tmojamama, tšabá o ndoñe tšabá bétsemnama jayanama chaojobuache ora, tšëngaftanga más bëtš castigo šmochántsebomna, chë Tiro y Sidonoca bacna entšangbe castiguama. ¹⁵ Y tšëngaftanga, Capernaum pueblentša entšanga, ¿celóntscoca atsebánanënga šmochtsemna ca šmojtsejuabnanga? ¡Chë uabouana infiernoey cmochantsësetjango!

¹⁶ “Nda tšëngaftanga tcmojoyauná, chana atše joyeunayana; y nda tšëngaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

Chë canÿsëfta bnëtsana y uta entšanga tmojt-anashjajna

¹⁷ Chë canÿsëfta bnëtsana y útatna Jesús yojtsemnoye tmojt-anashjajna, puerte oyejuayënga; y chábioye mëntšá tmojanijana: —¡Bëngbe Utabná, aca jótšëmbonëse, chë bacna bayëjëngnaca šonjoyauná ca!

¹⁸ Y Jesús tojanëyana: —Ndegombre. Y tšëngaftanga Satanásbioye chca šmontseyëñjaná ora, entsemna mo Satanás celocana canÿe tcuinÿcá jtsotsatsana stjinÿcá. ¹⁹ Atšna obenana tcbonjatšatá mëtšcuayënga y alacranëngbeñe chašmotsajnama, y bëngbe uayayá Satanasbe nÿets obenana jáyëñjanama, tšëngaftanga ndocá ntjapasacá. ²⁰ Pero móyejuanga, ndoñe chë bacna bayëjënga chacmóyaunama obenana šmojtsebomnama, sinó tšëngaftangbe uabaina

celoca ya yojtsábemanama, er tšëngaftanga chë nyetsca tescama yomna tšabe vida šmochántsebomna ca –cha tojanëyana.

Jesús puerte tojanoyejuá
(Mt 11.25-27; 13.16-17)

²¹ Chora Jesús, chë Uámána Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nýe batšá tatsëmbënga tconjanýanýé, chë tša tatsëmbënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnama tcojábošenayeca.

²² “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nýe chë Taitá aíñe. Y chë Taitábioye ndocná corente quebnatábuatma; nýe chë Uaquiñá aíñe, y ndëmuanýengbioye chë Uaquiñá tojtseboše nda chë Taitá yomnama jinýanýiyama, chëngnaca chë Taitábioye mochantsábuatma ca.”

²³ Chentsana, Jesús chabe uatsjéndayëngbioye tojanobuértana y nýe chëngbioye tojanëyana: “¡Puerte oyejuayënga chë ntšamo tšëngaftanga šmontsonýacá jinýama tmojtsobenënga! ²⁴ Er atše cbëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonýá soyënga jinýana, pero ndoñe tmonjáninýe; y tmojánbošena chë šmontsuenana soyënga jouenana, pero ndoñe tmonjanuena ca” –cha tojánayana.

Chë Samarioca tšabe entšabiama cuento

²⁵ Canýe judiëngbe ley abuatambayá yojontsé Jesúseftaca jóyebuambayama, y jisháchichiyamna

mëntšá tbojantjá: —Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

²⁶ Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

²⁷ Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nÿets ainánaca, nÿets espíritoca, nÿets añémoca y nÿets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

²⁸ Chora Jesús tbojaniana: —Tšabá šconjojuá. Chca cochtsama y chë nÿetsca tescama yomna tšabe vida cochántsebomna ca.

²⁹ Pero chë ley abuatambayá tšabá jenoquédamna Jesúsbiye tbojantjá: —Y ¿ndase chë ndëmua entšánaca yomna ca?

³⁰ As Jesús tbojanjuá: —Canÿe, Jerusalenocana Jericó benache canÿe entšá yojtsetsmá, y básefta salteadorënga imojébëbocna. Lempe imojtsefca, chë entšayánaca; imojtsejantšetaye y chentšana imojtsatónënga, y chë entšá batsá obaná imojéseboshjona. ³¹ Ndeolpe, chë benachëjana canÿe judiëngbe bachna yojtsachnëjuana. Chë entšábioye ibojinÿe ora, nÿe chabuacá yojtsëchnënguañe. ³² Cachcá, canÿe Levita, chë canÿe Bëngbe Bëtsabe bëts yebnoca trabajayá chëjana yojtsachnëjuana; y chë entšábioye ibojinÿe orna, nÿe chabuacá yojtsëchnënguañe.

³³ “Chorna, cach benachëjana canÿe samaritano ináboye. Chë entšábioye ibojinÿe orna, ibojóngmia. ³⁴ Chábioye yojobeconá, aceitiye y vínoyeca ibojáshna, y lisianënguiñe entšëjuaca

ibojuantsacjuá. Chabe couayiñe ibojéftsensjayiye, canye yebnoye posada uyentsamianoye ibojuánatse, y chentše chábioye ibojéftsinyena. ³⁵ Yéfsana, chë samaritano uta denario crocénana yojenóbojatsëca, chë mo uta tesca trabajuama crocénana nyetšá, y chë posada nduíñbioye ibojesabuenaye, y mëntšá ibojauyana: ‘Quem boyabása cochtsinyena, y nderado más crocénana muabiana chacojenábojafjonasna, mëjana chaitisachnëjuana ora, cbochjabáisabuenaye ca.’ ³⁶ Y chcasna, ¿chë unguentšana nda cmojtsinyana chë entšabiama yojtsejuabnaye cha cachacá entšá inamnama ca?”

³⁷ Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojaniana: —Asna, motsa y cachcá cochjama ca.

Jesús, María y Martbe yebnentše

³⁸ Chentšana, Jesús benachëjana yojtsaye y canye base pueblotémoye tojéftsanamashëngo; y canye shembása Marta ca uabainá, chabe yebnentše tbojanofja. ³⁹ Martna canye quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; ⁴⁰ y chëntscuana Marta ba soyënga yojtsama. Cha Jesúsbioye tojanobeconá y tbojaniana: —Utabná, ¿tondayana cmontsentšamna, atšbe quenata nye canya chašonýá lempe jamama ca? Mëyana chašuájabuache ca.

⁴¹ Chora Jesús tbojanjuá: —Marta, Marta, bëtscá soyëngama contsenócochinëna y contsenomantšná; ⁴² pero nye canye soye

endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

11

Ntšamo Bëngbe Bëtsáftaca cuanjencuénta (Mt 6.9-15; 7.7-11)

¹ Canÿe, Jesús Bëngbe Bëtsáftaca ibojtsencuéntaye canÿe luarentše. Tojanpochocá orna, canÿa chabe uatsjendayënguentsá tbojaniyana: — Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjëndayëngaftaca tojanmcá ca.

² Y Jesús tojanëyana: —Bëngbe Bëtsáftaca chašmojtsencuénta ora, šmochjayana: Bëngbe Taitá, acbe uabaina chë más uámana uabainana chauesomñe. Acbe amëndayana chaóshjango.

³ Mënté šmiyatšatá, cada te šnetsëjaboto tandëše.

⁴ Bacna soyënga fsënjama: šmotsaperdónaye; er bëngnaca nÿetscanga chë bëngbiama bacna soyënga amëngbioye fsëndbetsaperdónaye. Bacna soyënga jamama šojocohëngo ora, šcochjujabuache chca ndenobuíyama.

⁵ Jesús mëntsánaca tojanëyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëše šmotsemná, ⁶ er canÿe atšbe amigo yebnoca tonjáshjango y tondaye quetsátsbomna cha jonánjama ca.’ ⁷ Ndegombre, cha tsocana tcmojuá: ‘Ndoñe šmatëbeyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y

chë tandëse jámnana ca.’ ⁸ Ndegombre, chë bacó ndoñe tonjotsbaná chë tandëse jámnama, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye. ⁹ Chcasna, atše cbëyana: Šmochjotjañe y Bëngbe Bëtsá cmochanjátsataye; šmochjánguango y šmochanjínÿena; šmochjachembo y cmochanjébëtafjo. ¹⁰ Er ndánaca ndayá tojtsotjanañá, jóyëngacñana; y tojtsenguá cha, jónÿenana; y nda tojtsechembuanábioye jebiatëfjuana ca.

¹¹ “¿Nda tšëngaftanguentšana nantsobena, taitá tojtsemnëse, cachabe uaquiñábioye canÿe mëtšcuaye jatštayana, beona tbojtsotjanañe ora; ¹² o canÿe alacránashe joyiyana, shëmnëbé tbojtsotjanañe ora? ¹³ Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatšatayama šmojtsamanëse, jmás chë celoca Taitá, chë Uámana Espiritu echanjátsataye, chca tmojtsotjanañëngbioye ca!” —Jesús tojánayana.

Fariseunga tmojánayana Jesús Satanásbentšana obenana tojanóyëngacñe ca
(Mt 12.22-30; Mc 3.20-27)

¹⁴ Jesús canÿe entšábentšana canÿe bacna bayëja tbojtanábocna. Chë bayëja ndëbiá chë entšábioye tbojánbema, y chábentšana tojésanbocna ora, chë ndëbiá tojtanontšé oyebuambnayana. Y chë entšanga chama imojenjnaná; ¹⁵ pero báseftanga imojtsichamo: “Beelzebú, cach Satanás, chë bacna

bayējēngbe amēndayá, quem boyabásabioye obenana tbojatsetá chē bayējēnga chauatēbuacnama ca.”

¹⁶ Y ínŷenga, Jesús jisháchichiyamna tmojanimpadá canŷe bēts soye chaoma, jinŷanŷiyama cha celoca obenana inabomna o ndoñe. ¹⁷ Pero Jesús yojtsetátšēmo ntšamo chēngbe juabna bētsemnana. As tojanēyana: “Canŷe amēndayábentše entsanga tmojtsenojatá y tmojtseńayase, cachēnga jtsenpochócana; y canŷe yebnentše oyenēnga tmojtsenojatá y tmojtseńayase, chē pamíllanga tšabá nŷets tempo ndoñe quemochátsmēna. ¹⁸ Cachcá, Satanás tojtsenojatá y cachabe contra tojtsemnēse, ¿ntšamo nantsobena chabe mándayana quem luarentše jēftsebomnana? Chca séntsichamo, er tšēngaftanga šmongsichamo Beelzebube obenánaca chē bayējēnga stsatēbuacana ca; ¹⁹ pero chca ndegombre tojtsemnēse, ¿ndábeyeca tšēngaftangbe usetonēnga obenana imojtsebomna chē bacna bayējēnga jtēbuacnama? Chíyecna, cachēnga montsinŷinŷná ntšamo ndegombre yomnana, y tšēngaftanga ndoñe ndegombre soye šmongsichámuama. ²⁰ Y atšna, Bēngbe Bētsabe obenánaca entsāngbentsana chē bayējēnga sēndētēbuacana; y chē soye entsinŷinŷná, Bēngbe Bētsabe amēndayana tšēngaftangbioye tojóshjanguama.

²¹ “Canŷe corente añemo bomna entsá, bētscá ármangaca chabe yebna tojtsinŷenēse, chē tsoca tomna soyēnga ndoñe ntjotsana. ²² Pero inŷa chabiamá más añemo bomná tojabo y tbojabetseyēnjaná, chē cha yojanašbuaché armangá

jtsabocana y chë tobomna sóynaca; y ntšamo chë inya tojtsebošcá chë soyëngaca jamana.

²³ “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entšángaftaca
(Mt 12.43-45)*

²⁴ “Canye bacna bayëja canye entšábentšana tojësebocna ora, bojojo luarënguenache chë bayëja jtsanana, ndayentše jóchnama onguayiñe. Ndoñe tonjínýena ora, jenójuaboyana: ‘Atšbe oyenoye, chë ndayentšana sënjëftsebocnoye chanjesshëcona ca.’

²⁵ Y choye tojtashjango ora, jinýenana lempe tsabá cha jtesamashënguama, mo tsjajniñe y prontániñe cuaftsemncá. ²⁶ Chora chë bayëja jana y inye canysëfta bayëjenga, chabiamá más opëjenga jobi-atšana, nýetscanga choye jamashjnama, chë boy-abásabeñe joyéanama. Y chca, chë boyabása temp-scama más bacna entšá jtoquédana, chora chë natsanama más bayëjenga abamna causa ca” —Jesús tojánayana.

Chë ndegombre oyejuayana

²⁷ Jesús chë soyënga yojtsichamëntscuana, entšanguentše canye shembása yojuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

²⁸ As Jesús tbojanayana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

*Chë bacna entsanga Jesús tmojanimpadá canýe
bëts soye chaoma, chabe obenana jinýama
(Mt 12.38-42; Mc 8.12)*

²⁹ Entšanga más imojtsójoye Jesús yojtsementše, y Jesús tojanontšé jáuyanana: “Morsca entsanga puerte bacna entsanga; chënga montsotjanañe atše canýe bëts soye chaima atšbe obenana jinýama, pero ndoñe chca quemochátinýe, sinó nýe chë ndayá yomna mo chë Jonásoftaca tojanopasá soycá. ³⁰ Er chca, ntšamo Jonás Nínive puebloca entsanga canýe bëts soye tojaninýanýé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinýanýná morsca entsángbioye, Bëngbe Bëtsabe amëndayana tojóshjanguama. ³¹ Bëngbe Bëtsá ntšamo morsca entsanga tmojanmama yochjayana te, chë Sur luaroa reiná echanjotsaye y morsca entsángbiamama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiamama más uamaná endmëna. ³² Chë entsanga tšabá o ndoñe tšabá tmonjamama jayanama te, chë Nínive bëts puebloca entsángnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiamama más uamaná endmëna ca” —Jesús tojánayana.

*Chë cuerpama uajuinýanëshá
(Mt 5.15; 6.22-23)*

33 “Ndocná canye uajuinyanēsha juajuinjenana, canye iytemena luaroye juajajuama, ni canye cajonēshe tajsoye, sinó canye tsbanana luaroca juajajuama, chca, chē luaroye amashjuanēngbiama chaotsebínynama. 34 Acbe bominye tšabá totsomñese, acbe cuerpama mo canye uajuinyanēshacá jtsemnana; chíyeca aca jtsoybenana, ntšamo tcojtsamcá chē bomínýeca jtsonýayana. Chē bominye ndoñe tšabá tontsemnēsna, chē bominye tondaye ntsoybenana jamana, ntšamo tcojtsamcá chacobená jinýama. Cachcá, acbe ainaniñe tšabe juabnēnga tcojtsebomnēse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnēnga tcontsebomnēsna, lempe ntšamo chacojtsamcá ndoñe tšabá queochátsmēna. 35 Cuedado šmochtsebomna, tšēngaftangbe ainaniñe nýe tšabe juabnēnga chaotsemnana, chca, lempe ntšamo chašmojtsamcá tšabá chaotsemnana, y bacna juabnēnga ndoñe chaondětsemnana. 36 Chcasna, lempe ntšamo šmojtsamcá tšabá tojtsemnēse y ndocna bacna sóyesna, tšēngaftanga bētscá tšabe soyēnga šmochántsama; y chca, tšēngaftanga šmochántsemna mo canye uajuinyanēsha puerte tšabá tojtsebinýnacá ca” —Jesús tojánayana.

Jesús chē fariseunghiama y ley abuatambayēngbiama tojánayana, chēnga ndoñe tšabá montsamá ca

(Mt 23.1-36; Mc 12.38-40; Lc 20.45-47)

37 Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashēngo

y mesëshentše tojanótbema. ³⁸ Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábenga jtsatsmënama. ³⁹ Pero Bëngbe Utabná tbojaniyana: “Tšëngaftanga fariseunga šmondmëna mo entsangcá ndëmuanÿenga chë tazësënga y šcnenënga shjoicajana jtsóbojabiana, pero tsoyna nÿe cachcá jonÿayana. Tšëngaftanga becá jtsamana entsangbiana mo tšabengcá jtsinÿnama; pero tšëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca. ⁴⁰ ¡Juabna ndbomnënga! Tšëngaftanga ndoñe šmondëtatšëmbo, chë tšëngaftangbentšana entsanga ndayá jinÿama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámana ndayá tšëngaftangbe ainanoye yomna soyënga, y chë entsangbe delante šmojama soyënga. ⁴¹ Tšëngaftanga cmontsamna, chë soyënguiñe ndayá ainaniñe yomnentšana ínÿengbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

⁴² “¡Tša lastema tšëngaftangbiana fariseunga! Tšëngaftanga Bëngbe Bëtsabiana jtsequëcjayana chë jajañentša sananga bnëtsanentšana canÿe soye nÿetsá, y chë binche matatémënguentsana menta, ruda y nÿetsca binche matatemënguentsánënaca; pero nÿe batšá jtsamana chë nÿetscanga cachca derechënga chamotsebomnama y cha jtsebobonshánama. Quem soyënga cocayé cmontsamna jtsamana, chë inÿe tšabe soyënga ntjajbanacá ca.

43 “¡Tša lastema tšëngaftangbiamama fariseungama! Tšëngaftangama tša jtsebošana chë judiëngbe enefjuana yebnënguenache chë más uámana luarënga jtsebomnama, y benachiñe nya puerte respétoca entšanga chacmotsacheuanayama ca.

44 “¡Tša lastema tšëngaftangbiamama! Smondmëna mo obanënga uatbontsaniñcá, ndoñe ntsinynana, y entšanga ntsetatšëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnëngaca, pero entšangbiamama ndoñe chca quešmátinyna ca.”

45 Jesús chca tojánayana ora, canye ley abuatambayá tbojanayana: —Buatëmbayá, chca palabrenga contsoyebuambná ora, bëngbiámnaca ndoñe tšabá quecátichamo ca.

46 Pero Jesús tojánayana: —¡Tša lastema tšëngaftangbiámnaca, chë ley abuátambayënga! Mo canye entšá, couáybioye canye uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftangama entšángbioye jtsamëndayana bëtscá mandënga chamotsocumplínama, pero cach tšëngaftangama ni mo batšatëmnaca jtsamana chë mandënga jtsocumplínama ca.

47 “¡Tša lastema tšëngaftangbiamama! Tšëngaftangama jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse; pero chë mo chëngcá, canye buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts

taitanga tmojtsanëbaye. ⁴⁸ Chca jtsamëse, tšëngaftanga šmontsinÿanÿná, ntsamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

⁴⁹ “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiana abuayiyayënga, y báseftangbioye mochantsëbaye y ínÿengbioyna mochantsécamiye ca.’ ⁵⁰ Y chca, nÿets castigo morsca entšángbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana; ⁵¹ Abélbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entšángbeñe nÿets castigo chaotsemnama ca.

⁵² “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entšangbiana yapa totcá chaotsemnama. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

⁵³ Jesús chë soyënga tojánayanama, chë ley abuátambayënga y fariseunga puerte tojánetëna, y cha chentšana yojtsaisebocana ora, tmojanontsé chábioye becá tjanayana, y

imojtsama ba soyëngama chaóyebuambama, ⁵⁴ chca, jisháchichiyama jtsebošëse, cachá ntšamo tojayana sóyeca chënga jtsebonnama ndáyeca chábioye mal jaquédana.

12

Jesús, chë bacna entsanga ntšamo ndegombre tmojuabnacá ndinÿinÿnayëngbiama tojanabuatambá

¹ Chëntscuana, ba uaranga entsanga chentše tmojanójoto; tša entsanga causa, nÿetscanga imojtsenatsëntšenaye. Chora Jesús tojanontšé jóyebuambayama, y natsana chabe uatsjéndayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtská entsanga ntšamo ndoñe tšabá tontsemncá chamotsamama. ² Er ndocna yoiytëmena soye, ntjinÿcá queochaisoquéda; y chë ndótatsëmbo soye, ntsotatsëmbcá queochaisoquéda. ³ Chíyeca, chë mora nÿe tšëngaftangbiama šmojtsichamo soyënga, chë entsangbiama mo ibetiñcá cuaftsemna soyënga, entsanga chama botamana mochanjátatsëmbona. Y chë iytëcana šmojtsichamo soyënga, nÿetsca entsángbioye mochántسابuayiynaye, mo nda canÿe yebnentša tsbanánocana noticiënga tojtsayebuachcá ca” —cha tojanéyana.

*Nda ndegombre cuantsebiauatja
(Mt 10.26-31)*

⁴ “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiama, pero chentšana más jamana ndoñe ntso benana. ⁵ Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infierno ye jtsichámuama obenana endbomnábioye; chábioye cocayé šmochtsebiauatja ca.

⁶ “¿Shachna jaja shloftšetémënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiama sempre jesenójuabnayana. ⁷ Y tšëngaftangbiama Bëngbe Bëtsá lempe endétatšëmbo, y bueta stjënëjënga tšëngaftangbe bestšašinë yomnámna. As ndoñe matauatjëngana; tšëngaftanga ba jaja shloftšëngbiama corente más šmonduámana ca” —Jesús tojánayana.

Ndabiana Jesucristo yochjayana chabe entšá yomna ca

(Mt 10.32-33; 12.32; 10.19-20)

⁸ “Atše cbéyana, nda atšbe entšá yomna ca entšangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; ⁹ pero nda entšangbe delante, atšbe entšá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

10 “Bëngbe Bëtsá bochanjaperdóna, nda chë Bëngbe Bëtsá Entsó tbojanbemabiamana ndoñe tšabá tontsichamuábioye, pero chë Uámana Espíritbiamana ndoñe tšabá tontsichamuábioyana ndoñe.

11 “Tšëngaftanga chë judiëngbe enefjuana yebnëngoye, ntšamo entsãnga bëtsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyeca šmochjenëuyanama, o ndayá šmochjayanama; 12 er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

Entšabiamana resjo yomna, nýe yapa bomnana jesejuabayana

13 Chentsãna, canýa entsãnguentšá Jesúsbioye tbojanianyana: —Buatëmbayá, atšbe catšata momandá chë átšbioye otocana soyënga chašuatoyé ca.

14 Y Jesús tbojanianyana: —Bacó, ¿nda atše šojábema tsëndatbe uجاتanayá ca?

15 Y entsãngbioye tojanéyana: —Smochjinýe y cuedado šmochtsebomna chë nýe yapa soyënga jtsebomnama bošama; er masque bëtská soyënga chašmotsóboñe, chca ndoñe quešmochátstatsëmbo aiñe tšabe vida taišmochjónýenama ca.

16 Y chora mëntšá tojanacuntá: “Inamna canýe bomna entsá, y chabe fshantsënguiñe tša jaja saná yojtsopodena. 17 Chë bomná chora mëntšá yojtsejuabnaye, ‘¿Y morna, ntšamo chjama?’ er ndoñe quetsátsbomna ndayentše atšbe jaja saná

jtsobocjayama ca.’ 18 Y mēntšá yojeniyana: ‘Chē grano uaquēcjnaye yebnēnga chantsendbiamā, y inye más bēts yebnēnga chanjētsjebo, y chiñe n̄yetsca atšbe jaja saná chantsóbocjaye y n̄yetsca atšbe soyēgnaca. 19 Y chora atše chjeniyana: Bacó, bētscá soyēnga contsebocjana, ba uatama cmochanjuáshjache. Morna, cochjóchna, cochjase, cochjatēmo, cochjóboyejuaye ca.’ 20 Pero Bēngbe Bētsá chábioye ibojauyana: ‘Obējema, cach quem ibeta cochanjóbana; y asna, chē contsebocjana soye, ¿ndabiamā yochtsemna ca?’ ”

21 Y Jesús chora tojánayana: “Chca endbopása chē n̄ye chabiamā bomnana tojtsejuabá y bētscá Bēngbe Bētsabe soyēnga ndoñe tonjēftsashjacháftaca ca.”

*Bēngbe Bētsá chabe básenga jtsan̄yēnana
(Mt 6.25-34)*

22 Chentšana, Jesús chabe uatsjēndayēnga tojanēyana: “Quem soye cbēyana: Ndoñe šmattsenócochin̄yēna ndayá šmochjase o šmochjofsiye vida jtsebomnana, ni ndaye entšayá šmochjuíchētjuama cach ndoñe. 23 Ndegombre, vida chē sanama más enduámana y cuerpo chē entšayama más. 24 Chē ftsenga shloftšēnga šmochjan̄yē: tondaye ntjájena, ni jaja saná ntjátbanana, ni grano uaquēcjnaye yebnēnga ntsebomnana; pero Bēngbe Bētsá chēnga saná jtsatšatnayana. ¡Y tšēngaftanga chē ftsenga shloftšēngbiamā puerte más šmonduámana! 25 Masque chca endmēna, masque can̄ya tša tojesenócochin̄yēna, ¿ntšamo nanjobenaye jamana, chē ntsachetšá vida

yochtsebomnentšana canýe hora vida más jabotiyana? ²⁶ Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?

²⁷ “Smochjuinýe chë lirio uantšefjushangá jtsajuajnana: ndoñe ntsetrabájayana, ni ntseshabiamnayana. Pero atše cbëyana, ndegombre ni mo rey Salomón, nýetsca chabe bomnánaca, chë lirio uantšefjushangacá nýetsá botamana quenjatspormana. ²⁸ Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámnaca Bëngbe Bëtsá echanjama entšayá chašmotsábomnama, jentšanga Bëngbe Bëtsábeñe nýe batšá ošbuáchiyënga! ²⁹ Chíyeca, ndoñe šmattsenócochinýena ndayá jasama o jofšiyama onguayíñe; ³⁰ er chë soyëngama quem luarentša entšanga mondbétsenocochinýena, pero tšëngaftanga ndoñe. Tšëngaftanga canýe Taitá šmondbomna, y cha endétatšëmbo ndayá cmëjabótama. ³¹ Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsëjaboto soyënga nýe šmochanjóyëngacñe ca” —Jesús tojánayana.

Chë celoca bomnana
(Mt 6.19-21)

³² “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínýnana chabe amëndayana tšëngaftanga jatšatayama. ³³ Lempe ntšamo šmobomncá šmochtsatobuiye y chë ujabotëngbioye

šmochtsatšataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; ³⁴ er chë ndayentše tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” — Jesús tojánayana.

Bëngbe Utabná yochjésabama jtseprontánana

³⁵ “Mo chë oservénënga, chë entšayá uichëtjonënga y uajuinýananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama. ³⁶ Chca, tšëngaftanga šmochántsemna mo chë oservénënga, tšabe entšayaca bopormánënga y uajuinýananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservénënga jtebiatëfjuama. ³⁷ Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentše chë oservénënga echanjátbiana, y saná echanjuuatšiye. ³⁸ Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínýanoye. ³⁹ Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatsëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama.

40 Tšëngaftán gnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

Chë tšabe oservená y chë bacna oservená
(Mt 24.45-51)

41 Pedro, Jesúsbióye tbojanianyana: —Utabná, ¿chë tconjayana cuento nyë bëngbiamá o nyëtsangbiamá yochtsemna ca?

42 Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nyëts juábnaca amá? Cha jtsemnana nda chë nduiño bochjëftsebošhona chë yebnentsënga chaotsanýenama, y jasama tojtsemna ora chaújuatšema. 43 Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. 44 Ndegombre cbëyana, chë nduiño chábioye bochanjaimpáda nyëtsca chabe soyënga chabotsinýeñama. 45 Pero chë oservená, chabe nduiño betscó ndoñe yochantabo ca tojtsejuabná, y tojontšé chë inýe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, 46 cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

47 “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. 48 Y chë oservená,

ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonjëbioyna jauyanana, más bëts trabajo chaoma ca.”

*Jesube causa, entšángbeñe más jtsentsjanayana
(Mt 10.34-36)*

⁴⁹ “Atše sënjabo quem luariñe jabojuinÿiyama, y jtša sëntseboše malaye ya ctsangbototjuana!
⁵⁰ Atše šontsemna puerte jasúfria, y ipuerte ngménaca sëntsobátmana chca chaotsemnama!
⁵¹ ¿Tšëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochátsmëna; atše sënjabo causa, entšanga más mochántsejtsjanaye. ⁵² Er mëntescana, canÿe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna. ⁵³ Taitá uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnama ntšamo
inëtšotatšëmbo
(Mt 16.1-4; Mc 8.11-13)*

⁵⁴ Mëntšánaca Jesús entšanga tojanëyana: “Tšëngaftanga, chë jantšetëshënga shinÿe uenatjëmbambanoicana tojóboचना šmojinÿe ora šmondbétsichamo ‘echanjuafté ca’, y

ndegombre chca jopásana. ⁵⁵ Y tsmanoicana tojtsebínÿia orna, tšëngaftanga šmondbétsichamo ‘echanjoÿenÿana ca’, y ndegombre chca jopásana. ⁵⁶ ¡Bacna entšanga, chë ntšamo ndegombre šmojuabnacá ndinÿinÿnayënga! Ntšamo quem luarentše yochtsemnama, ndayá celoca šmojinÿama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinÿanÿinama ca?” —Jesús tojánayana.

Chë uayayáftaca natjëmbana jtenbemana
(Mt 5.25-26)

⁵⁷ “¿Ndáyeca cach tšëngaftanga ndoñe šmondbáyana ndayá tšabá bëtsemnana? ⁵⁸ Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšinë cmochanjáboshjona, y chënga cárceloye cmochanjutame. ⁵⁹ Ndegombre cbëyana, chentšana ndoñe quecochtëtsbocna, nÿets ndebénana candesopagantscuana ca” —Jesús tojánayana.

13

Bëngbe Bëtsabe benache jtishachana

¹ Cach ora, báseftanga tmojána Jesús jinÿama, y tmojancuentá ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó

chë Bëngbe Bëtsábioye jëtschuayama tmojanóba bayëngbe buíñeca.

² Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasa, chë luarentša inýe boyabásengbiama chënga más bacna soye amënga imojamna causa ca? ³ Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. ⁴ O, ¿tšëngaftanga šmnétsejuabnaye, chë Jerusalem entša bnétsana posufta entšanga tmojanóbanënga, chë Jerusalemoca binche uafjajónaye Siloé béconana tsbanana jebna soye tojtsanáshajaye ora, chënga imojamna chë inýenga Jerusalem entše oyenëngbiama más bacna soyënga amënga ca? ⁵ Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

Chë ndëshajona higo betiyama cuento

⁶ Jesús mëntšá tojanacuntá jabuátambama: “Canýe entšá jajoca canýe higo betiye inabomna, y yojá nderado nantseshájonama, pero tondaye yonjínýena. ⁷ Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoye jaborrepárama, nderado nantseshájonama, pero ndocna te tondaye chiyátinýena; chíyeca, motsetëtše. ¿Ndayama quem jajañe yochjátsjena ca?’ ⁸ Pero chë jajañe inýená ibojauyana: ‘Bacó, inýe uata cachcá monýá, fshantse chanjáboplojua y

uanguanëshe chanjabotboto. ⁹ Nderado chca jamëse, nanjashájona; y ndóñesna, chora cocayé cuantsetëtše ca.’ ”

Jesús canÿe ochnayté, canÿe tsëštjona shembásabioye tbojanshná

¹⁰ Canÿe, canÿe ochnayté Jesús yojontsé entsanga jabuátambana, chë judiëngbe enefjuana yebnentše, ¹¹ y chentše yojtsemna canÿe shembása; cha ya bnëtsana posufta uata yojtšešoca. Canÿe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana. ¹² Jesús chábioye tbojáninÿe ora, tbojanchembo y mëntšá tbojanianyana: “Batá, mora ya ndoñe šocá quecátsmëna ca.”

¹³ Chora Jesús chabe cucuatšënga chábeñe tojanajó, y cachora chë shembása yojtondirícha, y tojanontsé Bëngbe Bëtsábioye jëtschuayama. ¹⁴ Pero chë enefjuana yebnentša mándayana tbojánetna, Jesús chë shembása ochnayté tbojanshnama, y entsanga tojanëyana: –Chnënguana te comna jatrabájama; chora šmochjabo jenóshnama; ochnaytese ndoñe ca.

¹⁵ Y Bëngbe Utabná tbojanjuá: –¡Bacna entsanga, ntšamo ndegombre šmojuabnacá ndinÿinÿayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? ¹⁶ Chcasna, quem shembása, canÿa Abrahámëntšana entšá, y Satanasbe causa bnëtsana posufta uata šocá yojtsemna, ¿ndoñe

tšabá yondmëna canÿe ochnayté chë bayëja jtsebojuánana ca?

¹⁷ Jesús chca tojánayana ora, chabe uayayënga imojtsëuatja, y nÿetsca entsanga imojtsóyejuaye Jesús tša bëts soyënga yojtsamama.

Chë mostaztiye jenayama cuento
(Mt 13.31-32; Mc 4.30-32)

¹⁸ Jesús mëntsánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nan-jopódia chama jábuayenana ca? ¹⁹ Endmëna mo canÿe mostaza jénaye, canÿe entsá jajañe tojajecá; chiyna jójuana y canÿe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

Chë levadurama cuento
(Mt 13.33)

²⁰ Mëntsánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? ²¹ Endmëna mo levadurcá; canÿe shembása chana jenájuabana unga medida arninÿañe, nÿetsana chauabochama ca.”

Chë base utëntsá bësásá
(Mt 7.13-14, 21-23)

²² Jerusalenoye benache, Jesús entsanga yojtsabuátambaye bëts pueblënguiñe y base pueplotëmënguiñe. ²³ Canÿa chábioye tbojantjá: —Bëngbe Utabná, ¿nÿe báseftanga imomna chë atsebácanënga mochtsemnënga ca?

Y Jesús tbojanjuá: ²⁴ —Puerte smochtsentsëna chë base utëntsá bësásájana jamashjnama; er ndegombre cbëyana, banga mochantseboše chëjana

jamashjna, pero ndoñe quemochatobenaye.
²⁵ Chë yebnentša nduiño chaojotsbaná y chë bësása chaojtatámentšana, tsëngaftanga chë shjoca chašmojtsemnënga, šmochántsechembuana, mëntšá jtsichámëse: “Utabná, šmebëtafjo ca.” Pero cha cmochanjáuyana, “Atše ndoñe quetsátstatšëmbo ndëmoquënga tsëngaftanga šmomnama ca.”
²⁶ Chora tsëngaftanga šmochanjontšé ichámuana: “Acaftaca cánýiñe fsënjase y fsënjofsé, y aca bëngbe tsáshenañe tconjabuatambá ca.” ²⁷ Pero cha cmochanjójuaye: “Ya tcbonjáuyana, ndëmoquënga šmomnama ndoñe tstátšëmbo ca. ¡Atšbentšana mojuánanga, bacna soyënga amënga ca!

²⁸ “Chora chentše puerte šmochanjenóbošachna y tsetšanama juatsašënga šmochantsenoftëšjojnaye, Abraham, Isaac, Jacob y nýetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnama chašmojinýe ora, y tsëngaftanga chentšana cmochtëbuacanama. ²⁹ Y shinýe bocanoicana y uenatjëmbambanoicana, tsmanoicana y tsjuanoicana entšanga mochanjabo y juasama mochanjotbiama Bëngbe Bëtsabe amëndayentše. ³⁰ Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalenentša
 entšangbiama
 (Mt 23.37-39)*

³¹ Jesús chë soyënga tojanëyana ora, básefta fariseunga tmojánashajna y tmojanियana: —

Muentšana motsatoñe; Herodes entseboše aca jtsóbama ca.

³² Y Jesús tojanējua: –Motsajna y šmochjauyana chë corente studio bomná, mo tjañe mesetcá: “Minýe, mënté y yěfse entšángbentsana bacna bayējenga sëndētēbuacana y šoquēnga sëndáshnaye, y baseftaytesna chanjapochóca ca.” ³³ Pero atše šontsemna mënté y yěfse jtsayana, y baseftaytesna Jerusalenoye jana, er ndoñe tšabá ntsemnana canya Bēngbe Bētsabe juabna oyebuambnayá Jerusalenentša chábuañe chaóbana ca.

³⁴ “¡Jerusalenentša entšanga, Jerusalenentša entšanga, tšēngaftanga chë Bēngbe Bētsabe juabna oyebuambnayēnga jtsébáyana, y chë Bēngbe Bētsabe ichmónēngbioye ndētšbēngaca jtsatēchénganjana jtsébáyama! ¡Bueta soye atše sēnjábošena tšēngaftanga átšbioye júbuajama, mo canye tuamba chabe bolletotémēnga juatēngmiáša tajsoye cuaftajayecá, pero tšēngaftanga ndoñe chešmátsbošena! ³⁵ Y šmochjinýe, mora atše cachcá cbochanjesēnyaye, y chca, atšna enánanga cbochanjésabashejuana, mo canye yebna cachcá tcojesonýá y éaña tcojeseboshjoncá. Y ndegombre, tšēngaftanga morscana ndoñe más atše quešmochátinýe; y atše šmochántinýe, chë: ‘¡Corente bendición bomná, Bēngbe Utabnabe obenánaca tojabá ca!’ chašmojtsichamo ora ca” –Jesús tojánayana.

14

Jesús, canye uafshachanánaca šocábioye tbojan-shná

¹ Canye ochnayté, Jesús tojána jasama fariseunga be canye amëndayabe yebnoye; y chë fariseunga yejuana imojtserreparana, er ndayá Jesús nanjama. ² Chéntšnaca, chabe delante yojtsemna canye entsá uafshachanána socá. ³ As Jesús chë ley abuátambayënga y fariseunga tojanatjá: “¿Quenlesenciana canye ochnayté canye socá jáshnama o ndoñe ca?”

⁴ Chëngna ndocá tmonjanjuá. As Jesús chë socábioye tbojánishache, tbojanshná y tbojaniana chaotsatoñe ca. ⁵ Y chë fariseunga tojanéyana: “¿Nda tsëngaftanguentsá, nderado chabe uaquiñá o uacná canye tboye tojtsótsatše, cachora ndoñe nanjá jetsejatsëcama, masque ochnayté totsomñëse ca?”

⁶ Y chënga ndocá tmonjanobená cha jojuana.

Chë casamentoye ófjanënga

⁷ Jesús tojáninye ntšamo chë ófjanënga quëfseroye imojtsachnëjuana jotbiamama; as mëntšá chënga tojanabuayená: ⁸ “Canye casamentama nda chacmojojfa ora, quëfseroca ndoñe catjótbema, er nderado inye ofjaná acbiana más uamaná ústonoye nandaboye; ⁹ y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. ¹⁰ Chamna, nda chacmojojfa ora, chafjoca cochjótbema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiana uamaná cochántsemna. ¹¹ Er nda cachá bëtsá tojtsenobiamná, nduamaná mochántsebema; y

nda cachá nduamaná tojtsenobiamná, aíñe bëtsá mochanjábema ca.”

¹² Y chë tbojanofja entsábioynaca Jesús mëntsá tbojaniana: “Fiesta chacojama o sananga chacojtsebomna ora, ndoñe cattsäbuájajana acbe amiguënga, catsátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantëtofja, y chca ya acbe uacanana soye cochántsebomna. ¹³ Chamna, canye fiesta chacojama ora, cochjúbuaja ndbomnëjëmënga, jama ndobenënga, coshetënga y jtanënga, ¹⁴ y aca corente oyejuayá cochántsemna; er chënga ndoñe quemochatobenaye cachcá aca jtëtofjana, pero acna acbe uacanana soye cochántsebomna, chë Bëngbe Bëtsabe bominyiñe tsábënga imomnënga chamojtayena ora ca” —cha tbojaniana.

*Chë bëts sanama cuento
(Mt 22.1-10)*

¹⁵ Chca tojanuena ora, canya chë mesëshentse tbemaná tojánayana: —¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

¹⁶ Chora Jesús tbojaniana: —Canye bacó canye bëts saná yojaprónta y ba entsanga yojúbuaja. ¹⁷ Juasama ya yojobuache ora, canye oservená ibojíchmua chë ófjanënga jáuyanama chamotsajna, ya lempe yojtseprontana ca. ¹⁸ Pero chorna nyetscanga imojontsé jtsoyátsëmbuana. Canya yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” ¹⁹ Inya

yoyayana: “Bnĕtsana toronga sĕnjobuámiñe, y šontsemna jana jányama, jaárama taimochjosérvia. Chcasna, aslĕpaye šmotsepacenciá ca.” ²⁰ Y inya yoyayana: “Cabá mora sĕntsobouamá, y chĕ causa, ndoñe quichatobenaye jama ca.” ²¹ Chora chĕ oservená yojesshĕcona y lempe chabe nduíñbioye ibojauenaye. Chĕ nduíño tša ibojtsetna, y chĕ oservenábioye ibojauyana: “Cam ora motsa tsashenangoye y benachĕngoye, y moye cochjunatse ndbomnějémĕnga, jama ndobenĕnga, jtanĕnga y coshetĕnga ca.” ²² Chentša bĕnĕntscose, chĕ oservená chĕ nduíñbioye ibojauyana: “Bacó, ya sĕnjama ntšamo šconjamandacá, y cabá ínĕngbiama luare entsemna ca.” ²³ As chĕ nduíño ibojauyana: “Motsa benachĕngoye y betiyetemĕngaca jetjaniñĕngoye, y entšanga cochjautáriaye moye chamuábama, atšbe yebna chaojutjiana; ²⁴ er ndegombre cbĕyana, chĕ natsana sĕnjobuajĕnguentšá ndocná atšbe saná queochatsse ca.”

*Ntšamo yomna Cristbe ustoná jtsemnama
(Mt 10.37-38)*

²⁵ Mallajta entšanga Jesús imojtsĕstona; as cha tojanobuértana y tojanĕyana: ²⁶ “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabĕnanga tuababuánĕshanama, y ntšamo cachá tuenobobonshánama, atše ndoñe más corente šontsebobonshánĕse, cha ndoñe ntsobenana atšbe uatsjendayá jtsemnana. ²⁷ Y nda, atšbiama ndoñe tontseprontana jasúfriama y cruciñe jobanámnaca, y nyĕtsca chabe quem luare

soyënga ndoñe tonjëseboshjona atše juastama, cha ndoñe ntsoobenana atšbe uatsjendayá jtsemnama.

²⁸ “Nderado nda tšëngaftanguentsá tojtsejuabná canÿe tsbanana jebna soye japórmama, ¿cha natsana ndoñe nanjót bema jinÿama ntsachetsá crocénana chentše yochjuába, y japochócama nÿetsá crocénana tayo jtse bomnama? ²⁹ Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nÿetscanga chca tmojinÿënga, muantsáfchaye y mëntsá muantsichamo: ³⁰ ‘Quemëjema jajebuama tonjontsé, y japochócama ndoñe chenatobená ca.’

³¹ “O ¿ndaye rey inÿe réyef taca jénts jama tbojotocase, natsana ndoñe nanjót bema jajuaboyama, nderado nanjobenaye bnétsana uaranga soldadëngaftaca chë ínÿabioye jayénjanana, chë inÿa uta bnétsana uaranga soldadëngaftaca tojtsabose? ³² Y ndóñesna, chë inÿe rey cabá bënoca tojtsemna ora, básefta entsanga echanjichamuá, cha jauyanama más tšabá yomna ndoñe jatentsjanayana ca.

³³ “Chcasna, ndánaca tšëngaftanguentsá, lempe ntšamo tobomncá ndoñe cachcá tonjesonÿá, cha ndoñe ntsoobenana atšbe uatsjendayá jtsemnama ca” –Jesús tojánayana.

Chë tamó fténana tojtse bocna ora

(Mt 5.13; Mc 9.50)

³⁴ “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaotsatsmënama, ni saná jatamuama. Chë ftena tamó tondayama ntso servénana, cachcá, chë

atsbe uatsjédayënga jtsemnama tmojtsebošënga, pero lempe jéseboshjonama ndoñe tmontseboše, cach ndoñe chama ntsošservénana. ³⁵ Chë ftena tamó ndoñe ntsošservénana ni fshantsama, ni uanguanëshama. Nye jtsëtšenana. Chë jouenama tmojtsobenënga, šmochjouena ca” — Jesús tojánayana.

15

Chë ótšena oveshabiana cuento

(Mt 18.10-14)

¹ Njetsca chë Romocama impuesto entsángbioye atjanayënga y inye bacna soyënga amënga, Jesúsbioye imojánajna chabe palabra jouenama; ² y chë fariseunga y ley abuatambayënga chama Jesusbiana podessa imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

³ As Jesús mëntšá tojanacuntá, chënga jabuatambama: ⁴ —¿Nda tšëngaftanguentsá, canye patse oveshënga tojtsabamna, y canya tbojtsobuétšëse, chë inye esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanguama candëtsónyëñëntscuana?

⁵ Y tbojtsinýena ora, oyejuayá chë oveshá jesotantšájuana; ⁶ y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atseftaca móyejuanga, er chë sëntsanobuetše oveshá sëntsinýena ca.” ⁷ Atše cbéyana, cachcá, celócnaca más oyejuayana jtsebínýnana, canye bacna soyënga amá tšabe benache tojtishachabiana,

y ndoñe n̄ya yapa, escon̄fta bn̄etsana y escon̄fta t̄sabe soȳenga am̄engbiama, ch̄e ndoñe yondujaboto bacna soȳenga amana jtsajbanana ca.

Ch̄e croc̄enana tojetsón̄yena shembásabiama cuento

⁸ “O m̄entsá, ¿nd̄emua shembása, bn̄etsana uámana croc̄enana tojtsebonna y cán̄yana tojtsobuét̄s̄ese, chora ndoñe can̄ye uajuin̄yan̄esha nanjuajuin̄yená, y cuedádoca ch̄e yebna nantsetsajajo y botamana ch̄e croc̄enana nantsenguango cand̄etsón̄yēñ̄entscuana? ⁹ Y tojtsin̄yena ora, chabe amigūenga y juachañe oyena shembásenga jáchembuana, y m̄entsá jáuyanana: ‘At̄seftaca móyejuanga, er ch̄e s̄entsanobuet̄se croc̄enana s̄entsin̄yena ca.’ ¹⁰ At̄se ch̄eyana, cachcá, ch̄e B̄engbe B̄etsabe angelot̄em̄engbeñe oyejuayana jtsebín̄ynana, n̄ye can̄ye bacna soȳenga amá ch̄e t̄sabe benache tojtishachabiama ca” —Jesús tojánayana.

Ch̄e uaquiñá bacna benachiñe ayá

¹¹ Jesús m̄entsánaca tojanacuntá: “Can̄ye ent̄sá uta uaquiñata yojánabamna; ¹² y can̄ye, ch̄e ngom̄enche uaquiñá chabe taitábioye ibojauyana: ‘Taita, at̄sbe otocana soȳenga šmatat̄setá ca.’ As ch̄e befta lempe ch̄e uta uaquiñata yojt̄ejátaye.

¹³ “Chent̄šana baseftaytesna, ch̄e más bobontse uaquiñá lempe nt̄samo ibojobuachcá yojtsatobuiye y ch̄e croc̄enánaca b̄en luaroye yojtsoñe, y choca, cha n̄ye nt̄samo ibojococh̄engcá, mocá yojenobuiye, y chca, lempe yojtsepochóca.

¹⁴ Lempe croc̄enana yojtsoshañe orna, b̄ets

shēntsana chē luarentše yojóshjango, y chē causa cha ibojotóca shēntseca jtsejétanana. ¹⁵As, cha yojá trabajo jonguangoñama y yojínÿena chē luarentša canÿe entšábentše; chana, chabe jajoye ibojíchmuca cotšēnga jtsanÿenama. ¹⁶Chē bobontsna yojtseboše chē cotšbe saná jtsesana, pero ndocná tondaye ibonjanájuatšnaye.

¹⁷ “Cabana, botamana yojinÿe ntšamo yojtsepasacá, y mēntšá yojenójuaboye: ‘¡Bueta trabájayēnga atšbe taitabe yebnentše bētsá saná mondētsóbomñe, y atše muentše shēntsama chanjóbana ca! ¹⁸Chantá atšbe taitabe yebnoye y mēntšá cha chanjauyana: Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá. ¹⁹Mora ya merecido taitatobuajoñe acbe uaquiñá jtsabáinama; nÿe canÿe acbe trabajayacá Diosmanda šmatofja ca.’ ²⁰Chca jēftsenójuaboyēse, yojontsé cachabe yebnoye jtana.

“Cabá bēnoça yojtsemna ora, chabe taitá chábioye ibojinÿe, y chabe uaquiñabiamia ibojóngmia, y jajébenguama betesco yojá; ibojajebengo, ibojtotsejcuá y tša yojtsóyejuayayama chē uaquiñábioye ibojtámocho. ²¹Chora chē uaquiñá ibojauyana: ‘Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’ ²²Pero chē Taitana chabe oservénēnga yojámēndaye: ‘Betsco chē más tšabe entšayá mauaca y matspormanga, montšabuechētjo y matsshecochētjo. ²³Mora chē

más minyica uacná šmochjuánatse y šmochjášhua. ¡Mochjase y mochjóboyejuaye ca! ²⁴ Quem atšbe uaqiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaqiñá mo otšenacá endánmëna y mora tmontsinyëna ca.’ Y chentšana imojontšé joboyeuayama.

²⁵ “Chë yebnoca fiesta yojtsemnëntscuana, chë mayor uaqiñana jajoca inétsomñe. Yebnoye yojtsataye y ya bëconana yojtsemna orna, cha yojouena imojtsabuastoye y imojtselántsaye. ²⁶ As chora cha canyë oservenábioye ibojachembo y mëntšá ibojatjaye: ‘¿Ndayá bëngbe yebnentše yojtsopasana ca?’

²⁷ “As chë oservená ibojojuá: ‘Acbe uabentsá tontashjango y chama acbe taitá šonjutarié chë más minyica uacná jáshbuama, cha tšabá tojtashjanguama ca.’ ²⁸ Pero chë uabóchena catšatna corente ibojtsetna y ndoñe yontseboše tsoye jtamashënguana. As cach befta yojábocna chë catšátbioye jaimpádama chauatamashënguama. ²⁹ Chora cha chë taitábioye ibojauyana: ‘Taita, aca condétatšëmbo bueta uata cbetsajabuáchanama, nyëts tempo cbetseyeunanama, pero ndocna te ni mo canyë chivotema chešcaisatštá atšbe amiguëngaftaca joboyeuayama. ³⁰ Y masna, acbe uaqiñá chë bacna vida bomna shembásengaftaca acbe crocénana pochocayá tojtashjango ora, chë más minyica uacná chabiamá tcojášhua ca’ —chë uaqiñá ibojauyana.

³¹ “Chora chë befta ibojojuá: ‘Atšbe uaqiñá, aca sempre átšeftaca condétsemna y lempe ntšamo

atše tsbomncá acbiámnaca endmëna. ³² Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinÿena ca.’ ”

16

Chë nduiñbe ndoñe tšabe uajabuachanábiama cuento

¹ Jesús mëntsánaca chabe uatsjëndayënga tojanacuntá: “Inamna canÿe bomna entsá, y cha ibnabomna canÿe uajabuachaná chabe soyënga chaotsinÿenama; y chë nduiño imojuenaye chë uajabuachaná chabe soyëngaca ndoñe tšabá yontsamama. ² Asna, chë nduiño ibojachembo y mëntsá ibojauyana: ‘¿Ntsámo acbiama šmontsatsëtsnacá ndegombre yojtsemna ca? Mora cuenta šmatatštá ntsámo atšbe soyëngaca tcojamama, er morscana ya ndoñe atšbe soyënga inÿená quecochátsmëna ca.’ ³ Chë uajabuachaná yojontsé jenójuaboyana, y mëntsá yojeniyana: ‘¿Y mora ntsámo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sëntsëuatja. ⁴ Ya séntsetatšëmbo ndayá chjama, chca, atšbe trabajuentšana chašojtábocna ora, atše jtsabamnana ndëmuanÿenga chëngbe yebnentše chašmofjama ca.’

⁵ “Chentsana, canÿánÿa chë chabe nduiñbioye ndebénënga yojáchembo. Cánÿabioye ibojatjaye: ‘¿Ntsachetšá atšbe nduiño icondebena ca?’ ⁶ Y cha ibojojuá: ‘Canÿe patse barrilëshangá aceitiye ca.’ As cha ibojauyana: ‘Muentše

acbe recibécha entsamna; mora mótbema y inyácha nýe shachna bnétsana barrilëshangama matapormá ca.’ ⁷ Chentsana ínýabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canýe patse medida trigo ca.’ As cha ibojauyana: ‘Muentše acbe recibécha entsamna; chiñe nýe posufta bnétsanama mábema ca.’ ⁸ Chentsana, chë nduiño tšabá yojayana chë ndoñe tšabá ama mayordombiama, cha stúdioca yojamama. Chë nýe quem luarama enójuabnaye entšanga, cachëngbe soyëngaca puerte studio bomnënga mondmëna; y chë entšangbe juabnënga binýnáyabenga ndoñe nýa yapa ca.

⁹ “Atše cbaúayená, quem luarentše, chë bacna soyënga amëngbe luarentša bomnánaca amiguënga šmochjábiama, ínýenga jtsëjabuáchanëse. Chca, chë bomnana tojtsopochocá ora chašmotsabamna ndëmuanýenga chë nýetsca tescama oyenoye chacmúbuajama ca.

¹⁰ “Nda básefta soyënguiñe lempe tšabá tojama, bëtscá soyënguíñnaca lempe tšabá echanjama; y nda básefta soyënguiñe ndoñe tšabá tonjama, bëtscá soyënguíñnaca cach ndoñe tšabá queochatsma. ¹¹ Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanýiye? ¹² Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiamama yomncá ca?

¹³ “Ndocná ntsobenana uta mandayata

jtsaservénana; er cánÿabioye bochantśáboyënja y chë ínÿabioyna bochantsebobonshana, o cánÿabiamna tśabá echántsetrabajaye, y chë ínÿabiamna ndoñe tśabá. Ndoñe quecátobena Bëngbe Bëtsá jtsebobonshánana, nÿe quem luarentśa soyënga jtsebomnama tcojtsebošëse ca” —Jesús tojánayana.

¹⁴ Chë fariseunga, becá crocénana jtsebomnama bošënga innamna, lempe chca chënga tmojanuena, y Jesúsbioye imojtsáboyejuana. ¹⁵ As Jesús tojanëyana: “Tšëngaftanga entšangbe delante mo tśábenga cuaftsemncá jtse nobiamnayana, pero Bëngbe Bëtsá endëtatsëmbo ndayá tšëngaftangbe ainaniñe yomnama; er ndayá entšanga más tojtsebošcá, Bëngbe Bëtsá jtsáboyënjana ca.

Moisesbe ley y Bëngbe Bëtsabe amëndayana

¹⁶ “Moisesbe ley y chë Bëngbe Bëtsabe juabna oye buambnayënga tšëngaftanga cmonjanabuayiyná, Juan chë Ubayaná quem luaroye tonjánabëntscuana. Cha tonjánabo orscana montsabuyaiyná chë tśabe noticiënga Bëngbe Bëtsabe amëndayocama, y nÿetscanga tśa montseboše choye jamashënguama ca.

¹⁷ “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canÿe punto ndoñe chca chaondëtsemnama ca” —Jesús tojánayana.

Ndayá Jesús tojanabuatambá chë bouamnënga tmojtseñëtšenama

(Mt 19.1-12; Mc 10.1-12)

¹⁸ “Nda chabe shëmbioye cachcá tbojesonÿá y ínÿaftaca tojtóbouamase, cha chë natsana

shémbioye ínÿaftaca jtseíngñayana; y nda chë útsena shembásaftaca tojobouamá chana, canÿe uabuatmá jtsebomnana, y chca, chana canÿe bacna soye jtsamana ca” –Jesús tojánayana.

Chë bomná y chë ndbomnëjema Lázaro

¹⁹ “Canÿe bomna entsá inamna; cha yojanamana uámana y botamana shbuenda uafjatsenga y lino entsayangá jtichëtjuana, y cada te bëts fiestënga yojánama. ²⁰ Canÿe ndbomnëjémnaca inamna, Lázaro ca uabainá, bacna nguayanánaca šocá; y cha yojanamana chë bomnabe bësásentše fshantsiñe jótbemana. ²¹ Quem ndbomnëjema yojtseboše chë bomná yojtsesayentšana yojatquëcjana sanángaca jtoshachayana; y chë quešënga imnaboje chabe nguaye cuerpo jajáfjuama. ²² Canÿe te Lázaro yojtsóbana, y Bëngbe Bëtsabe angelënga Abrahámboye cha imojtamba, chë nÿetscanga oyejuayënga mondmëna luaroye. Chë bomnánaca yojóbana y imojuátbontsa.

²³ “Chë bomná infernoca puerta ngméniñe yojtsesufrina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna. ²⁴ As chë bomná yoyuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša sëntsesufrina ca.’ ²⁵ Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y

oyejuayá entsemna, y aca jabuache ngménana contsebmna. ²⁶ Y inye soye, canye bêts tbuañe entsemna tšëngaftangbiocana mentscoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana bëngbioye cach ndoñe ca.’

²⁷ “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; ²⁸ choca sëndábamna shachna catsátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngménënga luaroye jabama ca.’ ²⁹ Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsanábema soyënga; jchëngbioye chamoyauná ca!’ ³⁰ Chë bomná ibojojuá: ‘Ndoñe, Taita Abraham; nderado obanënguentšana canya chëngbioye tojase, aíñe chë tšabe benache muantishache ca.’ ³¹ Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” — Jesús tojancuentá.

17

Resjo yomna, nderado bacna soyënga cuanjama (Mt 18.6-7, 21-22; Mc 9.42)

¹ Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, jtsa lastema chë entšabiamana ndabe

causa ínÿenga bacna soyënga tmojama! ² Más tšabá chabiana nántsemna canÿe nantsnëbé chamotsetamošëntšbua y mar béjayoye chamotsashbuetše, y ndoñe chë canÿa Bëngbe Bëtsábeñe ošbuachiyá bacna soye chaomama juanatsana. ³ Cuedado šmochtsebomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. ⁴ Masque nÿe canÿe te, canÿsëfta soye ntšámnaca tcmojaborlá, y canÿsëfta soye ‘chca ndoñe más quebochatsbólra ca’ tcmojauyanëse, aca cmontsemna cha jtseperdónana ca” —Jesús tojánayana.

Bëngbe Bëtsábeñe jtsošbuáchiyëse, corente obenana jtsebomnana

⁵ Chë uatsjëndayënga Bëngbe Utabnábioye tmojaniyana: —Ošbuáchiyana šmababuaté ca.

⁶ Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashitse y mar béjayoca mojé ca”, y quem betiye chca nanjama ca.

Chë oservená ndayá ibomna jamana

⁷ “Nderado canÿa tšëngaftanguentšá canÿe bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca’? ⁸ Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase

y cochjofsiye ca.’ ⁹ Y chë bochichnayábioye ndoñe quebochtétschuaye ndayá tbojuatariecá cha tojamama. ¹⁰ Tšëngaftágnaca cachcá, lempe ntšamo Bëngbe Bëtsá tcmojutariecá chašmojama ora, cmontsamna jayanana: ‘Nduámana oservénënga fsëndmëna; er nyë ntšamo jamama šuamncá tifjama ca’” —Jesús tojánayana.

Jesús, bnëtsanënga bacna nguayanánaca šoquënga tojanashná

¹¹ Jerusalenoye benache, Jesús tojánachnëngo Samaria y Galilea luarëjana. ¹² Y canyë pueblotémoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, ¹³ y mëntšá imojtsáyebuache: — ¡Jesús, Buatëmbayá, šmotsalastemá ca!

¹⁴ Jesús chënga tojánanyë ora, tojanëyana: — Jerusalenoca bachnángbioye motsajna, y chënga šmochjínnyanýiye tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. ¹⁵ Canya chënguentsá, shnaná yojtsemnama tojáninýe ora, yojesshëcona Bëngbe Bëtsábioye jabuache atschuanaye; ¹⁶ y Jesusbe delante yojoshëntsamentsiye, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entšá inamna.

¹⁷ Chora Jesús tbojaniyana: —Bnëtsanënga mondmëna chë shnánënga tmontoquedanga. ¿Ndayentšë chë inýe esconëftanga imojtsemna?

¹⁸ ¿Nyë quem boyabása, inýe luarocana

ashjangoná, tojesshēcona Bēngbe Bētsá jētschuayama? ¿Ndáyeca chē ínŷenga ndoñe ca?

¹⁹ Y chē entsábioye tbojanियana: —Matētsbaná y motsatoñe; Bēngbe Bētsábeñe aca icošbuachéyeca shnaná contsatsmēna ca.

Ntšamo Bēngbe Bētsabe amēndayana yochjóshjango

(Mt 24.23-28, 36-41)

²⁰ Canŷe, chē fariseunga Jesús tmojantjá, mocna ora chē Bēngbe Bētsabe amēndayana yochjanóshjanguama; y cha tojanējua: “Bēngbe Bētsabe amēndayana chaojóshjango ora, tšēngaftanga ndoñe quešmochatobenaye chca jinŷana. ²¹ Chora ndoñe quemochátichamo ‘Muentše entsemna’ o ‘Choca entsemna ca’; er Bēngbe Bētsabe amēndayana ya tšēngaftangbeñe entsemna ca” —cha tojánayana.

²² Jesús chabe uatsjéndayēnga tojanēyana: “Canŷe tempo echanjóshjango, y chora tšēngaftanga šmochántseboše canŷe te jtsebomnana, ntšamo chē Bēngbe Bētsá Entšá tbojanbemá tšēngaftangbeñe enjēftsemna orcá; pero chora ndoñe chca queochatóshjango. ²³ Chora báseftanga mochántšichamo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto. ²⁴ Er chē tojatcuinŷe ora, ntšamo celoca catoica juachoica tojabuashinŷinŷenacá, chca echántsemna chē Bēngbe Bētsá Entšá tbojanbemá quem luaroye chaojésabo te. ²⁵ Pero natsana cha bontsemna puerte jasúfriana, y morsca entšangbiana uabotená jtsemnana.

26 “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. 27 Chë tempo, entsanga imnasaye, imnofšëšnaye, imnóbouamnaye; natjëmbana imojtsiyëne, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entsanga tojtsanapochocá. 28 Cachcá ntšamo Lot yojaniyena ora tojanopasacá: entsanga imnasaye, imnofšëšnaye, imnóbouamnaye, imojtsena, sananga imnajena y imnajebuana; 29 pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana íñeshe y azufre chauaftema, y chentša entsanga tojtsanapochocá. 30 Cachcá echántsemna chë Bëngbe Bëtsá Entšá tbojanbemá chaojtonýná ora.

31 “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebomñëse, chocana ndoñe chaondétastjango chë soyënga jesabobocnama; y nda jajoca chaojtsemna, yebnoye ndoñe chaondéta. 32 Menójuabonga ntšamo Lotbe shémaftaca tojanopasama. 33 Nda tojtsentšena quem luarentše bëts cá jtsebomnama y atšbiana jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nyetsca tescama yomna tšabe vida echántsebomna.

34 “Atše cbëyana, chë ibeta, chë Bëngbe Bëtsá Entšá tbojanbemá chaojtonýná ora, útata canýe

jutsnëshañe bochántsemna; canÿa mochanjesbetše y chë ínÿana ndoñe. ³⁵ Uta shembásata cánÿiñe bochántsejanÿcoye; canÿa mochanjesbetše y chë ínÿana ndoñe. ³⁶ Uta boyabásata jajoca bochántsetrabajaye; canÿa mochanjesbetše y chë ínÿana ndoñe ca” –cha tojanëyana.

³⁷ Chora chë uatsjéndayënga Jesús tmojantjá: – Utabná, ¿ndémoca chca yochjopása ca?

Y cha tojanjuá: –Chë obanabe cuerpo tojtsementše chë gallinacënga jojotana ca.

18

Chë viudá y chë mandadbiama cuento

¹ Jesús mëntśá tojanacuntá, entsanga jabuátambama, Bëngbe Bëtsáftaca nÿets tempo jtsencuéntayana yomnama, ainaniñe añemo jtsebomnama ndocna te ntjajbanacá. ² Mëntśá tojánayana: “Canÿe pueblentše canÿe mandado inamna; chana ni Bëngbe Bëtsábioye ndoñe bonjánebiauatja, ni entsanga yonjánayaunana. ³ Chë pueblentše canÿe viudánaca inamna; chana canÿe demanda yojánbomna. As chë mandádbioye yojobeconá y mëntśá ibojauyana: ‘Diosmanda atšbe uayayá motsecastigá ndayá šojaborlama ca.’ ⁴ Bayté chë mandado ndoñe yonjábosena chë viudábioye joyeunayama; pero chentšana cha yojenójuaboje: ‘Masque Bëngbe Bëtsá ndoñe quetsátebiauatja, ni entsanga ndoñe quetsátayaunana, ⁵ pero quem viudá cada ora endabó causa, aíñe chanjóyeunaye, chabe uayayá chanjacastíga; ndóñesna cada te nandaboje y cabana ya šochanjanamëntša ca.’ ”

6 Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. 7 Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínÿengbe causa montsesufrina y cada te Bëngbe Bëtsá mondbétseimpadana chaújabuachama. ¿Más chamuatobatmá ca yochjáuyana? 8 Atše cbëyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínÿengbe causa mora šmojtseufrínënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entšanga yochjánÿena ca?” –Jesús tojánayana.

Chë fariseo y chë Romocama impuesto atjanayabiama cuento

9 Báseftanga imojtsanjuabná chënga tšabe entšanga immamna ca, pero chë ínÿengbioye imojtsëbuayënja; chíyeca Jesús mëntšá tojanacuntá jabuátambama: 10 “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entšángbioye impuesto atjanayá. 11 Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, cbontsatschuaná atše chë inÿengcá ndoñe quetsatsmënama: atbëbanënga, puerta bacna soye amënga y shémbioye ínÿaftaca íngñayënga; y ni quem Romocama impuesto atjanayacá ndoñe quetsatsmënama. 12 Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentšana, bnëtsanentšana canÿe soye acbiana sëndëquëcjiná

ca.' ¹³ Pero chë Romocama impuesto atjanayana, bënoca yojtsemna, ni celoye ntjontješiyca, yojtsenócochjantšetaye y mēntšá yojtsichamo: '¡Atšbe Bētsá, šmotselastemá, atšajema bacna soye amá tsmēna causa ca!' ”

¹⁴ Chentšana Jesús tojánayana: “Atše cbēyana, quem Romocama impuesto atjanayá chabe yebnoye tojtaná chabe bacna soyēngama perdonaná, pero chë fariseo ndoñe. Er nda cachá bētsá tojtsenobiamná, nduamaná mochántsebema; y nda cachá nduamaná tojtsenobiamná, aīñe bētsá mochanjábema.”

Jesús, basetémēngbiana Bēngbe Bētsábioye tbojan-impadá

(Mt 19.13-15; Mc 10.13-16)

¹⁵ Entšanga imojanamana Jesúsbioye basetémēnga junatsana chauabájajuama, y Bēngbe Bētsábioye chēngbiana chaboimpadama; pero chë uatsjéndayēnga chca tmojáninýe ora, tmojanontšé chë basetémēnga unachayēnga jtsēcácanana.

¹⁶ Pero Jesusna chë basetémēnga tojánachembo, y mēntšá tojánayana: “Cachcá mónýaye chë basetémēnga átšbioye chamuabo, y ndoñe matéuyanana; er Bēngbe Bētsabe amēndayana endmēna chë mo quem basetemēngcá imomnēngbiana. ¹⁷ Ndegombre cbēyana, nda Bēngbe Bētsabe soyēnga ndoñe tonjóyēngacñe mo canýe basetemcá jtsošbuáchiyēse, cha ndoñe queochatobenaye Bēngbe Bētsabe amēndayoye jamashēnguama ca.”

Canýe bomna entšá Jesúsbioye tojána
(Mt 19.16-30; Mc 10.17-31)

18 Canye mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

19 Y Jesús tbojanjuá: —¿Ndáyeca šcjauyana “tšabia ca”? Tšabia nýe canya endmëna: Bëngbe Bëtsá. 20 Aca condëtatšëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, ndoñe catjuaboínÿena y acbe bëtsëtsata ndoñe stëtšoye catjáquedaye ca.”

21 Chora chë boyabása tbojanjuá: —Atše lempe chca básetema orscana sëndocumplina ca.

22 Jesús chca tojanuena ora, tbojaniana: —Cabá canye soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomñëjémënga cochtsatšataye; chca, celoca canye bëts bomnana cochántsebomna. Chentšana, cochjabo y šcochjuasto ca.

23 Chë entšá chca tojanuena ora, puerte ngmënaca yojtsemna, er cha corente bomná inamna. 24 Chca ngmená tbojáninÿe ora, Jesús tojánayana: —¡Yapa totcá bomnëngbiana entsemna Bëngbe Bëtsabe amëndayoye jamashënguama! 25 Ndegombre, más paselo endmëna canye camello chë coshufjentša atëfjnëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

26 Chora, chë chca imojouenënga tmojánayana: —¿As nda yochjobenaye atsbočaná jtsemnana ca?

27 Y Jesús tojanëjua: —Ndayá entšanga ndoñe mondobena jamana, Bëngbe Bëtsá aíñe endobena jamana ca.

28 Chora Pedro, Jesúsbioye tbojanियana: — Běngbe Utabná, aca contsonyá, bēnga lempe chē fsēndbomna soyēnga fsēnjéseboshjona, y ácaftaca fsēntsajna ca.

29 Jesús chora tojaněyana: —Ndegombre cběyana, ndánaca Běngbe Bětsábioye jaserviama, chabe aměndayama jtsabuayiynayēse, cachcá tojěftseboshjona chabe yebna, shema, catsátanga, bětsětsanga o básenga, ³⁰ cha mora quem luarentše chē soyēngama más echanjóyēngacñe, y chē inye luarocna, chē nýetsca tescama yomna tšabe vida ca.

Jesús cachiñe tojánayana cha jóbanama y jtayenama

(Mt 20.17-19; Mc 10.32-34)

31 Jesús chabe bnětsana uta uatsjěndayēnga barie tojánachembo, y mēntšá tojaněyana: “Smontsetátšěmbo mora Jerusalenoye bēnga montsajnama, y choca lempe echanjochnēngo ntšamo chē Běngbe Bětsabe juabna oye-buambnayēnga, chē Běngbe Bětsá Entšá tbojanbemabiama tmojanabemcá; ³² er choca cha chē ndoñe judiēngbe cucuatšiče mochanjáboshjona, y mochantśáboyejuana, mochanjóyenguango, mochantsebuashěttoj; ³³ y chamojátjanjentsana, mochanjóba, pero unga tianoye cha echántayena ca.”

34 Chē uatsjěndayēnga tondaye tonjaněsertá, ni montsetátšěmbo ndayá bětsemnana ntšamo Jesús yojtsětsětsnacá, er chēngbiamna yojamna josértama ndopodena soyēnga.

Jesús, Jericó puebloca canye jtanábioye tbojan-shná

(Mt 20.29-34; Mc 10.46-52)

³⁵ Tojanopasá, Jesús Jericó puebloye yojtsebéconaye ora, canye jtaná benache juachañe inatbemana, lemošna otjanañe. ³⁶ Entšanga chějana imojtsachnějuanama tojanuena ora, yojanotícia ndayá yojtsopasana ca, ³⁷ y chë entšanga tmojaniana, —Jesús Nazaretocá entsebeconá ca.

³⁸ As cha yojontšé uayebuáchana: —¡Jesús, Davídbentšana Entšá, šmotselastemá ca!

³⁹ Chë natsana imojtsajnënga chë jtaná imojtsácacana, iytëca chaóbemama; pero cha más yojtsáyebuache: —¡Davídbentšana Entšá, šmotselastemá ca!

⁴⁰ As Jesús tojantsá y tojanmandá cha chamobetšama. Cha ya bécoñe yojtsemna ora, Jesús tbojantjá: ⁴¹ —¿Ndayá cojtseboše atše acbiana chjamama ca?

Y chë jtaná tbojanjuá: —Atšbe Utabná, atše sëntseboše chašuatabinñnama ca.

⁴² Chora Jesús tbojaniana: —Matinje, Bëngbe Bëtsábeñe betsošbuachéyeca shnaná contsatsmëna ca.

⁴³ Y cachora cha tšabá ibojtabinñna, y Jesúsbioye ibojtsëstona, Bëngbe Bëtsá atschuanaye. Y nyetsca entšanga, chca tmojáninje ora, Bëngbe Bëtsá imojtsatschuanaye.

19

Jesús y Zaqueo

1 Jesús Jericó puebloca tojánashjango ora, chë pueblëjana cha yojtsachnëjuana. 2-3 Chora, canÿe bomna entsá, chë Romocama entsanga impuesto atjanayëngbe amëndayá, Zaqueo ca uabainá, yojtseboše Jesús jinÿama. Pero ndoñe yontsobena jinÿama, bëtsá entsanga causa y cha becu inamna causa. 4 Chcasna, cha betscó natsanoye tojaftsánótjajo y canÿe sicomoro betiyeshoye tojánašëngo, chca, Jesús chëjana tojtsachnëjuana ora, jinÿama jobenayama. 5 Jesús chë betiyeshoye tojánashjango ora, tsbanánoye tojanontješé y Zaquéobioye tbojáninÿe. As Jesús tbojanianyana: “Betsco chocana matastjango, Zaqueo, er mënté chanjá acbe yebnoye jatema ca.”

6 Chora Zaqueo betscó tojtanastjango y chentšana puerta oyejuayá Jesúsbioye tbojanofja. 7 Entšanga chca tmojáninÿe ora, tmojanontsé Jesusbe contra mëntšá ichámuana: “Jesús tonjá canÿe bacna soyënga amabe yebnentše jatema ca.”

8 Chora Zaqueo tojantsá, Bëngbe Utabná Jesúscentše, y mëntšá tbojanianyana: —Mouena, atšbe Utabná, atšbe bomna soyënguentšana tséntsañe ndbomñëjmënga chanjátšataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

9 As Jesús tbojanianyana: —Mënté, aca acbe bacna soyënguentšana atsbočaná contsemna, er Zaqueo, ácnaca Abrahámbentšana entsá condmëna. 10 Er chë Bëngbe Bëtsá Entšá tbojanbemá tojabo chë pochocánënga jtsemnana imojtsajnënga jabétsanguanguama y jabátsebacama ca.

Chë crocenánama cuento
(Mt 25.14-30)

¹¹ Entšanga chë soyënga imojtsuenana, y Jesús inÿe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

¹² Jesús tojanëyana: “Canÿe luarentša uámana entšá inÿe bën luaroye yojá, cachabe luarentša rey chamobemama y chentšana cachábioye jtama.

¹³ Cabá nda ora, chabe bnëtsana oservénënga yojáchembo y bëtscá crocénana cada cánÿabioye yojëftsayentšbuachiye, y mëntšá yojëftsëyana: ‘Quem crocenánaca trato šmochjábema atše candëtabëntscuana ca.’

¹⁴ Pero cachabe luarentša entšanga cha imojuáya, as chëngna básefta entšanga imojichamuá chë inÿe bën luaroca mëntšá chamuayanama: ‘bënga ndoñe queftsátsboše cha bëngbe rey chaotsemnama ca’.

¹⁵ “Pero pronto chë luarentša rey cha imojábema. Y chë luaroye yojtá orna yojamánda chë crocénana yojëftsayentšbuáchenga chamobéconama, jtsetatšëmbuama ntsachetšá cada ona chë crocenánaca yojongánama.

¹⁶ Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’

¹⁷ Y chë rey ibojojuá: ‘Tša tšabá, tšabe oservená. Aca quem base soyiñe ntšamo tchojamandacá tšabá tcojámayeca, bnëtsana pueblentša mandado chacotsemnama cbojayé ca.’

¹⁸ Chentšana inÿa yojáshjango y yojayana: ‘Taita, acbe crocénana shachna soye más tonjoboté ca.’ ¹⁹ Y chë

rey ibojauyana: ‘Acnaca shachna pueblentša mandado cochántsemna ca.’

²⁰ “Chorna inŷa vojobeconá y mēntšá vojayana: ‘Taita, muentše acbe crocénana entsatsmēna; canŷe pañueléjuañe bonguana sēntsejajo.

²¹ Atše acbiama uatjana šonjuábuache, er aca canŷe tšátjaye entšá condmēna; aca chē ndoñe condbuajonentšana jocñana y chē ndoñe tconjajé luarentšana jaja saná jobuátbanana ca.’ ²² As

chē rey ibojauyana: ‘Bacna oservená, cach acbe palabréngaca chanjínŷanŷiye aca ndoñe tšabá tconjamama. Atše chē ndoñe sēndbuajonentšana jocñana y chē ndoñe sēnjajé luarentšana jobuátbanana tsuamanama icojátatšēmbēse,

²³ ¿ndáyeca ndoñe tconjá chē crocénana bancoca jetsobuájuama, y atše camoye matijtabo ora, mašctoyé chē crocénana y chē chentšana tojoboté crocénanēnaca ca?’ ²⁴ Y chē chentše imojtsemna entšanga yojáuyana: ‘Chē crocénana motseboca y chē bnétsana soye más tojabotébioye chana motsatšetá ca.’ ²⁵ As chēnga imojojuá:

‘¡Pero cha ya bnétsana soye más entsebomna ca!’ ²⁶ Y chē rey yojójua: ‘Atše cbēyana, nda tojtsebomnábioye, más mochanjátšetaye; pero nda tondaye tondbomnábioye, chē tojtsejuabná batšatema yobomna sóynaca mochántseboca ca.

²⁷ Y chē atše uayayēnga, chē chēngbe rey atše chaitsemnama ndoñe monjánbošēngna, moye mēnatse y atšbe delante šmochtsēbaye ca’ ” –cha chora vojayana.

*Jesús Jerusalenoye tojánashjango
(Mt 21.1-11; Mc 11.1-11; Jn 12.12-19)*

28-29 Chca tojěftsanayana chentšana, Jerusalemoye vojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjéndayata tojanichamó, ³⁰ mēntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Sochjuajafjoná y šochjuánatse. ³¹ Y nderado nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’ ”

³² Chë uatsjéndayata tbojána y lempe ntšamo Jesús tojanëyancá tbojáninýena. ³³ Y chë burrotema imojtsajafjná orna, chë burrotema nduiñënga tmojanéyana: —¿Ndáyeca chë burrotema šojtsajafjná ca?

³⁴ Chora chata tbojánayana: —Bëngbe Utabná bontsajabótoyeca ca.

³⁵ Chentšana Jesúsbioye chë burrotema tmojanánatse, y chë burrotémbeñe chatbe entšayá tbojanájatse, y chábeñe Jesús tmojanenjayé. ³⁶ Y cha yojtsachnějuana ora, entšanga chëngbe entšayá benachëjana imojtsëtëtsatsana.

³⁷ Olivos tjashe tsmanoye yojtsebeconá ora, chë bëtscá entšanga, Jesúsbeñe ošbuáchiyënga, tmojanontsé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. ³⁸ Chënga mēntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo

Rey ca! ¡Celoca tšabá entsemna! ¡Bëngbe Bëtsá matschuanga ca!”

³⁹ Chë entsanguentše básefta fariseunga imojtsemnënga, Jesús tmojaninyana: — Buatëmbayá, acbe ústonënga mëcácana chca ndoñe chamondëtsáyebuachama ca.

⁴⁰ Pero Jesús mëntsá tojanëjua: —Ndegombre cbëyana, mënga iytëca tmojobiamëse, chë ndëtsbënga muanjuayebuáchena ca.

⁴¹ Jesús Jerusalén béconana tojánashjango, y chë bëts pueblo tojáninye ora, chentša entsangbiana tojánenobošachna. ⁴² Y mëntsá tojánayana: “¡Malaye šmëntsetátšëmbo, nýe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominyama entsëitëmena.

⁴³ Er Jerusalemoca bacna tenga echanjóshjango; chora uayayënga chentša shëconánëjana canýe tapiëse mochantsepórma, mochantsejëtja y nýetsca juachoicana mochanjontsé tšëngaftanga jtsatsejana, ⁴⁴ y lempe mochantsepochóca. Muentša oyenënga mochantsëbaye, y ni mo canýe ndëtsbé inýebé juatsboca quemochaiseboshjona, chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

Jesús, Bëngbe Bëtsabe bëts yebnentsana enënga y obuámnayënga tojtanëbuacna

(Mt 21.12-17; Mc 11.15-19; Jn 2.13-22)

⁴⁵ Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtsenënga chentšana jtëbuacnana, ⁴⁶ y

tojanéyana: “Bëngbe Bëtsá chabe uabemana palabrénguiñe tojayana: ‘Atsbe bëts yebna echántsemna átseftaca encuéntaye yebna ca’, pero tsëngaftangna, atbëbanëngbe oyeniñe chë yebna šmojtsebema ca.”

⁴⁷ Y cada te, Bëngbe Bëtsabe bëts yebnentše Jesús entsanga yojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana. ⁴⁸ Pero ndoñe tmonjáninyëna ntšamo, er nyëtsca entsanga corente imojtseyeunana ntšamo cha yojtsoyebuambnacá.

20

Jesube obenana

(Mt 21.23-27; Mc 11.27-33)

¹ Canye te, Bëngbe Bëtsabe bëts yebnentše Jesús yojtsabuátambaye, y chë tsabe noticiëngama yojtsabuayiyiná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cányiñe; ² y Jesús tmojanियana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

³ Chora Jesús tojanëjua: —Atšnaca canye soye sëntsebomna tsëngaftanga jatjayama. Smochjojuanga. ⁴ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca?

⁵ Chora chënga tmojanontsé enatsëtsnayana: “ ‘Bëngbe Bëtsá ca’ chamojojuase, cha

šochanjáuyana: ‘As ¿ndáyeca chábene ndoñe šmonjanošbuaché ca?’ ⁶ Y ndoñe quemuátobena jayanana ‘entsanga ca’; entsanga ndëtsbéngaca buattsébaye, er nÿetscanga becá mondëjuabná Juan ndegombre Bëngbe Bëtsabe juabna oyebuambnayá yojamna.” ⁷ Chcasna, chënga tmojanjuá ndoñe monjántatsëmbo nda Juan tbojanichmó entsanga jubáyama ca.

⁸ Y Jesús tojanéyana: –Asna atše cach ndoñe quebochatéyana ndaye deréchoca chca stsama ca.

*Chë puerte bacna trabájayëngbiana cuento
(Mt 21.33-44; Mc 12.1-11)*

⁹ Chentsana Jesús tojanontsé entsanga jáuyanana, y quem cuéntoca tojanabuatambá: “Canÿe entsá uvas betiyënga yojáje y chë fshantse inÿe trabájayënga yojúyentsame, y baytescama bën luaroye yojtsoñe. ¹⁰ Chë uvasësangá juashacama tempo yojobuache orna, chë jajañe nduiño canÿe oservená ibojíchmua chë trabájayënga jáuyanama ntsachetsá cha ibojtsotocánama. Pero chëngna cha imojtsejantšetaye, y tondaye ntoyiyá imojtichmuá. ¹¹ Chentsana inÿa ibojíchmua; pero chë trabájayënga cha imojtsejantšetaye, imojtsóyenguango, y tondaye ntoyiyá imojtichmuá. ¹² Chë nduiño inÿa ibojatichmuá; pero chánaca chënga imojtsejantšetaye, imojtselisia, y chentsana imojtábocna.

¹³ “Chora chë nduiño yojeniyana: ‘¿Y mora ntsamo chjama ca? Cach atšbe bonshana uaquiñá chanjíchmua; nderádose cha aíñe mochanjóyeunaye ca.’ ¹⁴ Pero chë trabájayënga, chë uaquiñá imojinÿe

orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjójyëngacñe; motsóbanga y nyetsca chabe otocana soyënga bëngbiana echanjoquéda ca.’ ¹⁵ Chcasna, chë uvas jajañentšana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabajayëngaftaca yochjama ca? ¹⁶ Cha co echanjá y chë trabájayënga echanjetsëbaye, y chë uvas betiyënga jajañe inye trabájayënga echanjárrendaye ca.

Chë entšanga chca tmojanuena ora, tmojánayana: —¡Bëngaftaca ndocna te chca chaondopasá ca!

¹⁷ Pero Jesús tojanënyanyé y tojánayana: —As ¿ndayama Bëngbe Bëtsabe uabemana palabrenguñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona ca.

¹⁸ Ndánaca chë ndëtsbeñe chaojotsatsá, chëbé bochántsatcacaye; y chë ndëtsbé ndábeñnaca chaojótsatše, polvëshe bochántsebema ca —Jesús tojánayana.

¹⁹ Chë bachnangbe amëndayënga y ley abuatambayënga tmojanenótatšëmbona Jesús chca tojanacuntá jinýanyiyama, chënga mo chë puerte bacna trabajayëngcá imojamnama; asna tmojánbošena cachora jishachana, pero entšangbiana imojtsauatja.

Chë Romoca bëts mandadbiama impuesto jtsat-squëcjnayama

(Mt 22.15-22; Mc 12.13-17)

²⁰ Chentšana chënga báseftanga tmojanichamó, mo ndegombre tšabe entšanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama.

²¹ As chënga tmojantjá: — Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiana tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebomnama, ntšamo Bëngbe Bëtsá yomandacá.

²² Chcasna, šmëyana, ¿tšabá tayojtsemna bënga, César, chë Romoca bëts mandadbiama, impuesto jtsatsquëcjnayana o ndoñe ca?

²³ Jesús yojtsetátšëmbo, ntšamo cha tojayaniñe jisháchichiyama chënga imojtsebošama; as tojanëyana: ²⁴ —Chë šmatsquëcjná crocénana šminÿinÿenga ca; ¿ndabe jubiá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

²⁵ Y Jesús tojanëyana: —César šmoctoyiye cha ibotocana soye; y Bëngbe Bëtsana cha ibotocana soye ca.

²⁶ Y chca, chë ichmónënga ndoñe imonjobe-naye jisháchichiyana, ndayá cha entšangbe de-

lante tojayaniñe. Masna, ntšamo tojanējuama, ojnánänënga iyteca imojobiamá.

Obanënga jtayenama Jesús tmojantjá
(Mt 22.23-33; Mc 12.18-27)

²⁷ Chentšana, báseftanga saduceo ca uabaina entšanga tmojána Jesús jinýama. Chënga imojanjuabná obanënga ndocna te ntayenana ca. Jesús mëntsá tmojantjá: ²⁸ —Buatëmbayá, Moisés bëngbe leyënguñe tojëftsabema, nderado canýe boyá tojtsóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chë chabe uabochená obanabiamá básenga jtsabamnama ca. ²⁹ Chcase, canýe bëngbentše canýsëfta catšátanga monjamna. Chë natsaná tonjanobouamá y tontsanóbana, básenga ntjëftsabashejuancá; ³⁰ chentšana chë inýa chë shémaftaca tonjanobouamá, y cachcá tonjanopasá. ³¹ Chë inýe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inýe uabentsëngnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. ³² Cabana, chë shembásanaca tontsanóbana. ³³ Y chcasna, chë obanënga chamojtayena ora, ¿ndabe chë canýsëfta catšatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

³⁴ Chora Jesús tojanējuá: —Quem luarentše boyabásenga y shembásenga mondbétsobouamnaye; ³⁵ pero chë echanjóshjango luaroye jama y obanënguentsana jtayenama merecido

jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, ³⁶ ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentšana mochtayénayeca. ³⁷ Y Moisésnaca, chë yojsángbototjuana betiyetémama tojanábementse, bënga šontsinýanýná chë obanënga imnátayenama; chentse Bëngbe Bëtsá tojánayana cha yomna Abraham, Isaac y Jacobëbe Bëtsá ca. ³⁸ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³⁹ Chora básefta ley abuátambayënga Jesús tmojanianya: —Buatëmbayá, tšabá tcjayana ca.

⁴⁰ Y ya ndoñe más montsenñémua inýe soyëngama jatstjanayana.

¿Cristo ndabe entsábentšana yomna?

(Mt 22.41-46; Mc 12.35-37)

⁴¹ Jesús tojanatjá: “¿Ndáyeca tšëngaftanga šmnétsichamo chë Uámána Uabuayaná, chë Cristo, Rey Davidbentšana iuabó ca? ⁴² Er cach David, chabe librëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojanianya: ‘Atšbe catšbioica mótbema,

⁴³ atšbe obenánaca, acbe uayayënga acbe cucuatsiñe chamoquedama chjamëntscuana ca.’

44 ¿Ntšámose, Cristo, Davídbentšana nántsemna, cach David ‘Utabná ca’ chábioye tbojtsabobuátmése ca?” —cha tojanatjá.

Jesús chë ley abuátambayëngbiana tojánayana chënga ndoñe tšabá montsama ca

(Mt 23.1-36; Mc 12.38-40; Lc 11.37-54)

45 Nyetsca entsanga imojtsuenana, y Jesús chabe uatsjéndayënga tojanéyana: 46 “Cuedado smochtsebomna, y ndoñe smattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenañe entsanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguiñe jtsetbiámanana, y fiestënguiñe nÿa quëfseroca. 47 Pero chë viudángbioye chë tmobomna soyënga jtsabacayana; y entsangbe delante tšabá chacmotsënyama y chënga imojtsaíngñama ndoñe chaondëtsótatšëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínÿengbiana más chënga echanjácastigaye ca” — Jesús tojánayana.

21

Jesús yojtsënyaye chë crocénana quëcjnyënga

(Mc 12.41-44)

1 Bëngbe Bëtsabe bëts yebnentše, Jesús yojtsënyaye chë bomnënga crocénana jtsequëcjnyayana chë crocénana quëcjnyëtémiñe; 2 y canÿe viudá ndbomnjëmnaca tbojáninÿe, uta crocénana chëtémiñe yojaftsesegóra. 3 Chora Jesús tojánayana: “Ndegombre cbëyana, quem viudá ndbomnjëma,

Bëngbe Bëtsabiana nÿetscangbiana más beca tonjëftseseGORÁ; ⁴ er nÿetscanga tmonjëftseseGORÁ chë yojtsóyentšjamentšana, pero chana, masque tša ndbomnjema, cha vida jtseBomnana lempe ntsachetšá yobomncá tonjëftseseGORÁ ca.”

Jesús tojánayana Bëngbe Bëtsabe bëts yebna lempe moChjánpochocama

(Mt 24.1-2; Mc 13.1-2)

⁵ Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámana ndëtsbéngaca y chë entsanga imojanamana juambana Bëngbe Bëtsábioye uátšëmbona soyéngaca ca. As Jesús tojánayana: ⁶ –Canÿe tempo echanjóshjango, y lempe ntšamo mora muentše šmontsonÿacá tondaye queochatoquéda, ni mo canÿe ndëtsbé inÿebé juatsboye. Lempe mochantsepochóca ca.

Ntšamo yochtsemna quem luare jopochócamate chaojtsobeco ora

(Mt 24.3-28; Mc 13.3-23)

⁷ Chora chënga tmojantjá: –Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

⁸ Y Jesús tojánayana: –Cuedado šmochtseBomna ndocná chacmondáingñema. Er banga mochanjabo y mochantSabíchamo chënga atše imomna ca. MochántSichamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye. ⁹ Y tšëngaftanga, entsanga imojtsentsjanama y entsanga mandadëngbe contra imojtsemnama chašmojtsuenana ora,

ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

¹⁰ Y mëntsánaca Jesús tojanéyana: “Canÿe luarentša entsanga, inÿe luaroca entsángaftaca mochántsestsjanaye; y canÿe amëndayábentša entsanga, inÿe amëndayábioca entsangaftácnaca.

¹¹ Ba luarënguiñe jabuache echanjuangmëmëmana, bëts shëntsana, y entsanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entsanga jinÿanÿiyama quem luare ya yochtsopochócama.

¹² “Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjunatse játssetšenama y cárceloyñaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa. ¹³ Chca šmochanjapása, ntšamo atšbiama šmotatšëmbcá chënga chašmëyanama. ¹⁴ Natsana ndoñe šmatjátsjuabnaye jenëuyanama ntšamo chora jóyebuambayana, ¹⁵ er atše chanjama puerte tšabá y osertanánaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsichamo ca, y ndocá jojuama quemochatobenaye. ¹⁶ Pero uayayëngbe cucuatšifñe cmochanjábashejuana cach tšëngaftangbe bëtsëtsanga, catšátanga, pamíllanga y amiguënga; y tšëngaftanguentsana báseftanga cmochantsëbaye. ¹⁷ Y nyetsca entsanga

cmochantsëbuayënja, atšbe ústonënga bétsemna causa. ¹⁸ Pero tšëngaftangbe bestšašentsšana ni mo canye stjënëja quecmochátabajajo. ¹⁹ Tšëngaftanga nyets tempo átšbeñe ošbuáchiyënga chašmojtsemnëse, chë nyetsca tescama yomna tšabe vida šmochántse bomna ca.

²⁰ “Jerusalén nyets shéconana soldadënga chašmojanýe ora, šmochtsetátšëmbo Jerusalén jopochócama tojobuáchama. ²¹ Chorna, chë Judeoca oyenënga batsjabengoye chamot-sacheta; Jerusalenentše chamojtsemnënga, chentšana chamuaisebocana; y chë jajenache chamojtsemnëngna, Jerusalenoye ndoñe chamondésamashjna. ²² Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguiñe endayancá chora echanjochnëngo. ²³ ;Tša lastema chë tempo shembásenga ngomámanëngbiamama o ochóchaye básenga chamojtsabamnëngbiamama! Er chora corente ngménana quem luarentše echántsemna, y quem luarentša entsangbiamama chë uabouana castigo. ²⁴ Inyënga espadējaca mochanjóbana, y ínýëngbioye nyetsca luarënguējana utámenënga mochanjunatse; y chë ndoñe judiëngna, Jerusalenoca entsángbioye mochántsatsejaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mt 24.29-35, 42-44; Mc 13.24-37)

²⁵ Mëntsánaca Jesús tojánayana: “Chora bëts soyënga echantsinýna shinýiñe, juash-

coniñe y estrellēnguiñe; y quem luarentša entšanga tša mochántsauatja, ndayá jamama ntsetatšēmbcá, chē mar bėjaye y olēshēnga corente echantsefshauenana causa. ²⁶ Entšanga echantsabuatēcja tša auatja causa y ndayá quem luariñe yochjopásama enócochinýena causa; er chē quem luarentša tsbanánoca espíritēnga obenana bomnēnga echanjángmēmana. ²⁷ Y chora entšanga mochanjinýe, chē Bēngbe Bētsá Entšá tbojanbemá jantšetēshiñe echántsaboye, puerte obenánaca y corente buashinýinýaniñe. ²⁸ Chē soyēnga jochnēnguama chaojobjatsé ora, añemo šmochjentsetaye y bestšaše játsbanase šmochjarrepára, er chora echántsemna chē tšēngaftangbe atsebacayana ca” —Jesús tojánayana.

²⁹ Mēntšánaca Jesús tojanéyana jabuátambama: “Smochjinýe canýe higo betiye o ndaye inýe betínaca. ³⁰ Tojtsaisējotsanama šmojinýe ora, jtsetatšēmbuana chē tšabe tempo ya yojtsaisobecuama. ³¹ Cachcá, chē soyēnga yojtsēchnējuanama chašmojinýe ora, šmochtsetátšēmo chē Bēngbe Bētsabe amēndayana ya yojtsobecuama.

³² “Ndegombre cbéyana, lempe chca echanjochnēngo, morsca entšanga cabá ndóbana ora. ³³ Celoca y quem luare echanjopochóca, pero atšbe palabra ndocna te queochaisopochóca.

³⁴⁻³⁵ “Cuedado šmochtsebomna y ndoñe šmatjaleséncia tšēngaftangbe ainana bacna juabnēngaca chaotsemnana, jenomándama ntsobercá mocá enobuena causa, tmoye causa y nýe quem luarentša soyēngama enócochinýena causa; y tšēngaftanga prontánēnga

šmochtsemna, nýe ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiama canýe uachmaniñe cuaftsemncá. Er nýetsca quem luarentša entšangbiama chca echántsemna. ³⁶ Cuedado šmochtsebomna y yejuana šmochtsantješna; nýe ntseco órnaca Bëngbe Bëtsáftaca šmochtsencuéntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” –Jesús tojanéyana.

³⁷ Jesús, bnëtë Bëngbe Bëtsabe bëts yebnentše yojánabuatambaye, y ibetna, Olivos uabaina tjashoye yojánaye joquédama. ³⁸ Y nýetsca entšanga cabá cachëse Bëngbe Bëtsabe bëts yebnoye imojánajna Jesús joyeunayama.

22

Entšanga tmojanjuabó ntšamo jamëse Jesúsbioye jishachama

(Mt 26.1-5, 14-16; Mc 14.1-2, 10-11; Jn 11.45-53)

¹ Ya yojétsobeco Bashco fiesta, chë levadúraca ndëpormana tandëše saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. ² Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entšangbiama imojtsauatja.

³ Chora Satanás, Judas chë Iscariote ca uabobuatmabe ainaniñe bacna juabnënga tojanajó. Chánaca yojamna chë bnëtsana uta uatsjendayënguentsá; ⁴ y tojána, chë

bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuëntama, ntšamo Jesús chëngbe cucuatšifne jayentšbáshejuanama. ⁵ As chënga imojóyejuaye, y Judas tmojanšbuachená crocénana chama jtatšetayana. ⁶ Y Júdasna aíñe ca tojánayana; y cach orscana cha yojtseenguaye ntšamo jamana y ndëmua ora Jesús chëngbioye jayentšbáshejuanama, ndocna entšanga ora.

Jesús chabe uatsjëndayëngaftaca Bashco saná tojanse

(Mt 26.17-29; Mc 14.12-25; Jn 13.21-30; 1 Co 11.23-26)

⁷ Chë Bashco fiesta ora tojanóshjango, chë lev-adúraca ndëpormana tandëse sayté; chë te yojamna, Bëngbe Bëtsá jëtschuayamna canye oveshá jóbana chora jasama. ⁸ As Jesús, Pedro y Juánbioye tojanëyana: —Motsata y saná šochjapróna Bashco fiestama bënga mochjasama ca.

⁹ Chora chata tbojantjá: —¿Ndëmoca cojtseboše chë saná fchjapróntama ca?

¹⁰ Y Jesús tojanëjua: —Jerusalenentše chašojámashëngo ora, canye bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonyaye ndëmuanye yebnentše cha yochjámashënguama; ¹¹ y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?’ ” ¹² As cha cmochanjínyanyiye canye bëts tsañe, tsbanana pisoca; ya lempe echántseprontana, y chentše, Bashco fiestama saná šochjapróna ca.

13 As chë útata tbojána, y tbojáninyena lempe ntšamo Jesús tojanëyancá, y chentše chë Bashco saná tbojanprontata.

14 Jasama tojanobuache ora, Jesús mesëshentše tojanótbema chabe uatsjédayëngaftaca, chë cachënga más chcoye chabe ichmónënga ca uabáinënga. 15 Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufrí ora.

16 Muentšana ndoñe más quemëntša saná quicháise, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

17 Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbëyana, 18 chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

19 Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

20 Tmojansentšana, chë coptémaca tojanma cachcá ntšamo chë tandëšeca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entšàngaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá

ndegombre yochjochnënguama. Chë buiñe tšëngaftangbe tšabiamá echanjuábuashana. ²¹ Pero chë uayayëngbe cucuatšinë šochjaboshjoná, mesëshentše átšeftaca entsemna. ²² Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiamá tojanjuabocá. ¡Pero tša lastema chë bochjáboshjonabiamá ca!” —Jesús tojánayana.

²³ Chorna chë uatsjëndayënga tmojanontšé entjanayana, chënguentsá nda chë boshjuaná bétsemnana.

Nda chë más uamaná yomna

²⁴ Chë uatsjëndayënga imojtsenatsëtsnaye chënguentsá nda chë más uamaná bétsemnana. ²⁵ As Jesús tojánëyana: “Chë ndoñe judiëngbeñe, chë reyënga chëngbe entšángbioye nýe ntšámnaca jtsamëndayana, y chentša amëndayënga jtsamana, entšanga chëngbioye tšabe soye amënga ca chamotsëboboútmama. ²⁶ Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. ²⁷ Er, ¿ndase chë más uamaná yomna, chë mesëshentše jasama tojotbemá o chë uajuatšnáyá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservenacá.

²⁸ “Atšbe padecéniñe tšëngaftanga sempre átšeftaca šmondëtsemna. ²⁹ Chíyeca, atšbe bariëna, canýe amëndayana cbochanjátšataye, ntšamo atšbe taitá canýe amëndayana šojatštacá; ³⁰ chca, atšbe amëndayoca mesëshentše átšeftaca

šmochanjase y šmochanjofšiye, y uámana tbemaniñe mo reyëngcá šmochanjotbiama, chë Israeloca bnëtsana uta pamíllanga entsangbiama chašmuayanama tšabá o ndoñe tšabá chënga tmonjamama ca” –Jesús tojánayana.

Jesús tojánayana, chábioye ndoñe bonjanabuátma ca Pedro yochjánayana

(Mt 26.31-35; Mc 14.27-31; Jn 13.36-38)

³¹ Jesús mëntsánaca tojánayana: –Simón, Simón; cochtsetátšëmbo, Satanás obenana tonjotjañe tšëngaftangaftaca nÿe ntšámnaca jamama, mo chë trigo matënga tcojtsashatiyeynacá; ³² pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nÿets ošbuáchiyana átšbeñe chacojtsatsbomna ora, chë inÿe ošbuáchiyënga cochjújabuache átšbeñe sempre chamotsošbuáchema ca.

³³ Chora Simón tbojanayana: –Bëngbe Utabná, atše sëntseprontana ácaftaca cárceloje jámnaca y jobanámnaca ca.

³⁴ Y Jesús tbojanayana: –Pedro, atše cbëyana, cam ibeta bínÿanoye, ngallo cabá ndëcánta ora, aca unga soye cochanjayana ndoñe šconduabuatma ca.

Chë más jabuache ora yojtsobeco

³⁵ Chentšana Jesús tojanatjá: –¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tcmojanabuáshebena ca?

Y chënga tmojanjuá: –Tondaye ca.

³⁶ Chora tojanëyana: –Mora ndoñe chca; shecnaja tobomná, chëja chauesocñe y

crocenánama shecnëbénaca; y nda ndoñe espadëja tondbomna, chabe quëfsaíya chaotsatábuiye y canÿe espadëja chauatobuámiñe. ³⁷ Er cbëyana, entseyta átseftaca chaopasá, ntšamo Bëngbe Bëtsabe uabemana palabrénguiñe atšbiana iuayancá, mëntšá: “Y chábioye tmonjáninÿe mo chë puerte bacna soye amënguentšá canÿa cuaftsemncá ca.” Y lempe ntšamo atšbiana iuabemancá, mora ya echanjochnëngo ca –Jesús tojanëyana.

³⁸ As chënga tmojaniana: –Bëngbe Utabná, muentše uta espadëja entsemna ca.

Y japochócamna cha tojánayana: –Nÿe nÿetšá ponto ca.

Getsemaní luarentše, Jesús Bëngbe Bëtsáftaca tbojanencuentá

(Mt 26.36-46; Mc 14.32-42)

³⁹ Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto. ⁴⁰ Choca tmojánashjajna ora, Jesús tojanëyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

⁴¹ Y chë uatsjëndayëngbentšana yojoluára, mo canÿe ndëtsbé jutšenëntscoca nÿetšá, y yojoshëntsamentšiye Bëngbe Bëtsáftaca jencuéntama. ⁴² Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

43 Chca orna celocana canye ángel tbojánebëbocna, añemo chaotsebomnama juajabuáchama. 44 Jesús tša ngmëniñe yojtsemna, y Bëngbe Bëtsáftaca más ibojtsencuëntaye. Y chabe bosesë yojtsemna mo fshantsiñe buiñe cuaftsebuastëtjuancá.

45 Bëngbe Bëtsáftaca jencuëntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnëtsomañe, tša ngmënaca imojtsemna causa. 46 Chora tojanëyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguma ca.”

Uayayënga Jesús tmojánishache

(Mt 26.47-56; Mc 14.43-50; Jn 18.2-11)

47 Jesús cabá yojtsóyebuambnantscuana, ba entšanga chentše tmojánashjajna. Chë Judas ca uabainá, canya chë bnëtsana uta uatsjëndayënguentsá, chë entšangbe natsana yojtsaye. Cha yojobeconá Jesús juamóchama; 48 pero Jesús tbojanianyana: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšiñe cochjaboshjona ca?”

49 Chë Jesúseftaca imojtsemnënga tmojáninye ntšamo chora yochjanopásama; as tmojanianyana: — Bëngbe Utabná, ¿espadëjaca fšcotsatsejaye ca?

50 Y canya chënguentsá, chë bachnangbe más uámana amëndayabe bochichnayábioye catšbioica matscuaše tbojtsantëtse, y tbojtsanëštjango. 51 Chora Jesús tojanëyana: —Cachcá monyá; nye nyëtsá ponto ca.

Y chë bochichnayábioye chë matscuaše tbojánbojajo y tbojanshná. ⁵² Chentšana, chë bachnangbe amëndayënga, chë Bëngbe Bëtsabe bëts yebnentsa soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanëyana: “¿Ndáyeca espadëjangaca y ngarotbéngaca šmojabo atše jishachama, mo atše canye bacá uamana entsá cuaftsemncá ca? ⁵³ Atše cada te tšëngaftangaftaca sënjamna Bëngbe Bëtsabe bëts yebnentsë, y ni chešmánatbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemádaye ca” —Jesús tojanëyana.

Pedro tojánayana Jesúsbioye ndoñe bon-janabuátma ca

(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴ Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënocana ibojtsëstona. ⁵⁵ Choca, chashja tsëntsaca, canye íñeshe tmojanangbotjó y entsanga chë shëconana imojtsetbiámana; y Pédrënaca chentše chëngaftaca yojótbema. ⁵⁶ Chora, canye shembása chentša oservená, Pédrëbioye tbojáninýe chë ñe juachaca yojtsetbemana; tbojanonýinýe y tojánayana: — Muánaca cháftaca endánmëna ca.

⁵⁷ Pero Pedro ndoñe ca tojánayana, y chë shembásabioye mëntsá tbojanianyana: —Sobrená, atše cha ndoñe quetsatabuatma ca.

⁵⁸ Ndoñe yapa bën y inya chábioye tbojataninye y tbojaniyana: —Acnaca chë uatsjendayënguentsá condmëna ca.

Pero Pedro tbojanjuá: —Bacó, atše ndoñe quetsátsmëna ca.

⁵⁹ Chentša benëntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojt-sichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canye ngallo yojacánta. ⁶¹ Chora Bëngbe Utabná yojobuértana y Pédrëbioye tbojanonÿinÿé; y Pedro chora yojenójuaboye ntšamo Bëngbe Utabná tbojaniyanama: “Cam ibeta bínÿanoye, ngallo cabá ndëcánta ora, aca unga soye cochanjayana ndoñe šconduabatma ca.” ⁶² As Pedro shjoye tojánbocna, y corente ngmënaca yojtsenóbošachna.

Jesús imojtsáboyejuana

(Mt 26.67-68; Mc 14.65)

⁶³ Chë Jesús imojtsebojanÿá entšanga cha imojtsáboyejuana y imojtsejantšetaye; ⁶⁴ y jtsabuchëntsacjuase, imojtsetjanaye: “¡Momalisiá, nda tcmënjajantšetá ca!” ⁶⁵ Y imojtsóyenguaye, nÿe mocá soyënga jtsatsëtsnayëse.

Jesús, chë judiëngbe uámana mándayëngbe delante

(Mt 26.59-66; Mc 14.55-64; Jn 18.19-24)

⁶⁶ Tojanbinÿna ora, chë bëtsëjemëngcá amëndayënga, bachnangbe amëndayënga y ley abuatambayënga tmojánenefjna, y chëngbioye Jesús tmojanánatse. Choca tmojantjá: ⁶⁷ —Smëyana,

¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanējua: —Aíñe ca tcojojáuyanëse, tšëngaftanga chama átšbeñe ndoñe quešmochatošbuáchiye. ⁶⁸ Y nderado tcojojátjasna, tšëngaftanga ndoñe quešmochatojuá ca. ⁶⁹ Pero cam orscana, chë Bëngbe Bëtsá Entśá tbojanbemá, chë Bëngbe Bëtsá nýets obenana bonnabe catšbioica echántsbemana ca.

⁷⁰ Chora nýetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanējua: —Cach tšëngaftanga chca šmontsichamo; atše cha sëndmëna ca.

⁷¹ As chora chënga tmojánayana: —¿Ndayama más entšanga šochjátëjaboto Jesusbe contra chamuayanama? Er cach bënga chabe uayášentsana chca tmonjouena ca.

23

Jesús, Pilatbe delante

(Mt 27.1-2, 11-14; Mc 15.1-5; Jn 18.28-38)

¹ Nýetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. ² Y chentše tmojanontsé cha mal jaquédana, mëntśá: —Bënga fsënjínýena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquécjnayana ca; y entsichamo cha yonna chë Cristo, chë Bëngbe Bëtsabe Uámana Uabuayaná, mo canýe reycá ca.

³ Chora Pilato Jesúsbioye mëntśá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

⁴ As Pilato, chë bachnangbe amëndayënga y entsanga tojanëyana: —Atše ni mo canye soye chiyátinÿena, quem boyabása castiganá chaotsemnama jayanama ca.

⁵ Pero chënga más tmojanáyebuachena: —Nÿets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatsé y mora moca Judeócnaca cachcá entsama ca.

Jesús Rey Heródesbe delante

⁶ As Pilato, Galilea luarama yojouena ora, tojanatjá Jesús Galileocá tayojamnama. ⁷ Y Jesús aíñe Galileoca yojamnama cha tojántatsëmbona ora, Rey Heródesbioye cha tbojanichmó. Herodes inamna Galileoca mandado y chora Jerusale-
nentše cha yojtsemna. ⁸ Herodes Jesúsbioye tbojáninÿe ora, corente tojanoyejuá. Chana temp-
scana inaboše Jesús jinÿama. Cha ba soyënga Je-
susbiama tojanuena, y yojtseboše jinÿama Jesús
jamana canye bëts soye, Bëngbe Bëtsabe obenánaca.
⁹ Heródesna ba soyënga tbojantjá, pero cha ndocá
tbonjanjuá. ¹⁰ Y chéntšnaca, chë bachnangbe
amëndayënga y judiëngbe ley abuátambayënga imo-
jtsemna, y Jesús corente mal imojtsequédaye.

¹¹ Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entšayangá tmojanichëtjo, mo canye reycá; chentšana cachiñe Pilátbioye tmojesanichmó. ¹² Cach te Herodes y Pilato tbojtanenatsëtsaye; tempna chata ibojenáyata.

Jesusbiana chaóbana ca tmojánayana
(Mt 27.15-26; Mc 15.6-15; Jn 18.39-19.16)

¹³ Chentsana Pilato, chë bachnangbe amëndayënga, chë pueblentsa amëndayënga y nyetsca entsanga tojánachembo, ¹⁴ y mëntsá tojanéyana: —Tsëngaftanga quem entsá átsbioye šmojuánatse, mo bacna soye entsángbeñe abuatambayacá, mandadënga ndëtsayaunanama ca; tsëngaftangbe delante lempe sënjatjá, tsëngaftanga ba soyënga muabiana šmonjayana, pero atšna ni mo canye soye chiyátinýena, quem boyabása castiganá jtsemnama ibojtsemna ca jayanama. ¹⁵ Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canye ndoñe tonjobuachjanguá jóbanama chabotsemnama. ¹⁶ Chcasna, jabuache chamotsecastigá y chentsana chanjëtšboshjona ca —cha tojánayana.

¹⁷ Yojamna canye utamená jëtšboshjonana, ntšamo Bashco fiesta ora jamana imojanamancá. ¹⁸ Pero chora entsanga cánýiñe tmojanáyebuachena: —¡Jesús chaóbana! ¡Barrabás matsboshjona ca!

¹⁹ Barrabás inautámena, mandadëngbioye ndëtsayaunanama chë bëts pueblentse entsanga tojánenautanama y entsá óbanaye causa. ²⁰ Pilato cachiñe tojánayana Jesúsbioye jëtšboshjonama yojtsanboše ca; ²¹ pero entsangna más tmojtëtanayebuachena: —¡Motsecrucificá! ¡Motsecrucificá ca!

²² Pilato ya unga soyama tojtëtanayana: — ¿Ntšamo bacna soye mua tojobuachjanguá ca? Ni

mo canye bacna soye chiyátinyena, mua jóbana
chabotsemnama. Chcasna, chanjacastíga y chora
chanjétsboshjona ca.

²³ Pero chēngna más imojtsechembumbuana
Jesús chamotsecrucificama. Cabana, chē bach-
nangbe amēndayēnga y chē entšangbe jabuache
chembumbuanánaca, Pilato tmojanēyēnjaná
Jesús chamóbama. ²⁴ As Pilato tojanmandá
ntšamo chē entšanga imojtsotjanañcá
chaotsemnama; ²⁵ as chora Pilato, Barrabásbioye
cachcá tbojtamboshjona, chē nda inautámena
mandadēngbioye ndētsayaunanama entšangbioye
tojánenautanama y entšá óbanaye causa. Y Jesusna
entšangbe cucuatšíñe tbojánboshjona, ntšamo
chēnga tmojtsebošcá chamomama.

Jesús tmojanrucificá

(Mt 27.32-44; Mc 15.21-32; Jn 19.17-27)

²⁶ As jacrucificama Jesús tmojanánatse. Chora
jajocana inátaboye canye boyabása, Simón ca
uabainá, Cirene luarocá; y cha Jesusbe cruz
tmojancutsá, Jesusbe ústonoye chaotsambama.

²⁷ Y banga chē pueblentša entšanga
imojtsēstona; y chē shembásenga imojtsēstonēngna
imojtsayošachiye y ngménaca imojtsanioye,
Jesús chca yojtsepásama. ²⁸ As Jesús chēngbioye
tojanobuértana y tojanéyana: “Jerusalenentša
shembásenga, atšbiamá ndoñe matošachena;
cach tšēngaftangbiamá y tšēngaftangbe básengbiamá
šmochjenóbošachna. ²⁹ Canye te echanjóshjango
y chē te šmochántšichamo: “Tša tšabá chē
shembásenga šešona ndbomnēngbiamá, chē quem
luaroye šešonga ndoñe tmonjéftsēshejajnēngbiamá,

y chë šešonga ndoñe tmonjëftsabachengbiana ca.'

³⁰ Chora entsanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’

³¹ Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” –cha tojanëyana.

³² Jesúseftaca cruciñe jóbanama, útata bëts bacna soyënga ochjajnayátnaca imojtsënachaye.

³³ Chë “Obanabe Bestšashe ca” uabaina luaroye tmojánashjajna ora, Jesús tmojan crucificá y chë bëts bacna soyënga ochjajnayátnaca, canya chabe catšbioica y chë ínÿana chabe uañicuayoica.

³⁴ Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entšayamna, tsbanánoye tmojanëtsëna, chënga jtenájatayama.

³⁵ Entšanga chentše imojtsemnënga chca imojtsonÿaye, y chë pueblentša mandayëngnaca Jesús imojtsáboyejuana y mëntšá imojtsenatsëtsnaye: “Inÿengna aïñe tojëftsatsebacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

³⁶ Soldadëngnaca Jesús imojtsáboyejuana; tmojanobeconá y untja vínoye imojtsefšësnaye,

³⁷ y mëntšá imojtsatsaye: “¡Chë judiëngbe Rey tcomnëсна, cach aca mentsbocá ca!”

³⁸ Jesusbe bestšaše juatsboicna canÿe

uabemana soye tmojananjo; chiñe mēntśá yojtsanábemana: MUA CHĚ JUDIĚNGBE REY ENDMĚNA ca.

³⁹ Canýe bĕts bacna soyĕnga ochjajnayá yojtse-crucificaná, Jesúsbioye mēntśá tbojanóyenguango: —Chĕ Bĕngbe Bĕtsabe Uámana Uabuayaná tcomnĕsna, mentsbocá y bĕndátnaca šmatsebocá ca.

⁴⁰ Pero chĕ inýe bĕts bacna soyĕnga ochjajnayana mēntśá tbojanácacana: —¿Ni mo Bĕngbe Bĕtsá ndoñe condĕrrespetana? Bĕndátnaca bontsamna chacá jóbanama. ⁴¹ Ndegombre bĕndata muentše bontsemna bĕts bacna soyĕnga ochjajnaye causa, y chíyeca chca jasúfriama bontsamna. Pero quem boyabása ni mo canýe bacna soye ndoñe tonjobuachjanguá ca.

⁴² Y chorna, quem bĕts bacna soyĕnga ochjajnayá Jesúsbioye tbojanianyana: —Jesús, atšbiana cochtenójuaboye aca reycá jabomándama chacojtabo ora ca.

⁴³ Y Jesús tbojanjuá: —Ndegombre cbĕyana, mĕnté átšeftaca celoca, chĕ nýetscanga oyejuayĕnga mondbetsemnoca, aca cochantsatsmĕna ca.

Jesús tojanóbana

(Mt 27.45-56; Mc 15.33-41; Jn 19.28-30)

⁴⁴ Nýetsto orscana las tresĕntscoñe nýets quem luare yojtseibétata. ⁴⁵ Y shinýe yojtsajbaná binýnayana, y Bĕngbe Bĕtsabe bĕts yebnentše yojújonýana entśĕjua tsĕntsaca yojtsenájataye. Chĕjua bĕnĕjua inauamna y chĕ tsatsĕntsaca inaújonýana. ⁴⁶ As Jesús tojanáyebuachena: “Taita, atšbe espíritu acbe cucuatšíñe šcoboshjona ca.”

Y chca jayanama tojanpochocá ora, tojanóbana.

⁴⁷ Chë romano soldadëngbe amëndayá chca tojáninÿe ora, Bëngbe Bëtsábioye tbojtanadorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

⁴⁸ Nÿetsca entšanga chë soye jinÿama tmojánabënga, chca tojanopasama tmojáninÿe ora, tmojanontsé jtangana enocochjantsetaye, ngménama. ⁴⁹ Pero Jesusbe nÿetsca ubuátmënga y chë shembásenga Galileocana tmojanastëngna, chaboca tmojanoquedá chë soyënga onÿayiñe.

Jesús tmojanatbontsá

(Mt 27.57-61; Mc 15.42-47; Jn 19.38-42)

⁵⁰ Yojanmëna canÿe boyabása, José ca uabainá, canÿe Judeoca pueblócá, Arimatea ca uabaina; cha inamna canÿa chë pueblentša uámana amëndayënguentsá y canÿe tšabe entšá y nÿetsca soyënguiñe tšabá amá. ⁵¹ Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inÿe amëndayënga tmojanjuabó y Jesúseftaca tmojanmcá. ⁵² Cha Pilátbioye tojána y Jesusbe cuerpo tbojanotjañe. ⁵³ José chë cruzocana Jesusbe cuerpo tbojtanëstjango, canÿe lino entšëjuaca tbojanandmaná y canÿe cuevëshiñe, peñëshiñe pormániñe, tbojanjajó. Chentše cabá ndocná mondëjajo. ⁵⁴ Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínÿana.

⁵⁵ Chë shembásenga, Galileocana Jesús tmojan-tjëmbambanga, tmojána y chë cuevëshe tmojáninÿe,

y tmojanrrepará ntšamo Jesusbe cuerpo tmojan-jajoma. ⁵⁶ Yebnoye tmojtaná orna, tmojanprontá botamana uanguëtše bėjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyíñe yojanmandancá.

24

Jesús tojtanayena

(Mt 28.1-10; Mc 16.1-8; Jn 20.1-10)

¹ Y tmengo, chë inye semana bojatséntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtše soyënga. ² Pero choye tmojánashjajna orna, tmojáninýena chë cuevëshoye amashjuanentša ndëtšbé chentšana juanániñe, ³ y choye tmojánamashjna ora, Bëngbe Utabná Jesusbe cuerpo ndoñe tmonjáninýena. ⁴ Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinýinýana entšayá uichëtjonata chentše tbojabántsaye. ⁵ Y chë shembásenga tmojanëuatjanama y fshantsoye imojtsatsejbénama, chata tbojanëyana: “¿Ndáyeca obanëngbentše chë vida totsobomñá šmojtsenguá ca? ⁶ Muentše cha ndocná quenátsmëna, er cha ya tontayena. Menójuabonga ndayá cha tmojanëyanama, cha cabá Galileoca enjamna ora. Cha tonjánayana: ⁷ ‘Chë Bëngbe Bëtsá Entšá tbojanbemá bontsemna bacna soye amëngbe cucuatšiñe chamoboshjonama,

chamocrucificama y unga tiano ye cháuatayenama ca' ” —chata tbojánayana.

⁸ Chora chë shembásenga Jesusbe palabrëngama imojtenójuaboye, ⁹ y chë cuevëshentšana tmojtaná ora, chë tšabe noticiënga chë bnëtsana canÿe uatsjëndayënga y inÿe entsángbioye tmojanacuntá.

¹⁰ Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inÿe shembásenga chëngaftaca imojamnënga.

¹¹ Pero chë uatsjëndayëngna mëntšá chë shembásengbiamama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

¹² Pero chentšana, Pedro tojëftsantsbaná y ochamanana chë Jesús tmojanjajó cuevëshoye tojána. Y choca yojtsemna ora, yojotsejbéna tsoye jontješiyama, pero nÿe ena entsëjuangá yojuinÿe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

Chë Emaús puebloye benachiñe

(Mc 16.12-13)

¹³ Cach te, uta uatsjëndayata Emaús puebloye ibojtsaye. Emaús yojamna Jerusalenocana bnëtsana canÿe kilómetroca.

¹⁴ Chata ibojtsayencuëntaye lempe ntšamo tojanopasama. ¹⁵ Y tojanopasá, ibojtsencuëntaye y ibojtsenatsëtsnayëntscuana, cach Jesús tojanobeconá y chátaftaca cánÿiñe yojtsaye;

¹⁶ masque imojtsonÿaye, ndoñe ibontsobena cha jótëmbana. ¹⁷ Jesús tojanëyana: —¿Ndayama benachiñe šuabanencuëntaye ca?

As chata ngménaca ibojotsaye,¹⁸ y canya, Cleofás ca uabainá, tbojaniyana: —¿Nyē aca cojtsemna, inye luarocana ashjagoná Jerusalenentse oyená, ndayá chentse quem diēnga yopasánama ndētatsēmbuá ca?

¹⁹ Chora cha tojanéyana: —¿Ndaye soyēnga ca?

Y chata tbojaniyana: —Chē Jesús Nazaretocáftaca tonjopasá soyēngama. Cha enjamna canye Bēngbe Bētsabe juabna oyebuambnayá, puerte obenana bomná ndayá jamama y jayanama, Bēngbe Bētsabe delante y nyetsca entsangbe delante.

²⁰ Y ntšamo, chē bachnangbe amēndayēnga y chentša mandadēnga inyēngbe cucuatšīne tmonjáboshjona, jóbanama ibojtsemna ca entsanga chamuayanama y chamocrucificama.

²¹ Bēnga chabiamá fsēñjanobátmana, Césarbe cucuatšentšana Israeloca entsangbe atsebacayá chaotsemnana; pero morna ya unga te entsemna chca tonjopasá.

²² Y mora ndayá, básefta shembásenga bēngbe enutēnga ójnanana soyēnga šonjáuyana. Chēnga cabá cachēse chē Jesusbe cuerpo tmonjanjajó cuevēshoye tmonjá, ²³ y chabe cuerpo ndoñe tmonjínýena; as chora chēnga bēngbioye tmontabo y montsabíchamo angelēnga tmojéftsanýe y chēnga catmēñjayana cha ainá yojtatsmēna ca.

²⁴ Bēngbentšana baseftángnaca chentšana chē cuevēshoye tmonjá, y tmojínýena ntšamo chē shembásenga tmonjayancá, pero Jesús ndoñe tmojéftsinýe ca —chata ibojtsichamo.

²⁵ As Jesús chata tojanéyana: —iTša juabna nd-bomnēnga y tša uenana jošbuáchiyama, chē Bēngbe Bētsabe juabna oyebuambnayēnga tmojánayana

soyëngama! ²⁶ ¿Mo ndoñe yonjamna chë Uámana Uabuayaná chë soyënga chaosufrima, y chentsana nyetsca entsanga corente cha chamuatschuama ca?

²⁷ Chentsana Jesús tojanontsé chata jábuayenana, lempe ntšamo chabiana yojanoyebuambnacá chë Bëngbe Bëtsabe uabemana palabrenguiñe; yojontsé Moisesbe librësangañe y chë Bëngbe Bëtsabe juabna oyebuambnayëngbe librësangáñnaca.

²⁸ Chë ibojétsaye puebloye imojtsebeconá ora, Jesús tojanma mo más chcoye cuaftsacá. ²⁹ Pero chatna tmojanatarié chentše chaotsoquedañama, mëntsá jauyanëse: —Bëndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe. ³⁰ Chentsana tojanopasá, juasama mesëshentše imojtsetbiámama ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatsatá. ³¹ As, chora chë uatsjéndayata ibojobenaye Jesús jótëmbana; pero chana nyë ndeolpe yojuenatjëmbe. ³² Chora chata ibojtsenatsëtsnaye: “Chë benachiñe Bëngbe Bëtsabe uabemana palabrengama šondabuayiyiná ora, ndegombre bëngbe ainaniñe más bontseboše cha más chašotsabuayiyinama, ¿ndoñe chca ca?”

³³ As, cachora tbojëftsantsbanata y Jerusalenoye tbojtanata; choca tmojáninýena chë bnëtsana canýe uatsjéndayënga cánýentše imojtsemna y chëngbe enutëgnaca; ³⁴ y mëntsá imojtsichamo: —¡Ndegombre Bëngbe Utabná tojtayena; Simónbioye tbojébëbocna ca!

³⁵ As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëse tojanjatá ora.

*Jesús chabe uatsjéndayënga tojánëbëbuacna
(Mt 28.16-20; Mc 16.14-18; Jn 20.19-23)*

³⁶ Chë uatsjéndayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntšá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

³⁷ Pero chënga tša auatjanánënga imojtsemna, y canye añemëse imojétsonyaye ca imojtsejuabnaye. ³⁸ Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? ³⁹ Atšbe cucuatšënga y atšbe shecuatšënga minyënga; šmobjoajo y šmochanjinye. Cach atše sëntsemna. Canye añemësna, ni mëntšena ni betašënga ntsebomnana; pero tšëngaftanga šmontsonyá, atšna aíñe ca” — tojanëyana.

⁴⁰ Chca yojtsichámëse, chabe cucuatšënga y chabe shecuatšënga tojaninyanýé. ⁴¹ Y chënga cabá ndoñe montsanošbuaché, chca noticiama corente imojtsóyejuama y tša ojnanánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

⁴² As canye tabena buana beonbiana tmojanoyé; ⁴³ Jesús tojanocñe y chëngbentše tojanse. ⁴⁴ Chentšana Jesús tojanëyana: “Quem palabrenga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiana

iubemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librësangañe y Salmos librësañnaca ca.”

⁴⁵ Y chora chë uatsjëndayënga, Jesús beyeca tmojanobená chë Bëngbe Bëtsabe uabemana palabrëngama josértana. ⁴⁶ Chentšana Jesús tojanéyana: “Ntšamo atšbiana iubemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. ⁴⁷ Y morna atšbe uabaina jayanëse, átšbeñe betsošbuáchema, nyets quem luarentše šmochjóntša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuaperdonama; chë soyënga Jerusalenentše chaobojaťsé. ⁴⁸ Tšëngaftanga atšbiana soyënga šmonjinýe y šmondëtatšëmbo. ⁴⁹ Atšbe Taitabe šbuachenaná, tšëngaftangbiana chanjíchmuá. Pero morna camuentše Jerusalenentše moquedanga, Bëngbe Bëtsabe obenana chašmóyëngacñëntscuana ca” –cha tojanéyana.

Jesús celoye tojtantsjuá
(Mc 16.19-20)

⁵⁰ Chentšana, Jesús chabe uatsjëndayënga ínýoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjëndayënga tšabe bendicionënga chamóyëngacñama. ⁵¹ Chca yojsamëntscuana, cha chëngbentšana tojanoluaré y tojanontšé celoye játsjuana. ⁵² Chë uatsjëndayëngna, Jesús tmojtanadorá chentšana, Jerusalenoye oyejuayënga tmojtaná; ⁵³ y cada te,

Bëngbe Bëtsabe bëts yebnoye imojánajna, Bëngbe
Bëtsá jëtschuayama.

clix

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 21 Feb 2024 from source files
dated 29 Jan 2022
19104c0e-9046-5ff3-82fb-eb838c88dcf9